

*ASO LULU, 22 IANUARI 2014*

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

**TULAFONO TAU FAAOFI O LE FAATATAUINA O TUPE  
FAAOPOPO (NU.1) 2013/2014 – felafolafoaiga faaauau i luga o le  
faitauga faalua – Aso 2**

**FOFOGA FETALAI:** Ou te faasilasila atu ua toe amatalia nei Tualumaga a le Fono Aoaofaitulafono.

Ia, e talitonu le faamoemoe o lea ua taape o nuu potopoto lenei taeao fou, o lea ua taumalelei le Igoaipu a le Tamaloa i le maea ai o le tatou galuega i le aso ananafi, ae le mafai ona faaitiitia ai le agaga faafetai atu i le afifio mai ma tala mai o aao o le tatou usugafono i lenei taeao. E momoli atu ai pea le agaga faafetai ma le faamalo i le paia maualuga o le tatou Maota i ona tulaga faalupelupe, ona o le tauavagameaina o le Tala Faatatau Faaopopo o le Tupe e pei ona faatulagaina mai le aso ananafi. Faamalo le onosai, faamalo le faapalepale, malo le soifua maua i lenei taeao fou. E i ai le talitonuga ma le faamoemoe o lo o faapena foi ona tapuaaoina le tapuaiga a Samoa o lo o logona i maota ma laoa ona o le tatou Fonotaga i tulaga faatekonolosi. Ia, alo maia le tatou Fono i lenei aso, e manatu le faamoemoe ua tele le tatou galuega sa ausia i le aso ananafi, ae le tuua ai le tulaga e tatau foi ona fai ma faagasolo le tatou galuega i lenei aso i tuleiga ma saunoaga. Ou te talitonu foi e i ai nisi o a tatou polokalame ma mea ua faataatia talu mai le faamoemoe mo le tatou polokalame i lenei vaiaso, ona e tele nisi o Tulafono o lo o faatulai mai aemaise tulaga o suesuega a Komiti ma polokalame pei ona silafia ua maea ona faasilasila atu muamua. O lea e i ai le talitonuga, e tatalo atu ma le agaga faaaloalo le tatou Fono, o le faataua o le tatou taimi. E manatu foi o lea ua outou faafofoga i ni finagalo na faaalua i le aso ananafi, e le tau asa le ogasami ua uma ona asa, o lea ua logona le fautuaga ua ave i le Kapeneta ma le Malo, ae tatalo atu ina ia faapupuu a tatou lauga, e taua le tatou taimi, a o la outou tofa saili ma mea mo le itumalo, o le mea lena e taua tele. A o le tulaga lautele, ou te manatu ua matua anoa finagalo ua maea ona folasia e le gata i lea Itu o le Maota, a o lea foi Itu o le Maota, a o le mea taua lava o le agai mo atinae o itumalo. Ia o le fautuaga lena e le fai ai, o lo o i ina le tofa ma le faautautaga i le tatou Palemene e fai ai la outou polo faasoa i la outou tofa tatala ma le tofa saili.

**LAFO A LE KOMITI O GALUEGA, TULAFONO TUMAU, MAOTA FONO MA MATAUPU TAU FAIGA PALOTA**

**FOFOGA FETALAI:** Tulai mai lau Afioga i le Sui Fofoga Fetalai.

**Tofa AGAFILI PATISELA ETEUATI TOLOVAA (Sui Taitaifono, Komiti o Galuega, Tulafono Tumau, Maota Fono ma Mataupu Tau Faiga Palota):** Faafetai i lau Afioga i le Fofoga Fetalai. Ae ou te lei faatinoina lou tiute e pei ona tofia i ai au i lenei taeao, ou te faatalofa atu i lau Afioga faapea foi le Palemia ma le aiga Kapeneta, faapea foi le la Itu o le Malu i le Afioga i le Taitai o le Itu Agai ma sui usufono o le Palemene.

O lea ua e muai momoli lapalapa o malo e sula ai le alofa ma le agalelei o le Atua, aua o lea ua maua mai lenei taeao fou i Lona agalelei, ua potopoto le Fonousu a Samoa i ona Taitai i le soifua manuia ma le lagi e mama. Ou te talitonu foi e faapea le tapuaiga a Samoa mai Lana Afioga Mamalu O Le Ao o le Malo, seia oo lava i se aupito itiiti. Ua e faatagisia le alofa o le Atua ina ia mafutaina lenei Palemene i lenei aso.

Ua ou tulai atu e faatu le lafo, *Ina ia faamaonia e lenei Fono Aoao le Polokalame o Fonotaga ma le Tauaofiaga o le 2014/2015 ua tuuina atu iinei e pei ona faamaonia e le Komiti o Galuega, Tulafono Tumau, Maota Fono ma Mataupu Tau Faiga Palota:-*

| <i>Masina</i>  | <i>Aso</i> | <i>Masina</i>  | <i>Aso</i> | <i>Masina</i>  | <i>Aso</i> |
|----------------|------------|----------------|------------|----------------|------------|
| <i>Ianuari</i> | <i>21</i>  | <i>Iuni</i>    | <i>17</i>  | <i>Tesema</i>  | <i>16</i>  |
| <i>Mati</i>    | <i>18</i>  | <i>Aokuso</i>  | <i>19</i>  | <i>Ianuari</i> | <i>20</i>  |
| <i>Me</i>      | <i>29</i>  | <i>Oketopa</i> | <i>21</i>  |                |            |

*Faaluaina e le sui usufono mo le Au Palota Taitoatasi, Susuga Hon Papaliitele Niko Lee Hang ma le sui usufono mo Aleipata Itupa i Luga.*

*Na faamaonia le lafo ma faamaonia ai le Polokalame o Fonotaga a le Fono Aoao mo le Tauaofiaga o le 2014/2015.*

**ISI FAASILASILAGA A LE FOFOGA FETALAI**

**FOFOGA FETALAI:** Faafetai atu i lau Afioga i le Sui Fofoga Fetalai. E manatu o lena ua folasia le lafo a le Komiti o Galuega, Tulafono Tumau, Maota Fono ma Mataupu Tau Faiga Palota, o lena foi ua tufatufaina atu mo le silafia e le mamalu o sui usufono uma le tatou polokalame lenei. Ma e i ai le faamoemoe ona o tulaga foi sa tulai mai i lea tausaga ua tuanai atu, ia o lea e tatalo atu ai le Fofoga Fetalai ina ia silasila totoa sui usufono uma o le tatou Maota, ona o le tatou polokalame faataatia. E i ai le faamoemoe e ave pea la outou lagolago e ala i Fonotaga a le tatou Palemene, a o le aso ananafi na faaiuina ai ma tuuina mai le polokalame a le tatou Malo, ina ia fua i ai a tatou polokalame uma. O le masina muamua lenei o le tausaga ona faapena lea ona fai ma taiala ma alafua e fua uma ai a tatou polokalame ina ia aua ne i toe i ai nisi o polokalame e felavasai pe o faatasi i le taimi e tasi. Ua tuuina atu ai mo

le silafia e le tatou Malo aemaise sui usufono mamalu uma taitoatasi ina ia faatulaga i ai a tatou polokalame ma tatou aso fono.

O lo o faatulaga ai foi i le polokalame na tuuina atu le tatou de-briefing poo tatou polokalame masani i totonu o le tatou polokalame o le faamalasia ma le faalauiloaina o le tatou Palemene atoa ai ma polokalame o aso malolo, ina ia matua manino ma malamalama lelei tulaga o le taumafai atu o le Komiti o Galuega ma le Komiti o Tulafono Tumau ma le Maota Fono, ina ia aua ne i toe atagia faapea e le i silafia e se sui usufono le polokalame o tatou Aso Fono, aemaise o tatou de-briefing ma fuafuaga a le tatou Ofisa. O le faasilasilaga lea ma le faaaloalo i le paia o le tatou Maota i lenei taeao ina ia matua nofoilo le amataga o tatou polokalame i le masina muamua lenei, seia faaiu... O Ianuari lea na taua e le Sui Fofoga Fetalai, o Ianuari 2015. O le faasaoga lena ua tuuina atu, o le aso 20 Ianuari 2015.

**TULAFONO TAU FAAOFI O LE FAATATAUINA O TUPE  
FAAOPOPO (NU.1) 2013/2014 – felafolafoaiga faaauau i luga o le  
faitauga faalua – Aso 2**

**FOFOGA FETALAI:** E tolopo a tatou felafolafoaiga i le aso ananafi ua maea ona saunoa le sui usufono mo le itumalo faaalaalafaga o Alataua Sisifo. Ia, ma o lea ua avanoa ai le tatou Maota mo se sui usufono fou e saunoa i lenei taeao aua le tatou Tala Faatatau Faaopopo o le Tupe.

Ia, tulai maia o lea ua tulai mai le sui usufono mo Gagaemauga Nu.2, ua avanoa le Maota mo le saunoaga.

**Tofa LEVAOPOLO TALATONU (Gagaemauga Nu.2):** Faafetai i lau Afioga i le Fofoga Fetalai, ua maua foi so matou avanoa e tulai atu ai ma le agaga faaaloalo e solitulafono le paia o lenei Maota e fia faaali foi se lagona vaivai o lenei itumalo.

Ou te talitonu o lea ua maea ona e seu le lupe o le masina pupula i lau faausugasega i lenei taeao e sula ai foi le alofa ma le agalelei o lo tatou Tama Silisili Ese ona ua tatou maua le soifua laulelei ma le lagimama i lenei taeao. Ua maea foi ona e utupupuina fulu o le segaula i tulaga faalupe ma tulaga matietie o le tatou atunuu i ona vaega e fia. Ona matou manatu lea, ua atoa ai tupe o taulafoga, ma e le mafai foi ona matou faitauina, aua o paia lava ma mamalu ua maea ona pupue faalaa tapue, ua taoto foi a o se alaoo.

A o le aso ma le faamoemoe lau Afioga i le Fofoga Fetalai, e le umi foi sa matou tala. E talitonu o lenei Tala Faatatau Autu o le Tupe, e pei na o ni nai faaopoopoga laiti i le tatou Tala Autu ia Iuni o le tausaga na sei mavae atu nei. A o le tulaga foi ua maitauina, o foliga masani lava ia o le faataotoga o Tala o Tupe mai le 40 tausaga talu ai. E mafai foi ona toe foliga faapena isi Tala o Tupe i le isi 40 tausaga o lumanai. Lau Afioga i le Fofoga Fetalai, o faataotoga masani lava, e pei lava o le series foi lea a le...

**FOFOGA FETALAI:** Malie le sui usufono o saunoa, sei tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi (Palemia):** Lau Afioga i le Fofoga Fetalai, e le mafai ona ou

tuuloa mea o saunoaga faauigalua aemaise mai se sui usufono ua manatu o lea amata ona agai i le tau matuaina. O lea ou te tau maitau nei ua faatolu ona usuia le Fono o tatou Tala o le Tupe, talu mai le tausaga e 1962 ina ia agai tonu lava le Tala o le Tupe agai i mea tau performances. E ala ona ou tau atua le mea lea, ona aua le aumai le fiapoto i totonu o faatalanoga o le Tala o le Tupe ona faaigoa lea pe faalupe e atagia ai le mea o le taumamaina o galuega fuafua a le tatou Malo. E faatolu ona fesui le format ina ia agai ina ia atagia mea ia o lo o faataua ma agai i ai le tatou Malo. E ogatasi lelei la mea ia o lo o faia e tatou ina ia atagia ai le greater transparency and accountability o a tatou Tala o le Tupe ma mea o lo o faia e Malo mai fafo i fafo ma Faalapotopotoga i fafo. O le ala foi la lena o lea e ala ai ona aloaia le faatinoga o le Tala o le Tupe ma fesoasoani o lo o maua mai fafo, lea e mafua ai foi ona liliu atoa le \$22miliona mai le ADB ona o mea ia tatou te faia.

Ua ala ona ou tu atu ona o le taumamaina o galuega nei e fai e ni tagata e le malamalama i le mafuaaga o le faatulagaga o le Tala o le Tupe ma o lea foi la, o ata ia o le transparency ma le accountability lea o lo o faatino e Samoa lea e maua ai le lagolago a Malo mai fafo, e aumaia ai tupe nei e faatino ai le tatou galuega ma tuu i ai ai no gatupe a le Malo i le \$22miliona. E le o se tupe laitiiti le tupe lena lea ua faaitiitia ai. E taua tele mea ia tatou te talanoa i ai. O le faataua ona o lea tou te vaavaai i le anoano o mea o vale faataitai nei e fai ma faitio e aofia ai ma papalagi, o mea o vale faataitai, lea e fai ma faatino ma fai a latou tusitusiga i le Observer ma taumamaina ai atinae ia e fai a le Malo lenei, ae mafua mai i ituaiga lauga ia e fai i totonu o le Maota.

Lau Afioga i le Fofoga Fetalai, o le ala lena o lea ou te tulai atu ai, a tu ae i luga le sui usufono e fai lana lauga, lauga sao i le Tala o le Tupe ae aua le faali maia le faafiapoto.

**FOFOGA FETALAI:** Faafetai i lau Afioga i le Palemia. Sei tulai mai le sui usufono e faaauau le saunoaga.

**Tofa LEVAOPOLO TALATONU:** Faafetai atu i le faauilavea a le Afioga i le Palemia. O le mea sili la lea ua ou iloa i le taeao lenei, e i ai format eseese o lo o faafoefoe ai e le tatou Malo Tala Faatatau Faaopoopo o le Tupe, ae tasi lava le format na ou iloa i mea ia o Tala Faatatau Faaopoopo o le Tupe, ua vavevave le Afioga i le Palemia ae lei uma atu lau faamatalaga. E tasi lava le format po o le auga ma le faamoemoe i lau iloa i le Tala Faatatau Faaopoopo o le Tupe...

**FOFOGA FETALAI:** Malie le sui usufono o lo o saunoa sei tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, e ala ona ou tutulai atu, ona o lea e manino lava le saunoaga a le sui usufono. Na amata mai lava o tau mai o foliga lava nei i le 50 talu ai, ma o foliga foi nei e i ai i le 50 tausaga o lumanai ai. O lea la ou te tau atu e sese, e matua sese atoa lava le mea lea, ma le isi mea e fou mai foi le sui usufono e lei leva na i ai i totonu i i, a o suiga uma ia o suiga e fai ma aumai i totonu o le Palemene e pasia atu ai.

Lau Afioga i le Fofoga Fetalai, o le ala lena o lea ou te tulai atu ai aemaise outou nei e fou mai i le Palemene se i tau fai ma tau fuafua a outou saunoaga

e leaga o lea e i ai sui usufono o lo o i inei ua fai sina leva ma o lo o maitau uma lava mai le 30 po o le 40 tausaga talu ai e pei o saunoaga na fai ananafi. O le ala lea e fai ai ma ou tutu atu sei tau faasao a outou saunoaga leaga e fai ma avatu tala ave i fafo. Vaai i le Observer lele, ua fiu e fai ni tala e faaleaga i le Malo ae le mafai ona sao leaga e malamalama lelei i ai Faalapotopotoga ma Malo mai fafo o lo o i ai o latou Ofisa i inei e fai ma latou avea nei mataupu e vaavaai ai o latou tagata popoto faapitoa, o le ala lena e avatu ai lapis i inei e le talia e Malo i fafo, ae leaga o lea e faitau i ai le toatele ma sese ma le anoano o tagata e le o malamalama i mea ia tatou te talanoa ai, a o lena ua leva ona avatu ia te outou le Tulafono Tau Faaofi o le Tala Faatatau o Tupe (Nu. 1) 2013/2014 ina ia outou faitau lelei ma ia malamalama i ai.

**FOFOGA FETALAI:** Tulai mai le sui usufono e faaauau le saunoaga.

**Tofa LEVAOPOLO TALATONU:** Faafetai i lau Afioga i le Fofoga Fetalai, leai o le upu moni lava lea ou te tau ina atu, o lea faatoa ou malamalama nei e i ai le fomat e ese mai le mea lea ou te iloa. E faamalulu atu ona pau lava le mea lea ou te iloa o so o se Tala o le Tupe, o le auga ma le faamoemoe o le faamatuu atu o tupe i Matagaluega taitasi a le atunuu, e faia i ai a latou fuafuaga ua uma ona faataotooto ae talisoa lo tatou atunuu e faatalitali po o a ni auga ma ni faaiuga o foliga o ni a latou taumafaiga.

Lau Afioga i le Fofoga Fetalai, i lau maitau mai i le faagasologa o le tatou Faigamalo mai le tele o tausaga ua mavae, e talitonu lava e leai se Faigamalo e alo tamala i le faataotootoga o a latou fuafuaga, ina ia tulimatai se tamaoaiaga manuia o le tatou atunuu. Atonu foi o le ala foi lea e le tau fesiligia ai le tulaga ua foliga i ai lo tatou atunuu i lenei vaitau, ma o le upu moni lau Afioga i le Fofoga Fetalai, e le faigofie le papale ma le folau, ae avatu le faamalo i lau Afioga i le Minisita o Tupe, lau Afioga i le Palemia ma lena Itu, i le faafoega o le tatou Malo e le faigofie. Faamalo le faatoatoa, faamalo foi le onosai, o a foi ni faafitauli e satia ai a tatou taumafaiga o le soifuaga lava e faapena, e tuliloa e ni faafitauli ni faamoemoega lelei. E taumulimuli foi ni lagona o le tagata i ni mea lelei tatou te taumafai e fai, a o le tatou galuega o le mau o le toovae ma tatou mataitu, ona fai lea i ai o ni a tatou faaiuga talafeagai e taofiofia ai manu vale foi nei e felelei mai ma toto mai i totonu o a tatou fuafuaga.

Lau Afioga i le Fofoga Fetalai, e faalogologo lava ma le totoa i le aso ananafi i le lau sasaaina foi o le tofa ma le faautaga, e i ai foi le talitonuga ua lava ta oso ni finagalo o le Afioga i le Palemia ma lana Kapeneta, i le faautaga foi ma le tofa a nisi o sui usufono sa tumua i Malae i le aso ananafi. E maitauina foi le tele ma anoanoai o nisi o a tatou fuafuaga faataotooto e tulimatai ai se tamaoaiaga lelei o le tatou atunuu i le lumanai, peitai e i ai lagona popole o lenei Itumalo lau Afioga i le Fofoga Fetalai, ina ne i maimau a tatou fuafuaga ma a tatou taumafaiga ona lamatia i faafitauli masani. O se vaega tonu foi lea e ala atu ai sa matou fautuaga ona o se tulaga o lo o matou maitauina pea.

Lau Afioga i le Fofoga Fetalai, o le fili numera tasi o a tatou fuafuaga mamao o le faiaga ma le faamaliuli. E moni lava e ao ma tataua ona lava le taimi e mataituina ai so o se fuafuaga a le Malo, ae tautuana ma tatou ua fai lava sina vave o suiga faatekonolosi ma metotia o lo o faaogaina e le atunuu e uunai ai lo latou tamaoaiaga, ma e le tataua ona tatou faiaga i lea vaega. A o le

fili o a tatou faiga faavae lau Afioga i le Fofoga Fetalai, o a tatou faaiuga fai atoa ai ma le faatinoga. O le fili foi lea e mafua ai ona faaletonu le tele o a tatou atinae ma satia i le lagona faaletagata ni fuafuaga lelei tatou te faia ma iu ai lava ina tulai mai ni faafitauli.

E fai ma tala faataitai ia te au le tulaga i le tala ia Atamu ma Eva, o le faigofie ia o lena tala, a o se tala e aumai ai se feau taua. E manatua foi sa amata i fuafuaga ma polokalame faataotooto a lo tatou Atua i le faia o le faatoaga ona tuu lea i ai o Atamu ma Eva e fai ai a la faaiuga e tulimatai ai so la manuia ma se tamaoiga manuia o Atamu ma Eva, peitai ua le usitaia ma ua faasala e le Atua ona tau tuuai loa lea. Ua faapea atu Atamu “Se Eva, o oe lea ma lau faaiuga ua faasala ai taua”. Ae faapea mai foi Eva latou, e leai, o le gata lea na faaosoina au e tofo i le susua ma le suamalie o le fua o le laau. Ona faapea atu lea o Atamu “ua a nei la?, o lena ua lafi le gata ae utia taua, ae ana tuu lou manao tele ma lou faamalie gata meamanu ta te le oo i lenei faasalaga ua tuuina mai e lo ta Atua. Ona faapea foi lea o Eva “Malie ia oe le toeaina ua sese lau faaiuga ona ua manao i ai lou loto, a faapefea le susua manaia”. Ona faapea foi lea o Atamau, “e sao foi oe, o lea foi ua ou tofo atu au ia e manaia, ae pau o lea ua ave le sese o lau faaiuga ma mea ua sese atu ai ma lau faaiuga, ona o lou alu alu a lea e sau ma lenei mea ou te aia” Ona faapea lea o Eva, “leai, vaai oe Atamu, sa tatau lava ona toe fetuunai lou mafaufau i sau faaiuga talafeagai e fai. Sa tatau ona e tilotilo muamua ma fai lau faaiuga po o se mea e ono aina pe leai, po o se mea e oona. Ona faapea mai lea o Eva, ia ta o sese ai loa faapea.

Lau Afioga i le Fofoga Fetalai, o le principal lena i lau maitau i le faatauaina o faaiuga tatou te faia, aua e mafai ona faaletonu a tatou faaiuga i lagona faaletagata. O lona uiga lau Afioga i le Fofoga Fetalai, a oo loa ina tutaia pe tuuaia a tatou fuafuaga ma a tatou faamoemoega lelei, ona tatou fesili loa lea, pe le o tatou ea ua faatamala ia tatou faaiuga sa fai? Pe le o tatou ea ua le faamaoni i le faatinoga o a tatou faaiuga? Ae aisea ua umi ai ona tatou faapea? Ae faamata o le a se faiga e foia ai? O fesili na lau Afioga i le Fofoga Fetalai, matou te manatu e ao ma tatau ona ave i ai la tatou faamuamua. Aua afai tatou te le ave le faamuamua i Fesili nei, e faailoga fesili foi a tatou taumafaiga mo a taeao ma le lumanai. O lo matou talitonuga lau Afioga i le Fofoga Fetalai, e le o fuafuaga faataotooto le faafitauli tele, a o aga a le tagata ma le faatinoga o lana faaiuga o le faafitauli lena. O lape tonu foi nei ua leva ona feagai ma i tatou e oo mai lava i le taimi lenei o lo o tatou faafeagai ai pea ma nei faafitauli. E pei lava ona ou fai atu i lau Afioga i le Fofoga Fetalai....

**FOFOGA FETALAI:** Malie le sui usufono o lo o saunoa, sei tuu atu lava le avanoa i le Afioga i le Palemia.

**Afioga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, ua leva lava ona tau faalogologo po o fea le mea lea e agai i ai ona o le tala o le Tusi Paia lea tatou te faalogologo atu i ai. O le tala ua faafagogo tagiao e leai lava se tamaitiiti na te le iloa, ae ese mamao lava le tala lena ese mea nei tatou te faia. O le tala lena e agai i le tuinanau i mea valea, o le sao lena o le mea na pau ai Atamu ma Eva o le tuinanau i mea valea, ae sau le faaiuga o le tala, e le o le fuafuaga tuutuu mamao a o le faatinoga. E pei o le mea lena lea ou te tau faalogo atu i

ai. Lau Afioga o lona uiga e le o faatauaina e le sui usufono fuafuaga tuutuu mamao, e le mafai ona alu pogisa, o lona uiga o lo o lagolago e le sui usufono le o pogisa ma ia aua ne i faia ni fuafuaga tuutuu mamao. E tatou te faitau eseese, o fuafuaga tuutuu mamao e taua tele, e fuafua tataui i ai a tatou mea e fai. E leai foi ni Malo e fia foi mai ni a latou fesoasoani pe a le vaai muamua i fuafuaga tuutuu mamao ia e fuafua mamao i ai a tatou mea e fai ma e tele lava faafitauli e feagai ma i tatou i le faatinoga. O faafitauli na o lea tatou te vaai i ai ma fofu, e le faapea e le o fofu ina, o le mea aupito sili ona faaletonu, o le faaletonu mai o le faatinoga ae tuu pea e alu, leai o le mea lenei a tatou lea e fai, o lea foi e faatino i totonu o le Maota lenei. O le ala lenei o lea e aumai ai Lipoti ona tilotilo lea i ai o le Komiti ma aumai ai le latou fautuaga.

Lau Afioga i le Fofoga Fetalai, e ese le mea lea e sau ai le sui usufono ma lana tala faa-fagogo ua fai sina umi ao le tulaga lenei. E le faapea o le a le faaletauaina fuafuaga tuutuu mamao, e te le mafai ona e alu pogisa e fai se mea, e te alu ma le malamalama ae faatoa e malamalama ina ua faataoto muamua taiala e faavae ai au gaioiga o le a fai.

**FOFOGA FETALAI:** Ou te fautuaina le sui usufono o lea ua faalua ona taumafai atu le Malo e faamanino lou finagalo. O lea na faamanino muamua faiga faavae o lo o lima taitaiina ai le Tala Faatatau o le Tupe (Nu. 1) 2013/2014, a o lea foi ua toe faamanino atu le Tala Tusi Paia, o Atamu ae le o le Kamu le igoa o le tagata. O Atamu ae le o Kamu. O lea o le a ou faamanino atu, e eseese mamao lau faauigaina ma le taumafai mai o le Malo e faamalamalama le faaogaina ma le faatauaina o faiga faavae o lo o limataitaiina ai a tatou polokalame a o le faatinoga o lea ua manino e uma ona aumai lea o Lipoti a Komiti e faamanino ma faamalamalama ma tatou foia ai nisi o tuatuaanoa e tulai mai. Ou te fautuaina le sui usufono ina ia see ese mai ma le mataupu lea ia Atamu ma Eva ae agai i se isi Aposetolo.

**Tofa LEVAOPOLO TALATONU:** Lau Afioga i le Fofoga Fetalai leai e sao oe o Akamu ae na inlove loa Eva – Kamu loa ae aveese le “A”.

**FOFOGA FETALAI:** Le sui usufono mo Gagaemauga Nu. 2, e le sau faatagata se malaia o se tagata e nofo ma sui upu o le Tusi Paia.

**Tofa LEVAOPOLO TALATONU:** Lau Afioga i le Fofoga Fetalai, e pei lava ona matou fai atu, e matou te manumanu tele i fuafuaga a le tatou Malo, aua e le faigofie, e le taugofie foi. O lona uiga, o le taimi o le tatou tiga faatasi, tatou galulue faatasi ae sui tonu lava le mata o le niu, leaga ua tele foi tulaga e aliali mai. O la matou fautuaga, o le faasaosao muamua o ni vaega, ona tatou toe amata ai lea o se amataga fou o lenei tausaga, ae soia ia tatou te loua le ulu mamao, soia tatou te tilo masae. O le upu moni lenei, ma soia tatou te tau le pua ma lafo, e lafo atu, lafo mai, lafo atu, lafo mai, ma soia foi tatou te sisi atu mamate e pei o le fetalaiga a le tamaloa Lepa ae ave atoa le tatou faamamafa i le faatauaina o tatou faaiuga.

Lau Afioga i le Fofoga Fetalai, e le na foi ma le laina, e le na o tatou foi o lo o faia lenei mea, o lo o faapena foi ona tilo masae totonu i le pulega a alii ma faipule latou o lo o taitaia aiga ma nuu. E le gata foi i lenei, ae o lo o faapena foi ona fai lafoga pua ia i totonu o pulega a Ekalesia ma afaina ai foi aiga, afaina le tamaoiga atoa o le atunuu. O lona uiga lau Afioga i le Fofoga

Fetalai, e le na o le Faigamalo e faia faaiuga a lo tatou Malo e tulimatai ai se tamaoaiaga lelei o le tatou atunuu. E le na o lau Afioga foi i le Fofoga Fetalai ma le tatou Palemene e faia faaiuga ae o tatou uma lava e oo ia tatou fanau.

I lau la maitau lau Afioga i le Fofoga Fetalai, oi fale lava le matega, o tatou uma lava e palasi i ai se uluulu o se laau ua faaletonu pe a tatou le mataala i mea o lo o fai nei. O le matou fautuaga lau Afioga i le Fofoga Fetalai e faapea, e pei ona ou fai atu muamua, e tele tatou faiga faavae ua faataoto, e i ai foi la le talitonuga e manaomia le vave ona faatino, e manaomia le active uma o tatou i le faatinoga, aua o le vave o le gaoioi, ona faapena foi lea ona siitia se tulaga tatou te ausia i lo tatou tamaoaiaga. O lau lui lea o le a fai atu lau Afioga i le Fofoga Fetalai, o lea ua 50+ ma ona tupu tausaga tatou te lei ausia lava se \$2pilonia o le tatou tamaoaiaga. E pei lava o sau faamatalaga i le taimi ua sola, tasi lea o fili e faavaatuia ai le sosolo lelei o a tatou taumafaiga, o le faiga. Ae mafua le faiga lau Afioga i le Fofoga Fetalai i sou talitonuga, e toso i lagona faaletagata, lagona o le tagata lava ia, ae tuu faiga faavae ma lagona o le Tulafono. Ia o le faataitaiga la lau Afioga i le Fofoga Fetalai; o lea e maua nei le tele o tupe faameaalofa mai le tele o Faalapotopotoga ma isi atunuu e fai ai a tatou atinae, e agavaa uma i ai le tatou atunuu e fai ai a latou atinae. Ua ou maua ua toe faafoi le tele o tupe. O i ina lea e faaali manino ai le faiga lea ou te fai atu ai.

**FOFOGA FETALAI:** Malie le sui usufono o saunoa leaga o lea ua taua tonu le Matagaluega e fitoitonu ma le Minisita o Tupe, tulai mai lau Afioga i le Minisita o Tupe.

**Afioga Hon Faumuina Tiatia Faaolatane Liuga (Minisita o Tupe):** Lau Afioga i le Fofoga Fetalai, ou te tulai atu e faasao le saunoaga a le sui usufono. E tasi lava le taimi na faafoi ai le \$250,000, o le taimi na le ausia ai targets e faamama ai le suavai e le Pulega o le Suavai, ona ua pasi le taimi. E le faapea ona ua tuai le faiga o a tatou gaoioiga e sui ai le faamamaina o le suavai mo le suavai taumafa ua faamamaina, na pau lena, ae leai ni tupe o toe faafoia. O tupe uma lava o lea e aumai e faaagaaga mo polokalame tai lima tausaga, tai sefulu tausaga, e faasolosolo lava ona aumai ma faaaoga, ma o lo o faaaoga tatau foi. Ona o lea ua taua e le sui usufono mamalu le tulaga o le GDP, e \$6 e invest ona maua ai lea o le \$1 e tasi, e faaopoopo i totonu o le GDP. O le mafuaaga tonu lena o lea tatou te talanoa ai, ina ia faaaoga a tatou resources e develop ai le tamaoaiaga o Samoa, e auala mai i a tatou faatoaga ma mea e maua i o tatou laufanua. Ma lou faaaloalo lava.

**FOFOGA FETALAI:** Malo faafetai fesoasoani mai i le faamalamalamaga a lau Afioga i le Minisita o Tupe. Tulai mai le sui usufono mamalu.

**Tofa LEVAOPOLO TALATONU:** Faafetai i lau Afioga. O le isi vaega i le tulaga lava ia, e fai lava sina faigata tele o le tatou process i le tele o tatou atinae ia. E i ai le talitonuga e faigofie le process, ae ou te talitonu lava e faafaigata e tagata faigaluega le process. Ou te molimau atu, toetiiti lava leai se Matagaluega a e agai i ai i se talosaga poo se mataupu o sau atinae, e fai fai lava e toe foi mai aua e fiu e tatali, tatali, tatali e leai se mea pe lua vaiaso, a o se mea faigofie lava. Ae sei masau atu ia la se papalagi i Ofisa ia poo a outou Afioga i Minisita, o le vave ia o le faatinoga. O le eseese lena tau



lava ina matou tuualalo atu ia outou Afioga i Minisita, sei silasila ane i le vaega lea.

**FOFOGA FETALAI:** Malie le sui usufono, sei avatu le avanoa i le Afioga i le Minisita o Tupe.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, ona o lea ua saunoa le sui usufono i le tulaga pei ua tuuaia ai e faailoga tagata le aufaigaluega. Ou te faamalamalama atu ma le agaga faaaloalo i le sui usufono, e le faapena le faatinoga o galuega. O lo o i ai foi taiala e pei ona silafia e le sui usufono mamalu ma le mamalu o lenei Maota, o lo o faagasolo ai, ae le o laaloa ai le silasila a le Malo ina ia faafaigofie atili. O mea na o lea e aumai ai a tatou Tulafono ma Tulafono Faatonutonu ia faafaigofie ai le tulaga tonu lea e saunoa i ai le sui usufono. Ma lou faaaloalo lava.

**FOFOGA FETALAI:** Mo le faasaoina o lou taimi le sui usufono mo Gagaemauga Nu.2, sei tuu atu le avanoa i le Afioga i le Palemia, tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga, e manaia tele le mea lea e laga e le sui usufono i le tulaga lea pei o se lui i le aufaigaluega. O mea na tatou te naunau uma i ai, o i latou e manao e i ai ni mea e manao i ai, ina ia vave ona tali manao, ma o le faatonuga foi lena o lea e le o tuua. E taua tele le mataupu lea. O lea foi ou te faatauaina, masalo o lou ofisa le isi ofisa pe ou te alu i le fale ua tea le 6, ona o le anoano o tagata e o atu e vaai au, ona tau tuutuu atu lea i tua o le taimi ou te alu ai, ae oo foi i le fale, e ta le 2 i vaveao o isi aso ua fafagu au i mataupu foi a tagata e o atu ai.

Ou te manatua foi i le isi tausaga, o le tausaga e 1976 a o ou vaai a le Ofisa lea o le Tausi Mavaega, e ta le 3 i le vaveao ae tu atu le isi mafine ua tagi atu, ua fetauai tagata o le latou aiga i le latou esetete. E ala ona ou faia le tala lea, o le faanaunautaga lea e taua tele le mea lea e laga mai e le sui usufono i le aufaigaluega, o lea foi e faafogafoga mai i latou o lo o avea ma Ofisa Sili o Pulega i Matagaluega, ma o le mataupu foi lea e laga soo lava i taimi e fai ai fonotaga a Matagaluega. Ou te iloa uma lava tulaga ia aua e le faamalieina loa le tagata i le Matagaluega i le Ofisa Sili o Pulega poo le Minisita, oo atu loa ia te au, o le ala la lena ou te iloa ai. Ae taua le faamanatu, ae eseese foi la mea. E i ai le mataupu e alu atu le isi tagata faatino loa i le taimi lea. Ae i ai isi mataupu e alu atu loa le tagata, e fai la si umi, ae fai i ai... a alu atu le papalagi ia na ona talanoa atu lava... ua outou vaai i papalagi e toalima ia na omai ananafi lea sa outou tilotilo uma atu lava i ai, na aumai le latou talosaga e fia feiloai mai ia te au. Ia ona ou alu atu loa lea ae faataatia mai le latou computer ou te manao ia ou tilotilo i le latou mataupu. Ou fai atu, 'leai, o le a le tou mataupu, tau mai?' Fai mai, 'matou te mananao e fia maua se avanoa e faatu ai le matou kamupani iinei i Samoa e vili mai ai le eletise i le susunu o lapisi, sei tulou, o otaota mai faleese e mafai ona faaaoga e latou e sunui i i ae vili mai ai le eletise.' Ou fai atu, 'o le a la le mea na outou omai ai?' 'Matou te omai e fia ta atu i i, sei e silasila mai ae sei faamatala atu.' Ona ou fai atu loa lea, 'O au nei, ua ou fiu e talanoa i tagata, na ona omai lava talanoa, talanoa,

talanoa o, leai ni tupe, talanoa, talanoa, talanoa, fai mai o le a o e fai ae le faia. E leai se mea e tasi o na mea ou te le iloa, na o le maumau ai o lou taimi toe faamatala mai. O le mea lea ou te manao i ai, a fai ni a outou pisinisi aumai a outou talosaga avatu loa le ioega o loa e fai. O lona na outou silasila atu i ai ananafi, na o le lua lava minute uma le latou mataupu. O lea e mananao e atoa lou itula o ou faalogologo i le lapisi lea e aumai ia te au, ua leva lava ona ou iloa e leai se mea o nei mea ou te lei faitau ai, ae na pau lava le mea lea ou te manao i ai, action, faatino. E faapena foi la, e eseese tagata, ne i te i ua outou vaai atu i papalagi ia faapea, e omai loa papalagi vave. E le faapena. Afai e sau le papalagi i se mea faigofie faapena, e vave lava ona fai poo le Samoa. Ae a sau loa le Samoa, 'Ou te manao faamolemole lau Afioga i le Palemia, ou te manao e tala uma mai lava lau NPF.' 'O le a lou matua?' O lea faatoa 45. A o le a le mea e tala ai? O le oti o lou tama. E le mafai ona tala i tua na mea o la e i ai Tulafono. Poo le faapea mai, ou te manao e pei o le tala a le isi toaina, 'Na ou sau ia te oe.' O le a? Ou te manao e faatu sau faletaavale. Ma se a? Ma se pisinisi. Ou te vaai atu alii e te paepae ai sa e i Niu Sila. Fai mai, o au lea faatoa sau. O fea la e fai ai lou faamoemoe? O lea e fia fai i Salelologa? A o le a la le mea na e sau ai? Na ou sau pe mafai. Ou fai atu, e faigofie ona ave se tou talosaga e fai ai se tou laisene. Ona o loa lea fai. Oi se faafetai, ua leva ona ou moemiti i ai. Ia malie ona o lea e faasolo mai. Ou fai atu, o le a? E i ai sina au talosaga laitiiti. Ou fai atu, o le a? Fai mai, e i ai sina au \$10 sei ou pasese ai i Savaii? E i ai la ituaiga mea faapea e vaai atu i ai le afaigaluega e fai si umi toe lavelave ona umi ai lea ona faatali. Ae a le malamalama ai la tagata i le lavelave lea e taumafai le afaigaluega e tali ma le isi tagata lea na sau loa alu, ia o ituaiga lauga la ia e tupu mai ai, a o la e faatino lava galuega a le afaigaluega. Ae pei lava ona ou fai atu lau Afioga i le Fofoga Fetalai, ou te fiafia tele i le vaega lea. O lea la faatoa amata ona lelei le lauga a le sui usufono, a o isi mea muamua na amata mai ai, e faalelelei.

Lau Afioga i le Fofoga Fetalai, o le faasaoga lona.

**FOFOGA FETALAI:** Malo. Tulai mai le sui usufono toe lima ou minute.

**Tofa LEVAOPOLO TALATONU:** Lau Afioga i le Fofoga Fetalai, o lea faatoa maua tonu mai lava e le Palemia le theme atoa o le lauga, o le action, action le mea lea matou te mananao i ai, ma o lona foi ua uma ona ia faaauuina lau lauga. Ae ou te iloa toe tasi lava se vaega lea aua o lea ua ma lauga toalua ma le Afioga i le Palemia.

Na pau lava si fautuaga lea, matou te mau eseese ma nisi o sui usufono mamalu o ou uso a sui usufono i le tulaga lea o le faatinoina o le aganuu i mea ia a le tatou Malo, i le faafoega o le tatou Malo. I lou manatu lau Afioga i le Fofoga Fetalai, tasi lea vaega o lo o faapunafanau ai le tele o faafitauli, o le nini faatasi o tatou faiga faavae faatemokarasi ma le tatou aganuu ma le faakerisiano. O le uiga o lau faamatalaga lau Afioga i le Fofoga Fetalai, e tanumia e le avafatafata se Tulafono faatemokarasi ua soli. E fofu alamea i le loto faamagalalo se faiga faavae ua le usitaia. O le uiga tonu lava lona o lau faamatalaga. Ona a lea? Ona faifai ai lava lea o le faale kea kea foi lea, ae faamoemoe i le aganuu ma le faakerisiano e punitu ai le tafili saunoa. O le uiga sao lava lona o lau faamatalaga. O le mea lona e faamalulu atu ai i nai ou uso a sui usufono, e le auai sou manatu i le mea lea o le o faatasi o tulaga ia.

**FOFOGA FETALAI:** Malie le sui usufono ona o lea sa taua e le sui usufono lea le uiga tonu na saunoa i ai e uiga i lana mataupu. Saunoa mai se tasi o sui usufono mo le Au Palota Taitoatasi, Afioga Maualaivao Pat Ah Him.

**Afioga Maualaivao Pat Ah Him (Palota Taitoatasi):** Lau Afioga i le Fofoga Fetalai, faafetai i lenei foi taeao matagofie, ou te talitonu e faapena le agaga tatou te faasoa i mataupu o lo o talanoaina i totonu o le Maota nei. O le aso ananafi sa ou tautala ai i lea vaega e uiga i le aganuu faapea foi Tulafono e faatonutonu ai lo tatou Atunuu. O le agaga moni o le faamatalaga, aua ne i tanumia le Tulafono i le aganuu a o le faaaloalo ma le alofa o le mea taua lena, ae aua aua ne i tanumia le Tulafono i le aganuu a Samoa.

**FOFOGA FETALAI:** Tulai mai le sui usufono mo Faasaleleaga Nu. 4.

**Afioga Peseta Vaifou Tevaga (Faasaleleaga Nu. 4):** Faafetai mo le avanoa i lenei taeao lau Afioga i le Fofoga Fetalai, e pei foi ona avatu e le sui usufono mamalu e moni lava, leaga o le tasi lenei mataupu na matua iloga ona ou lauga atu ai i le aso ananafi. E pei ona saunoa le sui usufono mo Gagaemauga Nu. 2, ina ia aua ne i nini i mea nei o le aganuu ma le Tulafono e eseese atunuu i fafo ma Samoa. O Samoa e i ai lana aganuu ma lana faaaloalo, o tu ma ana aga. O le uiga o sou manatu na avatu ananafi e fai pea le Tulafono ae a maua le tagata ua na solia le Tulafono ua tatau lava ona faatino le solitulafono, a o aga ma tulaga e fai ai, o mea ia na ou avatua ina ia faafofoga lelei lava le malu o le Malo e ao ona saunoa mamalu leaga o isi tagata o tagata taualoa ma Taitai o Ekalesia, Taitai o Malo, o tagata maualuluga mai fafo e faapena le aganuu a Samoa o lea e tau avatu, e o lua lava le aganuu ma le Tulafono ae le faapea o le a sili le aganuu ae tuu le Tulafono.

Ma lou faaaloalo lava lau Afioga i le Fofoga Fetalai.

**FOFOGA FETALAI:** O lea ua maua le finagalo o le sui usufono, sei tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, e i ai lava si vailaina lea sa saunoa i ai le sui usufono na faatoa faamaui atu lona tootoo. E i ai lava le aganuu a Samoa ua tele lava ina leai po o ua matua leai lava le tele o aganuu a isi atunuu o le Pasefika. O le taua ia o le vai laina lea, e taua i le tulaga lenei lau Afioga i le Fofoga Fetalai, e i ai le Fono na omai ai Minisita fai i inei e le i mamao tele atu. Ona omai lea o Minisita ia te au ma matou talanoa, o le Fiti, e toatolu mai Micronesia, Solomona, Vanuatu e i ai ma le isi i le Itu Matu. Ona matou talanoa lea ma fai mai, “E te iloa se ua lelei foi faatoa amata taeao le Fono, ua soo uma lava Upolu na matou feoi ai ananafi, sole se matua maoae le mea lea matou te vaai i ai i lo outou atunuu. Ou fai atu o le a? E ese le manaia o le mama. Ona ou fai lea i ai, “o galuega na a alii ma faipule e lagolago i taumafaiga a faletua ma tausii, o le mea lena e ala ai ona mama lo matou atunuu o lea faaoga a matou tu ma a matou aga i fanua. Ona fai mai lea o i latou uma lava, “o le mea la lea ua matou le toe mafaia leaga ua le o toe i ai ni a matou tu ma aganuu e faapenei le maopoopo.

Lau Afioga i le Fofoga Fetalai, e taua le mea lea e aumai e le sui usufono, o le tu ma a tatou aganuu ma a tatou aga faa-Kerisiano ma le Tulafono. A vaai foi i ai i le pepa lea ou te tilotilo i ai, talofa e i nei tina i le o aumai o latou ata, o le toatele o i latou e omai mai Vaiusu, lea e aumai i i, a o le mea lea e feita i lou fai atu o tofiga uma lava nei tatou te umia o tofiga mai le Atua. O le mea lena o lea e lauga soo e faifeau, po o oe o le fai kapisu, po o oe o le faipule po o ai, o tofiga mai le Atua, ae talofa e, fai mai e sese tele ia mea o lou tau o le suafa o le Atua. O Afioga a Iesu “O lē ma e talai Au i luma o tagata, ou te ma foi e talai i luma o le Atua”. Lau Afioga i le Fofoga Fetalai, o lea foi ou te tau vaai atu e tau agai i ai le sui usufono lea e agai mai nei, ae lelei ona ou faapea atu, i lalo o le Tulafono e taua lava le tala i le nuu o Sili, ua ou te’i ua omai i se auala maualalo, na omai e aumai le latou faasifoga ina ua latou vaai i se atalii o lafo ni upu lafo vale i le Taitai o le Atunuu e aofia uma ai lava Samoa, o le Faaululuuluga o le Malo o Samoa. Aua o upu e lafo i le Taitai o Samoa o lea e lafo i tagata uma lava o Samoa, lafo i Lana Afioga Mamalu o le Malo o Samoa, lafo ia te outou, o outou o tulaga tofi uma o le Malo. O le a la le mea a oe e fai, tatou te faataitai uma lava i le mea na aoa mai ai i tatou, o le atunuu Kerisiano o le faamagalalo, ae i ai lava aga faale-Tulafono. Ua ou talanoa atu nei i le Matagaluega o Leoleo ae fai mai e i ai foi a matou Tulafono, o lea ua momoli le atalii, e ave lava i luma i o, ave uma i ai mea uma, ave i ai ma le faasifoga e ave i ai i le Faamasino le aganuu lea ua fai. Ona a lea? O i ina la e fuafua ai e le Faamasinoga lana faaiuga, o le a la le uiga o ia mea, faamagalalo i luga o le tulaga faatapuaiga faa-Kerisiano. Lua, o lea ua fai le aganuu. Tolu, o le la ua aloaia le Tulafono a o le iuga o le Tulafono e fuafua i luga o le aganuu lea ua fai.

Ua faafia ona tatou faalogologo o le tama lea sa tataua ona lima tausaga e falepuipui ai, ae talu ai o lea ua faasifo le nuu ma ua oo mai foi le tautinoga a le Faifeau ma ua aloaia e le Faamasinoga ma o lea o le a lava le tasi le tausaga e ave i ai.

Lau Afioga i le Fofoga Fetalai o le tulaga lena, ae ou te le iloa po o a nei mea tatou te talanoa ai a o lea e faatino uma mea ia i le taimi e tasi. O le mea lea o le faalavelave lea e tupu ua tuu le Tala Faatatau o Tupe (Nu.1) 2013/2014 ae tatou o e talanoa i mea faale-faifeau. O le faalavelave o le toatele o outou nei ua fai a outou tofiga, se a outou o ea i o fai ai i o, ae a outou omai i inei fai le tatou Tala o le Tupe, o le a tauau ina umi ai ona talanoa le Tulafono Tau Faaofi o le Tala Faatatau o Tupe (Nu. 1) 2013/2014 ae o le a avea i inei e pei o se pulelaa ma lauga o le Aso Sa. Manuia le tatou Fono.

**FOFOGA FETALAI:** Malo, malie le sui usufono mamalu, sei tulai mai le Minisita mo Faamasinoga ma Pulega Tau Faamasinoga.

**Afioga Hon Fiamē Naomi Mataafa (Minisita mo Faamasinoga ma Pulega Tau Faamasinoga):** Sei fai se malologa a le sui usufono, ou te le fia tautala i Mataupu Silisili po o mataupu faale-Lotu, ae ou te fia tautala i le mataupu lea na saunoa i ai le sui i le Tulafono ma le aganuu. O le mea e fia faasao lau Afioga i le Fofoga Fetalai, e pei e foliga mai i le saunoaga a le sui usufono i lana upu lea e faapea mai e le aumaia le va fealoai ma mea e aveesea ai se solitulafono, e foliga mai o le aganuu o se mea leaga po o le faa-Samoa e sese. Lau Afioga i le Fofoga Fetalai, o le va fealoai, e tautala le va

fealoai i le va o tagata ma le teuteuina o le va lena. A o le faa-Samoa lava ma le sao e amiotonu foi le faa-Samoa, o lena tou te nonofo i totonu o nuu e fai ai le pule a alii ma faipule, tatou te iloa uma lava le mea sao ma le mea sese, a o le mea lea e tupu o amioga a tagata. E ilitata lou taofi lau Afioga i le Fofoga Fetalai, i ni lafoga e fai i totonu o lenei Maota, e foliga mai o le faa-Samoa ma le tatou aganuu o se mea e leaga, o le aganuu e fai mea sese, e le faapena le faa-Samoa.

**Tofa LEVAOPOLO TALATONU:** Lau Afioga i le Fofoga Fetalai, ua matuā sese i Sini le mea lea....

**FOFOGA FETALAI:** Malie le sui usufono mamalu se i faamaea mai le saunoaga a le Afioga i le Palemia. O lau lauga lea ua lagalaga ai finagalo o le Malo i le taumafai e tali atu, o lea e avatu ai le avanoa se i faapupula le mataupu leaga e le faigofie lenei mataupu. O le mataupu o lo o aafia ai sui usufono mamalu o le Maota aemaise le mea ua tulai mai e aoga tele, ua 50 tausaga talu ona tatou laa i le tupulaga fou latou te le malamalama i le mea lea e tau faapupula atu.

O lea ua manino le faamalamalamaga a le Afioga i le Palemia ma ua tulai mai le Afioga i le Minisita mo Faamasinoga ma le Pulega Tau Faamasinoga i le va faafeagai ai o le Faamasinoga, aganuu ma le Tulafono, tulai mai lau Afioga e faamaea mai lau faamalamalamaga.

**Afioga Hon Fiamē Naomi Mataafa:** O le mea muamua lena. Lau Afioga e pei e ai filifili o tatou taofi po o fea le aganuu e fai a o fea le aganuu e le faia. Na ona ou fia faamanatu atu i le sui usufono o lo o saunoa, o le aganuu lea tatou te nonofo ai i inei, ma o lo o puipuia e le Tulafono le aganuu lena na o matai e nonofo ai i inei.

Lau Afioga i le Fofoga Fetalai, o nai mataupu na e fia faasao.

**FOFOGA FETALAI:** A o le i tuuina atu le avanoa e faauma mai ai le saunoaga a le sui usufono, e manatu tele leaga e le fesiligia lou Tootoo e le Maota Fono lenei. O lea ua faapupula atu le saunoaga a le Afioga i le Palemia ma le Afioga i le Minisita mo Faamasinoga ma Pulega Tau Faamasinoga, o lau Afioga Saleaula e ono i ai Pule ia e silafia le tulaga lena. Ina ne i faataaloga i vai le faafogafogaaga a i latou e mua le soifua i totonu o le tatou atunuu, a o le talitonuga o le Fofoga Fetalai o le malu lena o Samoa o le tatou tu ma le aga i fanua. Ae taua foi ina ia matua tuuina atu le malosiaga ma faamamafa a le Malo, o le tafatolu o le Faigamalo, Faamasinoga ma le Palemene, a o le tafatolu o le Faigamalo i fafo atu, Malo, Ekalesia ma le pule mamalu a Alii ma Faipule. E le o gatusatusa loa le tafatolu lena ona ou lagona loa lea ua oo mai le taimi pogisa o le atunuu. O le vaitau lenei e le tau fai atu, o lea ua manino lau folasaga ona o tulaga o lea ua aafia ai le Maota, e le na ma le laina o la e silasila Samoa, o lea foi lau Afioga o lo o e aafia i lea tulaga ae ona o le faataua ina ia aua nei tanumia le aia tataua aemaise o le faataua ma le va fealoaloai o le Tafatolu lea. E fai le tatou tu ma le aganuu faa-Samoa i auala masani e malu ai le atunuu, e fai le galuega a le au fai Tatalo e auli ma pae ma toa le filemu e maua ai le agaga o le Atua ona fai foi lea o aulape o le tulafono, o le faaiuga ona tuu sao lea i le fale lea i falē a ua uma ona tatou

soalaupule tulaga e tatau ma talafeagai ona taatia loa lea o le mataupu i le agatonu.

Malie le sui usufono mamalu ua manino lau mataupu ae tulai mai e faaiu mai lau saunoaga.

**Tofa LEVAOPOLO TALATONU:** Faafetai i lau Afioga i le Fofoga Fetalai ua matua felefele lava le mataupu sa taumafai atu ai se vaivaiga. Ona pau lava le mea lea sa tuu atu ai se lagona o le faatinoga o a tatou faiga faavae i totonu o le tatou Malo, ona pau lava lena, aua le ninia maia mea ia i totonu, ao tu ma aga a le tatou atunuu i le faaaloalo ma tulaga faapena e le mafai ona aveesea e se isi.

**FOFOGA FETALAI:** Faaiu mai le saunoaga a le sui usufono ua maea lou taimi.

**Tofa LEVAOPOLO TALATONU:** Ona o lea ua maea lou taimi lau Afioga i le Fofoga Fetalai e usitai foi, ua pāia foi le pa i fualaga i se vaivaiga ona ou manatu lea o le a toe seu le tuli i puletuu. Ou te faamalulu atu foi i lau Afioga i le Fofoga Fetalai, ona pau lava o se lau ua mafai ona sui e Saleaula aua lo tatou faamoemoe, tau lava ina tuutuu atu i tafatafa o le tuulau i sana tofa fetuutuunai a o se faautaga liuliu foi i le lavelau i ona faiva alofilima a malu ai se tulufia o le maota o le faautugatagi a Samoa, faafetai, ae a leai e tele suiga lelei i tootoo o le tatou atunuu.

E avea foi lenei avanoa e avatu ai le faamalo ma le faafetai i lou Itumalo o Gagaemauga Nu. 2 i le paia i Tapaau ma le mamalu ia Saleaula ma le na Pule, faafetai tatalo, faafetai foi mo le tapuaiga. Le mamalu e o lenei aso aemaise foi o le faafogafoga tapuai i le fua faalepa o le tapuaiga a lo tatou atunuu, afai ua sala se gagana a o se aga foi ua le tau silasila, ia faamagalo mai le auauna.

Ia manuia le tatou Fono.

**FOFOGA FETALAI:** Faafetai saunoa i le sui usufono mamalu. Ua toe maua foi le avanoa mo se isi sui usufono e fia saunoa.

Tulai mai le sui usufono mo Faasaleleaga Nu. 1, le tamaitai tasi o le Faasalele.

**Afioga Hon GATOLOAIFAANA AMATAGA ALESANA GIDLOW (Faasaleleaga Nu. 1):** Faafetai lava i lau Afioga i le Fofoga Fetalai mo le avanoa. Ou te talitonu ua maea tapena e lau Afioga la tatou faafetai i lenei taeao aua lo tatou va tapuia ma lo tatou Atua, ua faapea foi ona e saunoa e tusa ai ma lo tatou va nonofo aua le faafogafoga mai a le tatou atunuu o le a le toe oo i ai se tala a lenei sui usufono.

Lau Afioga i le Fofoga Fetalai, e fia faamauina le agaga faafetai tele lava i le Afioga i le Minisita o Tupe ma le Matagaluega i le matagofie o le Tulafono Tau Faaofi o le Tala Faatatau o Tupe (Nu. 1) 2013/2014 ua tatou soalaupuleina ma talanoaina i lenei taeao ma le aso ananafi. Ona pau lava o lea ou te talitonu e tele ni atinae ma ni galuega o lo o fia faatino ae ona pau lava foi o seleni ua mafai ona tagolima, malo le faatoatoa, malo le faasoaso.

E i ai lava nai mataupu e fia avatu ai le agaga faafetai ma se tuualalo e tusa ai ma galuega ua faatino ma galuega ua vaaia. E avatu ai le agaga faafetai i le

Minisita mo le Pulega o Tagata Asiasi Maimoa mai Fafo. Faafetai i le Afioga i le Minisita o Tupe ona o le tulaga ua faapauina ai po o ua avea foi le lagolago po o le faatauaina o le atiaaina o Faletalimalo mo tagata asiasi maimoa mai fafo ma ua silafiaina o le tasi lea o atinae taua ma tele lona fesoasoani i le tamaoaiga o Samoa. Ua avea foi le faapauina o pasene ma se auala e faaali mai ai le faamuamua ma le faatauaina o lo o mafai ona tua i ai lo tatou Malo i atinae eseese aemaise lava i le Pulega o Tagata Asiasi Maimoa Mai Fafo. E fia faaleo ai lava le agaga faafetai i le silasila mamao ma le agaga ina ia silafia e i latou o lo o nafa ma ia atinae i le faamuamua ma le faatauaina o lo latou sao mo le tamaoaiga o Samoa e ala i le faapauina o pasene e fesoasoani ai i lea foi atinae.

E avatu foi lau faamalo i lau Afioga i le Minisita mo le Soifua Maloloina, ou te faamalo i le loto toa ma le lototele ua faia ai le siitaga mo le aufaigaluega, e le faigofie aua e tele foi le musua ma le afaina ai foi o manatu ma finagalo o tagatanuu ona o so o se mea lava e siitia ai le tau o fuafuaga po o le tau o ni auaunaga, e le faigofie, vagana lava o le Taitai ua silasila i le lautele e manuia ai le atunuu ona mafai lea ona oo i lea tulaga ma faatino. Ou te lagona o se Taitai foi e tagatagai i le manuia lautele o le atunuu e le mafai ona taofia le mea e tatau ona fai, aua o ai ea e tua i ai lo tatou Malo, e toe tua lava lo tatou Malo i o tatou lava tagata, o ai foi e tua i ai o tatou tagata, e tua lava i le Malo. E ao lava ona tatou tau fai lafo aso i galuega uma e mafai ai ona atinae ma faaauau auaunaga ma taumafai ai ina ia siitia fuafuaga i totonu o le atunuu. O le mea lea e avatu ai le agaga faafetai, pau lava o lea ina ia tumau pea le tagatagai i le tulaga e le tatau ona oo i ai ni totogi po o ni tupe e totogiina aua le services, e pei o le tulaga lea o le tagatagai i le tausiga ma le vaavaaia o maitaga o tina, o lea tatou te iloa o le isi lona vaega o lo o faatauaina ma tulituliloaina i le tulaga o le meleniuma ina ia maua le soifua manuia, e le gata i tina maitaga ae faapea foi alo ma fanau o lo o fananau mai. Faafetai pe afai o i ai pea le fuafuaga ina ia faataatia le totogiina o ia auaunaga a ia faasafua pea ina ia mafai ona maua ai e tina le fesoasoani mo le ola fou e atiae ai nuu ma le atunuu, aua o lea tatou te iloa mai le tusiga igoa talu ai nei e le o tele se pasene o siitia ai tagatanuu o Samoa. O lo o manaomia le puipua lelei o le tina ina ia mafai ona maua le soifua lelei e le gata o le tina a o se tagata fou o le a fanau mai ai.

O le tuualalo i lau Afioga i le Minisita mo Faamasinoga ma Pulega Tau Faamasinoga, e tele foi taimi sa asia ai le tulaga o Faamasinoga i le Ofisa i Upolu faapea ma Savaii, sa maitau ai le tulaga lea o le silafia ma ua molimauina foi e alii Faamasino le mea lea o le tautoga pepelo po o le aumai i luma o le Faamasinoga o mea e le o sao. Ua molimauina aemaise lava i alii Faamasino le tulaga lea o le Gafa i totonu o Faamasinoga. Sa i ai lava le agaga e faapea a ua molimauina ma ua faamautuina e tatau ona i ai sina tulaga e oo mai pe aumai ai se faaiuga a se Faamasino i se faaiuga ioe ua latou solia lea tulaga aua e taua tele lenei tautoga o lo o faia a o lei oo i le Faamasinoga, ina ia aloaia ai ma ia iloa ai foi e le o lo o alu atu i le Faamasinoga, e le o se mea mama le tulai ai i luma o le Faamasinoga aemaise o le tautoga e tatau ona fai. O lau tuualalo i lau Afioga i le Minisita, pe le tatau pe a faapea ua i ai tulaga ua mautinoa e alii Faamasino se tautoga pepelo ua faia e se tasi ua tulai i luma o le Faamasinoga, pe le tatau ai loa ona aumai se faaiuga i lona taimi e tusa ai ma le faaupuga lea e ono molia pe a faapea ua iloa le molimau pepelo. E tatau foi ona fai se faataitaiga lelei, e

tatau foi ona i ai se faaiuga ina ia faatauaina ai e e o lo o tulai i luma o le Faamasinoga ina ia aua nei avea se mea sese ma se taumafaiga ina ia faasao se mea sese ma mea o le a iloa ai lava e le o sao, e iloa ai i ina lona le aloaia ma lona le faaaloalo e le gata i le tautoga i luma o le Atua a o le tulafono a le Matagaluega o Faamasinoga ma le Pulega Tau Faamasinoga, ina ia nofo lelei ma ia saogalemu. O le agaga lena e avatu ai le tuualalo ona ua ou faalogo e silafia e le Faamasino ua i ai le molimau pepelo ona o nisi o Faamasinoga na i ai i luma i nisi o Faamasino, ae aumai le faaiuga e lei afea lea tulaga. Sa ou manatu lava sa tatau ona sau sina faaupuga pe molia ai lava le tagata i lea taimi ma aua ai ne i toe faia – faamamaina o le tulaga i le faatautoga i totonu o a tatou Faamasinoga.

E faapea foi ona avatu pea se leo e molimoli atu ai le agaga e lagolagoina ai lea tulaga i tu ma aga a Samoa, ou te lagona o le mea lea o lo o malu ai nai o tatou tagata. E mitamita lava lou au tagata pe a ta alu atu i fafo ma ou matamata ma tilotilo ma toe foi mai i Samoa e tulaga ese lava Samoa, e leai lava se isi mea e tulaga ese ai Samoa, E ala ona tulaga ese ona o ana tu ma aga masani, o ana tu ma aga na sau ai ae salani e le tatou olaga faa-Kerisiano. O tu lava ma aga a Samoa ua leva ona i ai ae mulimuli mai le faa-Kerisiano, lea ua galulue faatasi oka se matagofie. E oo ai foi le popolega o le mafaufau pe a vaai atu o le a avea lo tatou naunau ina ia faatino ni tu mai fafo ma tatou faatuatanai ma faaitiitia ai le taua o tu ma aga a le tatou atunuu o lo o tatou sapi ai nei. Ou te momoli atu ai le agaga ina ia faatumauina pea le pulega a alii ma faipule ina ia faatauaina, a o faafogafoga mai foi i le faatauina o le tatou Palemene, e leai lava se isi mea e avatu ai le timai ma avatu ai foi le faaopopo, faatau ma le faamalosiua i e o lo o nafa ma le puipua ma le faamalosiua o tu ma aga a Samoa, o alii ma faipule i totonu o alaafaga taitasi o i inei i le tatou Palemene. E tele le sao aua o lo o faafogafoga mai ma latou silafia ai, e leai, a leai le tu ma le aga a Samoa ua leai foi se tulaga ese o Samoa i totonu o le Pasefika ma totonu o le lalolagi.

Lau Afioga i le Fofoga Fetalai, o le agaga lena e fia faaopopo atu ai e pei ona saunoa le Afioga i le Palemia ma nisi o sui usufono mamalu o le Palemene, o le faatauaina o tu ma aga a le tatou atunuu.

E avea ai lenei itula lau Afioga i le Fofoga Fetalai, ou te avatu ai le faamalo i le tapuai faafogafoga mai a lou Itumalo i tupu ma ee aemaise foi o le au fueloalo ma tootoouli o Itumalo, e le gata i lea o vaega eseese i tina ma tamaitai, saao ma le malosia o le nuu e oo lava i fanau, aemaise foi o le tapuaiga tatalo a faafeagaiga i fata faitaulaga e fia i totonu o lo matou Itumalo. Le Susu o lau Susuga i le Faifeau Toeaina Solomona Tuatagaloa, faafetai le tatalo mai a o taumafai pea la outou auauna ina ia fai se leo e faaleoina ai nisi mea o lo o faatauaina i totonu o le tatou Itumalo, aemaise o le tausiga o le toafilemu o tagatanuu taitasi i nuu ma alaafaga.

Faafetai tele i lau Afioga i le Fofoga Fetalai mo le avanoa, ia manuia tele la tatou Fonotaga, soifua.

**FOFOGA FETALAI:** Faafetai saunoa i le sui usufono mo Faasaleleaga Nu. 1. Malie le sui usufono mo Sagaga le Usoga, leaga o lea ua tulai mai le sui usufono mo Siumu, o le a avatu le avanoa ma o le a felafuai le tatou galuega ona faigofie lea.

Tulai mai le sui usufono mo Siumu.



**Tofa Hon TUUU ANASII LEOTA (Siumu):** Faafetai i lau Afioga i le Fofoga Fetalai mo le avanoa. Ou te faatulou atu ai lau Afioga i le Fofoga Fetalai, o lau Afioga o lo o faafofoga i ai sui usufono mamalu o Itumalo e 48 o le Malo o Samoa.

Ou te faatulou atu foi i lau Afioga i le Palemia ma lau Kapeneta, lau Afioga i le Taitai o lenei Vaega toaitiiti, afifio Afioga i Minisita Lagolago aemaise o le mamalu o sui usufono o le Palemene o Samoa. O sui usufono filifilia o Itumalo....

**FOFOGA FETALAI:** Lau Afioga i le Taitai o le Itu Agai, ou te ofo lava i lou amanaia.

**Afioga Hon Palusalua Faapo II (Taitai o le Itu Agai):** Ia faasao le saunoaga a le sui usufono, e le o se Taitai o se Vaega toaitiiti, o le faalupega o le “Taitai o le Itu Agai” lea foi o le a e sauni e te taitai ai, ioe. “Taitai o le Itu Agai.

**FOFOGA FETALAI:** O lea la o le a tauau ina aliali mea ia na ou taofiofi atu ai. Ia sei tulai mai la le fofoga o alii.

**Tofa Lealailepule Rimoni Aiafi (Faleata Sisifo):** E le amanaia lea mea, e le o le laitiiti poo le tele o le mea taua, o le mea e maopoopo. Ae na pau le mea e fia faasao i le saunoaga a le sui usufono mamalu, e le 48 itumalo o Samoa, o le sui usufono o le sui usufono sinia, e le 48 itumalo o Samoa, sei faasao ane e lau Afioga faamolemole.

**FOFOGA FETALAI:** O la e le o faitauina ai e ia ia i totonu o le lisi lea na ia saunoa mai i ai.

Malie le sui usufono mo Faleata Sisifo o lea ua manino. Sei tuu atu le avanoa i le sui usufono mo Sagaga le Usoga.

**Afioga Muagututagata Faamausili Auimatagi Peter Ah Him (Sagaga le Usoga):** Lau Afioga i le Fofoga Fetalai, o lea ua taua e le Afioga i le sui usufono o si au uo foi, e taua le mea maopoopo, e sao. Ae le o maopoopo le Itu le la. O le faasaoga lena lau Afioga.

**FOFOGA FETALAI:** Malie le sui usufono mo Siumu, o le Taitai o le Itu Agai, o le faasaoga lena, pe toaitiiti, ae taua le malosi ma le maopoopo, o lea ua saunoa le fofoga o alii. Tulai mai e faaauau le saunoaga.

**Tofa Hon TUUU ANASII LEOTA:** Faafetai i lau Afioga i le Fofoga Fetalai. E leai o le Itu Agai lava o le Vaega toaitiiti. O le faalavelave lea o le sui usufono mo Faleata Sisifo, leai o le 48 leaga o lea ou te lauga i le Fofoga Fetalai, e 49 i o. Ua maua mai? E 48 tatou nei ae 49 i le tamaloa.

I le afifio o sui usufono mamalu o le Palemene o Samoa aemaise foi le tapuaiga a Samoa e amata mai i ona ao seia paia ona iu, e talitonu o lea ua taoto lava i lagatonu paia ma mamalu o le taeao e pei o saunoaga ma fetalaiga a sui usufono mamalu ua maea ona sausaunoa i le Maota nei. Sa i ai le manatu e leai se lauga ua manatu e pei o le vaa o le tamaloa o Toilolo e le iloa pe alo i luma pe alo i tua, aua o lea ua e faataoto le alafua i lauga a sui

usufono o lenei aso ma lenei foi Taualumaga a le Palemene, ua i ai le finagalo o le Malo ina ia faavavevave ma pasia le tatou Tala Faatatau Faaopoopo o le Tupe. E leai la se agaga o lenei usugafono e tosotoso pe faaumiumi la tatou Fonotaga. Ae i ai foi le manatu e fua lava le lauga agai i le seleni o loo faataoto mai i le Tala Faatatau Faaopoopo o le Tupe lenei. O lea ua manino lava ma malamalama tulaga o i ai le faamoemoe. Ma na o le 10 lava sekone o lau lauga, aua e taua lou tulai atu e faaleo mea o loo mananao i ai ma finagalo i ai lou itumalo.

O tulaga lava o loo laualuga i finagalo lenei itumalo, o auala galue. Ia finagalo malie lau Afioga i le Minisita mo Galuega, Felauaiga ma Atinae Eeseese, aua e te toatamai i lou lagalaga pea ma faamanatu atu pea lava pea, o le auala galue lea o le matou itumalo i Maninoa. Ua faapena foi ona pei se faatiga taliga foi i lau faafofoga mai le lagalaga atu pea e le gata i le tatou Palemene nei a o le tatou Faafaletui, ua ou oo atu foi i lau Afioga, tusi atu foi i lau Afioga, ia o mea lava e tatau ona fai, o mea ia a sui usufono e tatau ona fai, tusi atu pea logologo atu pea aua ou te popole, ina ne i tuuaia au i maea ae le Paeaiga lenei ae lei faia lou auala, ia ona e saunoa mai lea faapea, ia aua laia lou le faamanatu mai? O lea la e malie ai lau Afioga, o loo faamanatu atu pea le auala lea i Maninoa ma le auala i Saaga. Faafetai foi i lau Afioga i le auala lea ua agai i Safata, lea e amata i le tausiusiuga o Siumu i le itu lava lea i Maninoa, agai atu i Safata, manaia le lautele. Maumau e pe ana amata atu i Siumu i le mea lea o loo taulai i le auala i le alu atu i Tiavi agai i Falealili, ae agai mai i Safata le auala lea.

**FOFOGA FETALAI:** Malie le sui usufono o loo saunoa leaga o lea ua taua le faatinoga o galuega a le Matagaluega, sei tulai mai lau Afioga i le Minisita mo Galuega, Felauaiga ma Atinae Eeseese.

**Afioga Hon Manualesagalala Enokati Posala (Minisita mo Galuega, Felauaiga ma Atinae Eeseese):** Faafetai mo le avanoa i lau Afioga i le Fofoga Fetalai. Ma e manatu o le afa sa aafia ai tatou, o le tasi lea auala e tele le tupe sa faatino ai, ma e molimauina foi le lelei o auala ia e ui atu i Siumu i luga i Tiavi. E tusa ma le \$15milionā le tupe sa faaleleia ai auala ia ma isi auala ia e fesootai mai. O le fuafuaga sa i ai le auala lea i Tafitoala, o le tasi lea o vaega sa tele le aafia i lologa. O lea sa center ai i le auala laupapa lea i Tafitoala ae agai mai i i ma agai i o le isi lua kilomita. O le mea lava na gata ai le lua kilomita lena ua faagata ai. O lea e i ai le faamoemoe e faapai atu i le magafa lea i Siumu fesootaiga ina ia lelei auala ia. Sa faita lava le sui usufono mamalu o lea e fesili i le faaleleia o auala sa fesootai atu i Siumu i le feagai ai ma le afa. Ae ui i lea, taatia mai. Faafetai.

**FOFOGA FETALAI:** Malo faafetai. Ia, ua tali le Minisita lau Afioga i le sui usufono mamalu.

**Tofa Hon TUUU ANASII LEOTA:** Faafetai i le Afioga i le Minisita, leai o lea ua maua atu e \$15milionā lea e alu i le auala galue i Siumu i le agai atu i Tiavi. Ae faamalie atu, o le auala lea, e le na o Siumu o faaaogaina, e faaaoga e Samoa atoa lava, o le fesootaiga lea o le atunuu. Ae faafetai i lau Afioga i le Minisita. A o le agaga lava ia o le naunataiga. Maumau e le mananaia o auala

ia e alu atu i Tiavi, pe ana oo atu i Siumu agai atu i Falealili ma Safata. Faafetai.

E momoli atu le faafetai i le Malo, o lea ua tapena mai Saina mo le fausia o le matou aoga Tulagalua. O lea ua fuafuaina mo le masina fou ona faapena lea ona amataina le matou galuega i le faleaoga. O lea ou te tatalo atu ai i le tatou itumalo, o lea ua faafofoga mai le paia ia Sa Asomua ma Aiga, ua outou faafofoga mai e le o tuuaunoaina e lo outou sui usufono le mea o loo outou finagalo i ai e tuitui pea o tatou auala galue, e le gata i Maninoa ae faapea foi i Saaga. O lea foi ua outou faafofoga mai, o lea ua tapena atu le tatou faleaoga. Ia tatou faafetaia le Malo, faafetai atu foi i fuafuaga ua faataoto mai.

Lau Afioga i le Fofoga Fetalai, ua maea le lauga a lenei itumalo. Faafetai mo le avanoa, ia manuia le Fonotaga i lenei aso.

**FOFOGA FETALAI:** Malo faafetai saunoa i le sui usufono mamalu mo Siumu. Ia, lafo laia i le aai o finagalo o le paia i le Kapeneta, o lea foi ua maitau ma le manino ua faafofoga foi le tatou nuu aua le faleaoga ma nisi o atinae, ia tatou talia lupe o mau.

Ia, le sui usufono mo Sagaga le Usoga, o lea ua maua lou avanoa e te tulai mai, o lea e maua le taimi ae lei faia le tatou malologa.

**Afioga MUAGUTUTAGATA FAAMAUSILI AUIMATAGI PETER AH HIM:** Faafetai i lau Afioga i le Fofoga Fetalai mo le avanoa. Avea foi lenei taimi e faatalofa aloaia atu ai i lau Afioga i le Fofoga Fetalai, i le afio o lau Afioga i le Palemia ma le Kapeneta ma sui usufono mamalu o le Palemene. E faatalofa atu foi i Lana Afioga Mamalu O Le Ao o le Malo, lau Afioga i le Tui Atua ma le Masiofo, faapea foi le Afioga i le Sui o le Fono a Sui Tofia ia Tuimalealiiifano ma le Masiofo, le Aufaigaluega Paia a le Atua i soo se fatafaitaulaga e fia, o lo o faanonomanu ma tatalo aua se manuia o Samoa.

Le paia ia Tumua ma Pule, Ituaui ma Alataua, Aiga i le Tai ma le Vaa o Fonoti. Avea foi lenei avanoa lau Afioga i le Fofoga Fetalai e faatalofa atu ai i si ou itumalo i le afio o Saena ma le Aiga Sa Saena, afifio o Alo o Fuatino, afio o Tuitea ma le mamalu ia Tupailesa ma le Fale o le Afu o le Alataua. Afifio o le Aiga Sa Gauifaleai ma le Vagana i Tulafale, le toalua ia Fata ma Maulolo ma le mamalu ia te oe Tuisamau.

E faatalofa atu foi i le afio o Maualaivao ma le Matua ia Faamausili, Pou e Fitu o le Fale Malietoa ma upu ia te oe Auimatagi. Faamalo le folau i le tatou itumalo, faamalo le lagimama ma le soifua maua ua tatou aulia mai foi lenei tausaga fou 2014 e faaopopo i lo outou soifua ma so matou ola vaivai, e saga viia ai pea ma faafetaia lo tatou Tama i le lagi. Ia tapuai maia ma se manuia sei taumafai so tatou sao aua le Tala Faatatau Faaopopo o le Tupe ua opea nei i le Palemene.

Lau Afioga i le Fofoga Fetalai, e muamua ona momoli le faafetai i le Afioga i le Minisita ma le Matagaluega o Tupe e tusa ai ma le galuega fita sa feagai ma i latou, e ui lava o le Tala Faatatau Faaopopo, ae le faigofie. E faafetai foi i le Komiti a le Palemene, i latou sa autovaaina le iloiloga o le Tala Faatatau Faaopopo o le Tupe. Ma e lagolagoina e lenei itumalo le Tala Faatatau Faaopopo (Nu.1) o le Tupe.

O le a muamua atu lau Afioga i le Fofoga Fetalai, e faaleo atu foi ni manaoga o lenei itumalo, o mea lava ia e tataua ona faamuamua ma e taua, ona tatou oo ai lea i nisi vaega e faalauaitetele.

Lau Afioga i le Minisita mo Galuega, Felauaiga ma Atinae Eseeese, e momoli atu le faafetai a le matou nuu i Malie e tusa ai ma le galuega tele i le auala galue i totonu o Malie ua maea ona ootiina le lipine e lau Afioga ma faaulufale. Faamalo faafetai. Faafetai i le manaia o le auala, faafetai i le konekarate. Afai o faalogologo mai le konekarate, ia, manaia le matou auala i Malie, faafetai. Na o le pau lava lenei o le auala e le ila i ni timuga. Ae fia faaleo atu lau Afioga i le Minisita mo Galuega, ua talosaga mai le matou nuu i Tuanai, o le auala o loo i ai i le taimi nei e fia faaau i Aleisa, pe o le auala lea e alu atu faaselemutu se i tulou, ona afe lea e fesootai ma le auala i Leauvaa. Ia, a o le talosaga a lenei nuu o Tuanai, ia faaoo le auala lenei, o le tele o le aufaifaatoaga o loo nonofo, ia ati atu le auala lenei i Aleisa. O lea ou te iloina e utiuti lau faasoa, ae tau lava ina faataatia atu i ina, a ou oo atu i lou Ofisa i se taimi, o lena e te manatua mea o loo matou pisapisa atu ai. E faamalie atu foi pe a faatiga mata i lau Afioga le matou o atu soo.

Ia, ona oo mai lea, na pau lava lenei o le itumalo e le tagisa i ni... na o auala galue lava lau Afioga, a o la e pule alofa lava le Atua e le osofia matou e ni sami ma ni mea faapena.

Ona oo mai lea i Afega, lau Afioga sa ou oo atu i ai i le vaiaso ua tea, ua matua leaga faia lava le auala e tau mai i Aleisa, ma o loo manaomia se toe faaleleia o lea auala lau Afioga, e faapea foi ma le auala o loo ui atu i le tolotolo i gatai o Afega, faamolemole lau Afioga o loo fia faaleleia lea vaega. E fia faaleo atu ona o nai mea ia o lo o moomia e le matou itumalo.

Ia ona ou toe oo mai foi lea i le matou nuu i Malie, o loo i ai foi se vaega o le auala i Lalau i le va o Afega ma Malie e fia faatino foi lea vaega lau Afioga. O le itumalo lenei o le matua tumu o le maketi i le aufaifaatoaga, ioe, e toaaga tele lenei Itumalo e tautua Samoa i le vaega o le aufaifaatoaga.

O le matou auala faamolemole lau Afioga i le mea o lo o ui atu ai i autafa o le aiga Sa Sia ma le auala i Vailoa i le mea o lo o afio ai le Afioga Faamausili Faiga ma Seiuli, o le tatalo mai ina ia ou alofa ma faaleo atu lea auala ua matua faigata ona lau mai fua o faatoaga i Apia, e pei ona ou fai atu tau lava ina faaleo atu ae ou te talitonu o lo o faasoasoa lava polokalame a le Malo.

O le auala i Tuanai, ou te talitonu e manuia ai foi le Malo aua a oo ina faaau i uta i Aleisa o le a toso ai foi ma le EPC ma toatele tagata e faaogaina ai le eletise, o le tasi lena alagatupe tele a le atunuu.

Lau Afioga i le Minisita mo Punaoa Faanatura ma le Siosiomaga, ua maitauina ua tele mai foi le manu lea o le myna bird, sei toe silasila ane lava le tatou Matagaluega pe faapefea ona faaumatia faamoimoi lea ituaiga manu ina ia aua ne i toe vaaia iinei i Samoa, ona pau lava lena. O matou e le o toe manaomia ni taligalu ae na ona faufautua atu i mea o lo o matou vaai ai.

Lau Afioga i le Minisita mo le Soifua Maloloina, faamalo galulue, sa ou oo atu i le falemai ua manaia le tatou falemai ma ua manaia foi tulaga uma, faamalo ua maua faamatalaga i luga o le nusipepa o le a fai se lala fou i le preventing ina ia prevent ai ma le maua o tagata i le mai suka ma le koko maualuga ae lei oo i se tulaga ogaoga, faamalo atu le galulue ma sailiili i mea e manuia ai lo tatou atunuu, ona o le fasioti tagata numera tasi lea i totonu o le tatou atunuu sei tulou, o le mai suka po o le diabetes. E tataua i tagata uma o Samoa ona mafaufau ma magafagafa i lea tulaga e te le malosai ai pea, a sese

lava ona e tausami mai lou laitiiti e te fiu e toe fofo i le taimi ua e matua, po o le a lava lou lapoa sei tulou, ia na o se tamai pusa lava e tuu ai oe i le taimi e te tuua ai lenei lalolagi.

Lau Afioga i le Minisita mo Faatoaga ma le Faleoloa o Faatoaga, faamalo le galue. Ua maua le tele o le talo ua i ai, e pei ona faalogologo atu i le aso ananafi, o lo o taumafai lava i se faiga e ave ai le tatou talo i fafo. Ua faalogologo atu foi i lauga ananafi o lo o aumai ma taumafai la outou Matagaluega i se faiga e ave ai le talo i fafo. E manaia pe a faapea e tau mai le alternative, a faapea e sese faiga a le vaega lea o le agricultures i le aveina o le talo i fafo ona tau mai lea. A i ai se tagata o i ai sana metotia i ina, lauga mai ma tau mai. Lau Afioga i le Minisita o Faatoaga ma le Faleoloa o Faatoaga, e faafefea ma faafefea, o lena e sese la outou talanoa i papalagi e le o lelei lau nanu i le papalagi e faafefea ona fai le mea lea ona maua lea. .... ae le o le tulai mai ma faitio, faitio, faitio ae le tau mai po o le a le faiga e sui ai le taumafaiga a le Minisita. Afai o faaletonu taumafaiga a le Minisita tau i ai e sese lau nanu, e le malamalama le palagi i au mea na e avatu ona manaia lea.

E pei foi o le tamaoiga, e taugata le tamaoiga tau mai, e faafefea ona fai, a fai o lea e sese le faiga ia tau mai, a faapea ua taugata le VAGST ia tau mai e tuutuu laitiiti i lalo i le 12 ua maua tele le 15. Ae leaga le fai mai e taugata, taugata ae leai ma se mea o tau mai po o le a le mea e faaleleia atili ai le tulaga o le....

**FOFOGA FETALAI:** Malie le sui usufono o lo o saunoa se i tuu atu le avanoa i le sui usufono o lo o faauilavea.

**Susuga Papalii Lio Faavaivaiomanu Taeu Masipau (Faasaleleaga Nu. 2):** Lau Afioga i le Fofoga Fetalai, faafetai lava i le sui usufono mamalu mo le ... ona o au le isi sui usufono sa taua le talo i le aso ananafi. Ou te faamalie i le sui usufono leai e le o se faitio, masalo a faafofoga lelei le sui usufono o le fautuaga i le Afioga i le Minisita, sa ou faafetai foi i le Minisita e tusa ai o le tulaga o lo o i ai ae aveese lea upu e faapea o le “faitio” e leai o le agaga o lea ua lagolago mai le Afioga i le Minisita ma o lea ua saili maketi. Faafetai o lea ua saunoa le Afioga i le Minisita o le a i ai le Fale Chips e ave i ai talo, vaai i le tali manaia. O le mea lea e fesoasoani atu ai i le sui usufono.

**FOFOGA FETALAI:** Ou te manatu ua manino le faamalamalama a le sui usufono le sui usufono mo Sagaga le Usoga? E le o se faitio a o le fautuaga na aumai e le sui usufono.

Ona o lea ua tatou taunuu i le taimi malolo, o le a faaaauau lau saunoaga pe a tatou toe taliu mai i le tatou malologa masani.

*Na faataatia ese Taulumaga a le Fono Aoao mo lana malologa masani i le itula e 10:45 i le taeao ma toe faaaauau i le 11:20 i le taeao.*

**FOFOGA FETALAI:** Ou te faasilasila atu ua toe amataina nei Taulumaga a le Fono Aoao Faitulafono. E i ai le talitonuga ua tatou taunuu mai i le afa lona lua o lenei vaega o le aso e i ai foi le agaga faafetai ua matu i

fau le taliga o le sua ma ua palegaauau la outou tauteaga ma maua la outou faasiliga malosi. E faamalulu atu foi po o le a se tali a le Failautusi ma lenei Matagalueg i lenei aso ma le taumafai mai e faatino la tatou mea taumafa Samoa, o le tausia lava o le soifua maloloina e pei ona saunoa le Afioga i le Minisita mo le Soifua Maloloina. O le agaga ma le faamoemoe e le faatamala le Failautusi ma le Ofisa o le Fono, e taliu foi ae popoe e taua le tausia lelei o le faamalosi tino aua le faaauauina o a tatou galuega aemaise ai ua fai sina uumi o a tatou taimi Fono e pei ona taua.

E i ai foi le agaga ua tau kiki laitiiti i lalo le tatou ea malulu ona ua fai foi sina malulu o lenei taeao ao le agaga faafetai o le mea sili ua tatou tau mai le afa o le tatou galuega mo lenei aso.

E faia le tatou malologa o saunoa le sui usufono mo Sagaga le Usoga, tulai maia e faaauau le saunoaga.

**Afioga MUAGUTUTAGATA FAAMAUSILI AUIMATAGI PETER AH HIM:** Faafetai i lau Afioga i le Fofoga Fetalai, faafetai foi ua maua se faasiliga malosi i sui usufono mamalu o le Maota. Lau Afioga i le Fofoga Fetalai, e moni lava lou uso a sui usufono mo Faasaleleaga Nu. 2, o le uso lava o fautua o le faitio, e tutusa lava mea na a o lena foi e sao oe i se isi itu, aua foi ne i tetena i o outou finagalo sa matou upu i lenei taeao.

Lau Afioga i le Minisita mo Leoleo ma Falepuipui, faamalo le galue sa matou maitauina lava le sologa filemu o aso fiafia faamalo faafetai. O le tulaga foi e pei ona faasalalau i nusipepa i le va o i matou ma Leoleo ia e leai se mea o tupu o lo o lelei mea uma, o matou foi e lagolago tele i lau Afioga ma le Matagaluega.

Ona ou oo mai ai lea i le Minisita mo Aoga, Taaloga ma Aganuu, faafetai ona ua maua foi se fanua i lo matou nuu o Afega e fai ai le faleaoga a Sagaga, sa faafetai lava ma le agaga ma le loto mama, o le mea taua lava o le maua o le fanua. E oo mai i le taimi lenei ua leiloa e le Komiti se mea o tupu e pei ua tau musua foi le Komiti ae ou te manatua le fonotaga mulimuli ma lau Afioga o Aperila i le tausaga ua tea, o lena sa i ai lava le ofo po o le tautinoga a sui o le afioaga o Faleula o lo o i ai se fanua e mafai ona faatino ai lea aoga, e ui lava ona o tulaga sa lapelapea ai ona e latalata tele i le faleaoga a Uesiliana ae talitonu e le taua lena itu ae taua le maua o le fanua, e amata mai lava mai Tufulele aua o lenei aoga e lua ni Itumalo.....

**FOFOGA FETALAI:** Malie le sui usufono o lo o saunoa se i tuu atu le avanoa i le faauilavea a le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o mataupu faapenei, o mataupu e tataua ona tuutuu loloto i ai le tofa a afioaga nei, e kopi uma mai au i fetusiaiga ia e fai, ana o au e faafeagai ma mataupu nei ua leva ona faatino. E le faatalia e le Malo le tulaga le mea lea o le fetuia i o tagata o le Itumalo, pau lava le mea a le mafai ona maua se tasi e sili loa ona tapuni le aoga. O le mea lea e tataua ona faafeagai outou ia o sui usufono o Itumalo ma o outou afioaga, fai i tua le mataupu, ua gasea tele le Matagaluega o Aoga i le taumafai e tosotoso pea lenei mataupu ae pau lava le mea e silasila i ai a le mafai loa ona maua se tonu tapuni loa le Aoga, ae le tataua ona faaumiumi ai.

Ua ala ona ou tulai atu, ua ou maitau o le sui usufono o lo o saunoa nei o le isi lea sui usufono tuai ae talavou, ua ou faalogologo atu lava o le a tauau ina toeaina tele lou leo e te le i taitai. O lea foi ua manino le mataupu ina ne'i te'i foi ua tosotoso umi le mataupu a o le tulaga lena, e tataua ona a le maua loa se tofa i lo outou Itumalo fai loa le iuga lea e fai atu ai le Malo.

**FOFOGA FETALAI:** Tulai mai le sui usufono e faaauau le saunoaga.

**Afioga MUAGUTUTAGATA FAAMAUSILI AUIMATAGI PETER AH HIM:** Malo faafetai, e sao lele lava le Afioga i le Palemia i le mea lea o le le mautonu. E tulai mai le Afioga i le Palemia o lo o tau fai atu sau tala, o le Aoga lena e lavea ai Sagaga le Falefa ma Sagaga le Usoga, e lua Sagaga e lavea ai o la ua silafia e le Afioga i le Minisita o lo o i ai le fanua i Faleula, taatia atu i ou tafatafa. Sa ou talanoa talu ai nei i toeiina o Faleula po o avanoa pea lo latou fanua a o le tala mai o lo o avanoa pea, tau lava ina ou faapena atu a o lo o i ina lava le uta a le fai mea.

Lau Afioga i le Minisita o Tina ma Tamaitai, Atinae o Nuu ma Afioga ma Agafesootai, faamalo le galue ua maitauina galuega lelei.

E faapea foi i lau Afioga i le Minisita mo Fesoootaiga ma Faatamatalaga Tekonolosi, faamalo faafetai ua maea le fale fou.

E faapea foi i le Minisita mo Tupe Maua, faamalo faafetai i lau Afioga ma le Matagaluega.

Lau Afioga i le Fofoga Fetalai, ona ou oo mai ai lea i se mataupu ou te fia talanoa i ai ona e i ai le talitonuga e aafia ai foi tagata o le tatou atunuu, o tagata faipisinisi mai atunuu i fafo. Ou te fia talanoa faapitoa i le Susuga ia Chan Kau Yu, e i ai lona igoa papalagi e igoa ia David Chan ma Fang Yui, e i ai lona igoa papalagi Hank Fang. Lau Afioga o nei tagata, ua tolu nei kamupani ua latou lesitalaina iinei i Samoa. O le kamupani muamua, o le Samoa Signal Ocean Limited. O le kamupani lona lua, o le Brand Ocean Industry, ma le kamupani lona tolu, o le Green Power. Ma e taumafai e involve i nei mea o solar power. Ae ou te tautino atu lau Afioga...

**FOFOGA FETALAI:** Ia, malie le sui usufono mo Sagaga le Usoga, sei tulai mai le sui usufono mamalu mo se mea e fia faasao.

**Tofa Levaopolo Talatonu:** Lau Afioga i le Fofoga Fetalai, o le mea e fia faasao.

Lau Afioga i le Fofoga Fetalai, e manino lava Tulafono Tumau a le Maota. E le o aafia i i e ua taua o la suafa. Ou te talitonu foi lau Afioga i le Fofoga Fetalai, e le natia i luma o le Maota ma le faafogafoga a le atunuu, o nai uso ia o lea e fesoasoani mai i le tatou Malo, a o lea o le a ou fai atua le mea lea, aua e pei ua atugalua le finagalo o le Afioga i le sui usufono i le tolu o kamupani. E moni. A o le mea muamua, e lei faamaoni foi tagata Samoa sa latou faipaaga ma nai uso ia, ua ono tausaga o taumafai mai nai uso ia e fesoasoani mai i le tatou Malo ma a tatou fuafuaga. Oo i le lona lua ua taumafai e sui foi nai isi paaga, o le mea lava e tasi. O lea la faatoa oo mai nei ia te au, o lea la ua matua mautu lelei fuafuaga a nai uso nei. E taua o la suafa i totonu o le Palemene o Samoa, ae le o ni tagatanuu o Samoa lea e taua, e pei e foliga mai foi lele e... ae eseese taimi ona...

**FOFOGA FETALAI:** O lea ua ou maua le faauilavea a le sui usufono mo Gagaemauga Nu.1. E faamalulu atu i le tulaga lea, ona o lou tuua o le avanoa sei faamatala mai le mea o loo agai i ai ona fai lea o aulape o le tatou Tulafono Tumau. O lea sa ou tuua le avanoa i le sui usufono sei faamatalatala mai poo fea e agai i ai le taua o suafa ia. A faapea loa o se tulaga i tulaga pei ona lamatia ai le tauleleia ma tulaga faapena, ona faapena lea ona faataatia le Tulafono lea, ae le mafai ona...

Tulai mai le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, o mataupu tonu lava ia, o mataupu tau administration, o la e nafa ma tatou Matagaluega. O mea ia latou te tilotilo i ai. Ua uma foi ona oo mai tusi a le sui usufono ia te au, a o le mea foi lea o lea e vaai i ai le Malo, o tagata uma lava e pepelo, e maua lava i le tulimanu, ae faapena taualumaga o mea. Afai foi e pepelo nei tagata, ae o la e maua ai tupe a le Matagaluega o Lafoga. A o suesuega o i latou nei i le omai mai fafo poo sao poo aumai ni faamatalaga sese, e maua uma lava, e le faapea e le maua. E ala ona ou fai atu, e le o se mataupu lena o lea e laga i totonu o le Tala Faatatau Faaopoopo o le Tupe, o le mea lena e fai i totonu i le va ma le Malo, o lea la e oo lava foi i isi tagata e ave i ai le faatuatuaga, ae aumai foi le latou talosaga, o le mea lava e tasi. E faapena le lalolagi lea tatou te i ai nei, o lea o le a ou tau atua sina faataitaiga. Na pasia e le Palemene lena Tulafono e ave ai ni faatosina tetele lava ina ia faia ai le faletalimalo foi lea i Taumeasina. O le matua tetele o lena fesoasoani na fai, i le agaga o tagata nei e talitonuina. O le a le mea ua tupu? Ia, ua eli eli eli le eleele, ona te i loa lea ua nofo fai mai o la e toe o e aumai nisi seleni. O le taimi lea a o ou faigaluega i totonu o le Matagaluega o Tupe. Ua le masino le tele o ou aso i faaiuga o vaiaso, po o Aso Toonai ma po o Aso Sa matou te galulue ai ma nei tagata ina ia faamaopoopo a latou talosaga i luga o le naunautaiga e i ai ni a latou tupe. A o le a la le mea na tupu? Alu alu alu, bankrupt lena vaega, omai le isi vaega bankrupt, omai le au Niu Sila lea, o le ala foi lea na ou tu ai i le aso na tatala ai ma ou faapea atu i lena tamaloa, “Se o au nei ua ou lelava i tagata talapepelo e omai fai mai e tele latou tupe. Ia e le iloa pe alu alu foi e leai ni au tupe.” A o le manaia ia o le toatele ia o tagata na i ai, tele meaai ma pia na inu e tatala aloaia ai lena faletalimalo o le a fau. Ia na alu alu foi, e leai se mea na faia. E faalogo atu ua eli le oneone e tau faatau e sue ai ni ana tupe. A o la e faatoa omai le kamupani sao, le kamupani lea mai Papua Niu Kini. O lea la ua faagasolo nei galuega, o i ai le faamoemoe poo le faaiuga o le tausaga nei e maea ai faletalimalo tetele ia. O le mea la lea, e leai se mea e popole ai i ia mea, o tagata uma lava e omai e leai ni tupe, se ua ta masani ai. E feoai feoai lava pakalu a latou mea, uma, o. E leai se mea e popole ai i lea mea.

O le mea la lea, o le mataupu lea e aumai, tuu pea o la e galulue ai le aufaigaluega a le Malo nai lo le aumai i totonu ii, e leai nisi o tatou e malamalama ai i na tagata, pe te i ua alu alu alu, e le iloa pe faatoa sao tagata la e ua latou faipaaga, e oo foi i nei mea o tatou solar ia e fai nei. E oo foi i le isi kamupani, o le o o lava o ia omai omai fai mai o latou e fai solar, fai le iuga a le Malo, o lea e oo mai lava i le taimi nei, ou te lei vaai lava i ni solar. Na o le pau lava le mea lea e mautinoa o solar ia e fai a le Malo, o la e alu lava. O lea foi la ua i ai le project lea ua fesoasoani mai ai Niu Sila ma Iapani,



e faapena lava le lalolagi lenei tatou te i ai, o le tele lava o le aufaipisinisi e omai nei, na o le omai lava na o le pala pala pala pala, uma ifo, e faapena.

O le mea la lea, e leai lava se mea e te popole ai fua lau Susuga leaga o lau mataupu lea e aumai, e i ai foi ma le lua foi interest i totonu i i, ae taatia lava mataupu ia faa-administration e faatino pea ae tatou agai i le Tala Faatatau Faaopoopo o le Tupe.

**FOFOGA FETALAI:** Malo. E manatu ua manino le faamalamalamaga a le Malo. Le sui usufono mo Sagaga le Usoga, o lea ua manino ma malamalama, o lea foi ua maua le atugaluga ma le faamalamalamaga, taatia ai pea laia i i. O le a lafo pea i le Matagaluega o Pisinisi, Alamanuia ma Leipa ae sagatonu le tatou lauga e uiga i le Tala Faatatau Faaopoopo o le Tupe ona puupuu ai lea o le tatou galuega.

**Afioga MUAGUTUTAGATA FAAMAUSILI AUIMATAGI PETER AH HIM:** Faafetai i lau Afioga i le Fofoga Fetalai. Ia, o le tau faapupulaga ae le o le mataupu lena na ala ai ona ou fia avatua le mataupu. Silasila lau Afioga i le Fofoga Fetalai, o le mataupu sa ou fia avatua i i, inside the trading, ioe. O tagata nei, o le latou loia o le Chairman o le EPC. Ma e mafai ona ou faamaonia. A o lea ua aumai le latou...

**FOFOGA FETALAI:** Le sui usufono mo Sagaga le Usoga, se ou te toe fautua atu, leaga o lea ua uma tagata Saina nei, a o lea o le a agai i le loia a le EPC. E tele lava le lavelave o mataupu nei e aafia ai le tatou Tulafono Tumau. Ia logosaia mai o lea ua fautua atu le Palemia, o lea foi ua ou toe fai atu, o loo i ai pea ala o mea e faaali ai, ae ona o le Tulafono a le tatou Maota, o i latou nei e le mafai ona tali mai, e le mafai foi ona latou saunoa mai poo le a le latou aafiaga i totonu o le inside trading lea ua e saunoa ai. Ou te toe fautua atu, finagalo malie e taatia le mataupu lea ae tatou agai i le...

**Tofa Levaopolo Talatonu:** Lau Afioga i le Fofoga Fetalai o se mea e fia faasao.

**FOFOGA FETALAI:** Malie lau Afioga i le sui usufono mo Gagaemauga Nu.2, o lea ua ou faauma atua le mataupu, o lea o le a see ese le sui usufono mo Sagaga le Usoga ma le mataupu lea ae faagasolo le tatou Fono.

**Tofa Levaopolo Talatonu:** Lau Afioga faamolemole, o le matuia ia o le mea lea ua talanoa i ai le sui usufono.

**FOFOGA FETALAI:** Malie le sui usufono mo Gagaemauga Nu.2. Le sui usufono mo Sagaga le Usoga, see ese ma le mataupu lea.

**Afioga MUAGUTUTAGATA FAAMAUSILI AUIMATAGI PETER AH HIM:** Ou te le iloa e aafia ai le sui usufono mo Gagaemauga Nu.2 i le kamupani lea lau Afioga.

**FOFOGA FETALAI:** O lea o le a ou faauma atua le tatou mataupu lau Afioga. O lea la o le a ou fai atu le sui usufono mo Sagaga le Usoga, see ese

ma le mataupu lea. Le sui usufono mo Gagaemauga Nu.2, o lea ua ou faauma atua, agai ese le sui usufono i se isi mataupu e faauma ai lau saunoaga.

**Afioga MUAGUTUTAGATA FAAMAUSILI AUIMATAGI PETER AH HIM:** Faafetai. O le a ou talanoa la i mea tau inside the trading. O le mea e tau o le inside the trading, o le faaoga lea o information mai totonu o se kamupani e fau ai se proposal. E le omai tagata mai fafo ma aumai fafo se latou proposal aua o tagata nei, o le isi e fai atigipusa e fai ai seevae, ae o le isi tagata, o le investment, ou te le iloa poo se consultant poo le a se tulaga.

**FOFOGA FETALAI:** Ia, sei tulai mai le Taitai o le Itu Agai.

**Afioga Hon Palusalue Faapo II:** Lau Afioga i le Fofoga Fetalai o se mea e fia faamalamalama, o lea lava e olo le fua ma maitau saunoaga a le sui usufono, ma e tele ana saunoaga e pei e saunoa faapaia mata, faafiapoto. O lea ua taofi atu lau saunoaga, ae fai lava, fai lava, fai lava. E leitioa foi a e faaletonu i le Tulafono ona o lou fiapoto ma lou fiafua.

**FOFOGA FETALAI:** Malie lau Afioga i le Taitai o le Itu Agai. Le sui usufono, o le ala lea o lau fai atu muamua, ma o lau toe fai atu mulimuli lea. E oo foi i le mea lea o le inside the trading, o lea e aafia uma i le mataupu na e laga muamua mai. A tilotilo mai foi le laumea i le tau faafoefoeina o le tatou Fono, ia see ese ma le mataupu lea.

**Afioga MUAGUTUTAGATA FAAMAUSILI AUIMATAGI PETER AH HIM:** Lau Afioga i le Taitai o le Itu Agai, na o oe lava le fiapoto lea e i totonu o le Maota lenei, aua foi e te le amiotonu. Ana e poto, e te fai foi i au sui usufono e step down.

**Afioga Hon Palusalue Faapo II:** Silasila la i le le mafaufau lea ua aliali mai? E te le faatonua au. A fai atu lou sese ae e fiapoto? Sei vaai i le mea lea ua e oo ai i le Tulafono, ua tataua ona e faamavae.

**FOFOGA FETALAI:** Malie le finagalo o le sui usufono mamalu o loo saunoa, le Taitai o le Itu Agai.

**Afioga Hon Palusalue Faapo II:** E le step down nisi o oe e tataua ona e step down ma e faamavae.

**FOFOGA FETALAI:** Le sui usufono mo Sagaga le Usoga, agai lau saunoaga i nisi mataupu o le tatou Tala Faatatau o le Tupe. O lea o le a tatou see ese mai nisi o fuafuaga ma mea lea e tau faatulaga atu i le tatou Fono, o lea ua avatu le fautuaga.

Ia, sei tulai mai le sui usufono mo Faleata Sisifo.

**Tofa Lealailepule Rimoni Aiafi:** Lau Afioga i le Fofoga Fetalai, e matagofie lava le tatou Fono pe a fai i le avafatafata ma le vafealoaloai. O la e faafofoga Samoa. A fai lau lauga ma lau saunoaga, se saunoa i ni mea anoa, saunoa mo oe, aua e te saunoa faalauaitete leaga o lea e faafofoga atu sui usufono mamalu o lenei Maota. O lea lava matou te onosai, ae aua le maua

loa tatou i le tulimanu ma mea faapea, o le mea lea e tupu ai le faaletonu, ona tatou taumafai lea e tuuai i nisi. Se vaai le tagata ia te ia, ia maua le loto maualalo ma fai faalelei tatou lauga ma fai i le ava mai o lea e ava atu. Ma le faaaloalo lava.

**FOFOGA FETALAI:** Malo. O lea ua maua le saunoaga a le sui usufono mamalu. Le sui usufono mo Sagaga le Usoga, aua le vaatele i lou finagalo le saunoaga a le sui usufono mamalu.

Ia, tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le ala foi lena na ou tulai atu ai e avatu le tuualalo i le sui usufono. E le faapea e le taua lana mataupu, e taua tele le mataupu lea e laga mai, a o lea ou te manatunatu loloto, e le o le auala lea e fai ai, leaga o lea e talanoaina le Tala Faatatau Faaopoopo o le Tupe. E matua leai lava se faia a le Tala Faatatau Faaopoopo o le Tupe ma le mataupu a ia lea e laga mai. E pei o le mataupu foi lele a ta alu alu lava ita ua i ai sata mataupu sau laga i inei, ae i ai le mataupu lea tatou te talanoaina, o le Tala Faatatau Faaopoopo o le Tupe. E tele lava le mau auala e faatino ai le mataupu lea e aumai e le sui usufono ae le o talafeagai le auala lea e aumai ai.

**FOFOGA FETALAI:** Ia, tulai maia le sui usufono e faaauau le saunoaga. Ou te talitonu ua lava tuleiga ma saunoaga ma fautuaga na ua tuuina atu e atagia ai lou amanaia o le Nofoa ma le faaupuga lea ua fai atu le sui usufono. Faaauau le saunoaga toe lima ou minute.

**Afioga MUAGUTUTAGATA FAAMAUSILI AUIMATAGI PETER AH HIM:** E faamalulu atu i lau Afioga i le Fofoga Fetalai i se upu ua siisii i lenei taeao. E faamalulu atu ona o tulaga foi na avatu ai le matou mataupu.

Ia, ou te talitonu lau Afioga ua tau sola foi manatu ona o lea sa faasolosolo lelei mai lava le matou lauga aua o lea e lauga faalauaitele, ae ua uma ona matou oo i le Tala Faatatau Faaopoopo o le Tupe, ua matou faafetai foi i le Tala Faatatau Faaopoopo o le Tupe, ma tulaga faapena. Ou te talitonu o le a faaoga a matou minute o lo o totoe e talanoa ai i nisi o vaega e ao ona talanoa i ai.

Ou te fia talanoa i le vaega a le media aua o lo matou taofi matou te lagolago tele i le galuega o lo o faia e le TV ma nusipepa, pau lava le talosaga ina ia paleni, afai ua latou faia se faamatalaga i le tulaga ua i ai se Faalapotopotoga po o ni tulaga ua latou manatu e tusitusi e tatau foi ona aumai le manatu o le isi itu, always there are two side to an issue, e tatau lava ona lua itu e paleni. O lau vaai atu i le tele o taimi matou te aafia ai e fai pito tasi lava galuega a le aufai nusipepa. Ona oo mai ai lea o le manatu ma le fesili, o ai la e lipotia le aufai nusipepa? Aua a ou vaai i tagata nei e taitaia nusipepa o isi tagata inu leaga lea i totonu o le bar ma faapisapisa. O ai la e lipotia i latou pe a oo ina molia a latou fanau i drugs ma mea uma faapena? O ai e lipotia i latou nei pe a o ta soa poumoli po o le onana ma le ola ai moli o le auala?

O tulaga ogaoga uma faapena aua tatou te iloa uma lava o alofa na o alofa nei. O ai e lipotia le fai nusipepa pe a fasi ava, pe iloa e le Victim Support lena mea? O le talosaga i le media ia faapaleni ona maua ai foi lea o sa outou

malamalamaaga aua e fai pito tasi lava. A silasila o le tele lava o mataupu a paleni lava ona lipoti mai e leai foi se isi e faitio.

Ona ou oo mai lea i le vaega lea o le transparency. E pei ona ou fai atu i le taimi ua sola, leai, tulou lava sui usufono o lena itu o le Maota, e le o po se lilo o lo o afio le sui usufono mo Aana Alofi Nu. 3, faapena foi le sui usufono mo Gagaemauga Nu. 2, ou te le i faalogo lava i le Taitai o le Itu Agai o alaga e step down, ae a tupu le mea iinei ona fai mai lea matou te step down, ae na o le matou alofa i le sui usufono mo Aana Alofi Nu. 3 ma le sui usufono mo Gagaemauga Nu. 2, e olo lava le fua ma matou nofo tatalo ia manuia le faigamalaga a le sui usufono mo Aana Alofi Nu. 3 i lana....

**Tofa Levaopolo Talatonu:** Lau Afioga i le Fofoga Fetalai o se mea e fia faasao.

**FOFOGA FETALAI:** Sei tulai mai leaga o lea na taua le suafa o le sui usufono mo Gagaemauga Nu. 2.

**Tofa Levaopolo Talatonu:** E i ai le eseesega o matou, e sao lelei lava le saunoaga a le Taitai o le Itu Agai, e le o maua o ni Minisita o maua o sui usufono. Ae le o faapea foi o saunoa atu le Afioga i le Taitai o le Itu Agai e step down le sui usufono, leai e step down ma tofi Minisita, o le sao lena o le saunoaga, a e le tau faia ia maua, o maua ia o ordinary sui usufono e le a?

**FOFOGA FETALAI:** E step down ma le Shadow Minister po o le?

**Afioga Hon Palusalue Faapo II:** Lau Afioga i le Fofoga Fetalai, ona o lea ua taua mai au.

**FOFOGA FETALAI:** Ia se i tuu atu le avanoa leaga o lea e taua le Taitai o le Itu Agai.

**Afioga Hon Palusalue Faapo II:** Ou te le o fai atu e te step down mai lou tofi sui usufono, o mea ia e tatau ona malamalama lelei, a foi o le tofi sui usufono na palota mai ai oe e lou Itumalo, a o tulaga maualuluga ma aloaia a le Malo lea e ala ai ona matou fai atu a e te lagalaga mai lava, o le tagata e lagalaga maa e ai e loata.... faamatalaga.

**FOFOGA FETALAI:** O lea ua maua le Taitai o le Itu Agai. Tulai mai le sui usufono mo Sagaga le Usoga, ou te talitonu e le vaatele i lou finagalo...

Ia se i tuu atu le avanoa i le Afioga i le Sui Palemia.

**Tofa Hon Fonotoe Nuafesili Pierre Lauofo (Sui Palemia):** Lau Afioga i le Fofoga Fetalai, o lea ua saunoa le Taitai o le Itu Agai i le mataupu, ae sa ou manatu lava e le toe saunoaina lea mataupu i totonu o le Maota o lea ua silasila ma maimoa le atunuu i le televise a o nusipepa foi o aso uma, aso uma ma aso uma, sa ou manatu lava e le toe oo i ai le tulaga o saunoaga. O lea mea o le step down lea ua aumai e faapea o tulaga tofi, ae silasila o le mataupu lea e talanoaina nei o le Tulafono Tau Faaofi o le Tala Faatatau o Tupe (Nu. 1) 2013/2014, o lona uiga o le tamaoaiga o le atunuu, o mea taua mea ia. O lea foi sa maua i le saunoaga i le televise i le Press- Conference a le

Taitai o le Itu Agai ma le Susuga i le Polofesa lea ou te le o vaai atu ai i, lea e faapea ua taugata le soifuaga, po o le a se faiga e tuu itiitia ai le tau o oloa, ma taumafa ma mea faapena. O le mea la lea ....

**Afioga Hon Palusalue Faapo II:** Lau Afioga i le Fofoga Fetalai talofa e, e toso ai le Fono i lenei mataupu o la ua i luma o le Faamasinoga.

**FOFOGA FETALAI:** Ia sei faamatala mai le mea lea e i ai le atugaluga o le Sui Palemia leaga o lea sa

**Afioga Hon Palusalue Faapo II:** Sa tatau ona fesootai laua ma lana Minisita Lagolago.

**Tofa Hon Fonotoe Nuafesili Pierre Laufo:** O le ala lea ou te fesili atu ai i le Taitai o le Itu Agai, a step down e pau ai la le tau o le eleni? E pau ai le tau o le araisa, suka ma le falaoamata, e pau ai? E leai, o le a la le taua? Ia sei silasila i ai i le papau tele o le tofa lea e aumai, step down, step down. Ia silasila o lea e i ai mea ogaoga o le Tala o le Tupe e tatau ona agai ma saunoa i ai, a o lea e saunoa mai iinei mea o step down, ae pau ai se Faigamalo pe a step down Fonotoe, e leai, e le taitai. O lea na tatou matamata i le televise i le la press conference na o laua ma se tasi o sui usufono mo Salega, Afioga Afualo Wood Uti Salele, o le tiga o Fonotoe ua tiga uma ai le Palemia ma tiga uma ai foi i latou. Ia sei silasila i nei saunoaga pepelo i le atunuu, a tiga ua tumu i le fiafia pau lava le tala lea ou te faalogo atu i ai o faapea “make ai” ia sei silasila la i ai. E o i luga o le televise ma pepelo le atunuu fai mai ua tiga, ae ou te le o faalogo atu lava o saunoa mai ua tiga i le faamasinoga o le sui usufono mo Gagaemauga Nu. 2 ma le faamasinoga o le sui usufono mo Aana Alofi Nu. 2. O mea ia sei tatou faatali ia o lea e tu le loma sei tatou agai ai e sailiili, o le faasalaga foi e pei ona ou fai atu e \$200, se i silasila la i ai. O le a la sau fua i faasalaga la e fai i faamasinoga o nuu \$500, \$1,000, a aafia ai la le sui usufono e faasala loa e le nuu i le \$1,000 e step down? Ia se i silasila la i nei ituaiga finauga e aumai, lau Afioga i le Fofoga Fetalai, matua vaivai tele nei ituaiga finauga faapea.

**FOFOGA FETALAI:** Faafetai i lau Afioga i le Sui Palemia, ou te manatu....

**Tofa Hon Fonotoe Nuafesili Pierre Laufo:** E faaiu atu ai lau tala e faapea, sa tatau ona e saunoa faafetai, ia vaai ia au o lea ua ou molia a o lea ou te faafetai i le Palemia, ae tatau ona e faafetai i le Palemia ua uma lelei lava le taimi o lau Paeaiga i le Kapeneta e lei molia oe a o oe le isi sa tatau ona molia, ia lena.

**Afioga Hon Palusalue Faapo II** Lau Afioga i le Fofoga Fetalai, tasi lava le mea lea e fia faasao.

**FOFOGA FETALAI:** O le a tuu atu pea le avanoa ae faapuupu mai lau Afioga i le Taitai o le Itu Agai.

**Afioga Hon Palusalue Faapo II:** Faafetai, e lei usu matou o laua lea na usu, a o lea ua saunoa mai e i ai isi mea matuia la e i tua atu. Ou te le iloa po o le a le uiga o le saunoaga lea a le Sui Palemia. A o le tulaga o le.....se nofo i lalo o lea ou te saunoa lau Afioga.

**Afioga Muagututagata Faamausili Auimatagi Peter Ah Him:** Ia ua maua atu....O lea ua ou fai atu po o ai oe?

**Afioga Hon Palusalue Faapo II:** E lei faatagaina oe e le Fofoga Fetalai.

**Tofa Hon Fonotoe Nuafesili Pierre Laufo:** Lau Afioga i le Fofoga Fetalai, se i faasao lava le mataupu lea ua saunoa le Taitai o le Itu Agai, e leai ou te le i fai atu o i ai nisi mea e ogaoga atu, na ou fai atu o le Tulafono Tau Faaofi o le Tala Faatatau o Tupe (Nu.1) 2013/2014. Ona pau lava le mea a e silasila i le talafaasolopito o mea nei o faigamalo, ona pau lava lea o mea e sui ai Faigamalo o le tamaoiga o le atunuu, o mea na e agai i ai saunoaga ae le faapea o se step down.

**FOFOGA FETALAI:** Malo faafetai, ou te manatu e faamalie atu i lau Afioga i le Taitai o le Itu Agai, o lea ua ou maua lelei lou finagalo, e leai, leai ni mea ogaoga i tua atu o le faamalamalamaga a le Afioga i le Sui Palemia, pau lava le mea na ou tuu atu ai le avanoa se i faafogafoga le Maota, ona ua ou maitau atu e pei ua va le fogavaa i lo oulua va ma le Sui Palemia, e le tau fesiligia le mafanafana tele o le lua mafutaga, sa fai lua semina a o le a e sana ita lava. O upu a le Tusi, aua ne i goto le la o e ita pea, na fai fai foi le mataupu na tulai mai ai le faiga semina ae mulimuli ane ua e alu na o oe ae tuu le Sui Palemia ma le isi toatele, aua ia e te toatamai faapena, e fou lo tatou taimi ma le mea ua oo i ai ae aua e te tuituliaupu.

**Afioga Hon Palusalue Faapo II:** Lau Afioga i le Fofoga Fetalai, na o se mea lava e fia faasao. E leai lava sou ita i lena tulaga, faafetai ua ou sau na o au ae nofo Ia i o, nofo ia o le Sui Palemia, ae le faapea e ita i lou fai atu e step down, leai e ala ona ou fai atu ona o le mamalu o le tofi Sui Palemia, e puipui i ai, e sao oe o lau uo lelei le Afioga i le Sui Palemia, ae le avea ai le faauo e tuu ai le mea e tataua ona fai aemaise e mafana le ma mafutaga.

**FOFOGA FETALAI:** O lea ua maua le Taitai o le Itu Agai lou finagalo, o lea ua faauma atu le mataupu, o lea ua ou maua le finagalo o le Taitai o le Itu Agai. Se paga oe lou soli Fono se, e fai atu lava ae agai mai o lea e taumafai atu – e le faigofie upu ia na lafo leaga o lea e faafogafoga le atunuu po o fea e saga tonu i ai uiga o upu ma le faamatalaga o lea ua i luma o le faamasinoga. Ua uma foi ona ou tuuina atu aulape o lena mataupu tatou te le tautalagia o lea ua maua le malamalamaga sili o le faamoemoe.

Tulai mai le sui usufono mo Sagaga le Usoga e faaiu mai lau saunoaga ua maea lou taimi.

**Afioga MUAGUTUTAGATA FAAMAUSILI AUIMATAGI PETER AH HIM:** Faafetai lava i lau Afioga i le Fofoga Fetalai, o lau uo foi le Taitai o le Itu Agai, a o lea ua ou te i atu i le maemaea o le toaina i lena taeao. Ona

pau lava lau tala lea na fai ia faapaleni, a tupu le mea i le la itu ia – a o lea ua tupu le mea i lenei itu o lena, e le tau fai atua sa matou faamatalaga.

**FOFOGA FETALAI:** Ua maea le taimi o le sui usufono.

**Afioga MUAGUTUTAGATA FAAMAUSILI AUMATAGI PETER AH HIM:** Faafetai i lau Afioga i le Fofoga Fetalai mo le avanoa, faafetai foi i le faafogafoga mai o lou Itumalo aemaise o Samoa atoa. Ia manuia le Fono a le Palemene.

**FOFOGA FETALAI:** Malo faafetai saunua i lenei foi vaega o le aso, ou te manatu ua aoga felafolafoaiga ua malamalama ai nisi o mataupu ina ia manino ma malamalama lelei. Ae avatu pea le fautuaga a le Nofoa, ta te tu lava i le too ae tepa i le ata i le naunau atu ina ia mulimulitaia a tatou Fonotaga. Aua ne i faaaogaina sese mataupu o le tulaga o le lauga faalauaitele i luga o le Tulafono Tau Faaofi o le Tala Faatatau o Tupe (Nu. 1) 2013/2014. O lea lava e avatu le avanoa ona o le ava atu i o outou finagalo i nisi o mataupu, ae faamolemole le paia o le tatou Maota, tatou tautu i le Tulafono Tau Faaofi o le Tala Faatatau o Tupe (Nu. 1) 2013/2014 ma le atinae manuia o le tatou atunuu, ae taatia nisi filauia ma nisi o mataupu o lo o talanoaina o lo o i ai le auala e faatino ai. E i ai foi le auala e pei ona saunua atu le Afioga i le Palemia i mea tau administrations ma operations ma mea uma, o lea foi e avanoa le Tulafono pe a o ni mataupu ogaoga e pei ona tau atagia i ni finagalo o nisi o sui usufono. E tatalo atu ai mo i latou e le i saunua, tuu sao le saunouaga ma tuleiga i le Tulafono Tau Faaofi o le Tala Faatatau o Tupe (Nu. 1) 2013/2014 e pei ona talanoaina i le tatou Maota Fono.

O lea ua avanoa le Maota mo se isi sui usufono e fia saunua. O lea ua tulai mai le sui usufono mo Anoamaa Sasae.

**Tofa ALO FULIFULI TAVEUVEU (Anoamaa Sasae):** E muamua lava ona ou faatalofa atu i le maualuga o le Maota o Samoa. Lau Afioga i le Fofoga Fetalai, faapea foi le paia o lenei Maota i le afio mai o le Afioga i le Palemia o le Taitai o le Malo, afio Afioga i Minisita faapea le Taitai o le Itu Agai aemaise o le mamalu tele i sui usufono. Ou te manatu o lo o i lumamea le faamoemoe o le Palemene i lenei taeao, atonu foi ua malie eseese foi finagalo o lenei Maota i le tulaga ua lagalaga i totonu o le tatou fonotaga, ae peitai atonu o le a maua se leleiga ma se tulaga manuia aua le faafogafoga a le atunuu.

E avea foi lenei itula e momoli atu ai lau faafetai tele i lou itumalo o Anoamaa Sasae ona o le lavapapale mai pea ma le tapuaiga a lou itumalo aua le alofaiva o lo outou sui usufono i le faalagamaea a le tatou atunuu. E molimoli atu foi le agaga o le faamanuiaga i le tausaga fou, ona e le i maua lava se avanoa tatou te feiloai faatasi ai, ae manuia tele le tausaga fou.

Ou te faafetai atu foi i le tapuaiga a le tatou atunuu i Lana Afioga Mamalu O Le Ao o le Malo ma lau Masiofo, aemaise foi le Sui o le Fono a Sui Tofia ma lau Masiofo, aemaise foi o le mamalu tele i le tapuaiga a le tatou atunuu, i Auauna Paia a le Atua o lo o faafaletui i afioaga ma alaalafaga aua le nonomanu aua se manuia o le tatou Malo mo le lumanai.

O le tulaga o lenei faamoemoe, e talitonu lava le taofi e momoli atu le faafetai tele a lenei sui usufono i le vaavaai atu i le tulaga o le Tala Faatatau

Faaopoopo o le Tupe i lenei tausaga. E maeu lava le agaga faafetai, e fia faafetai atu i lau Afioga i le Minisita ma le Matagaluega aua e tele mea taua lea ua aliali mai i lenei Tala Faatatau Faaopoopo o le Tupe. E le gata i lenei seleni, aemaise lava o le seleni lea ua maua fua e le tatou Malo, e talitonu le taofi, o mea ia na maua mai i a outou galuega, ona o la outou silasila mamao ma le puipuiiga lelei aua le faafoeina o le tatou Malo i mea tau tupe. O tulaga ia e aliali mai ai o lo o lava puipuia tulaga o tupe aua o le tupe lava o le manuia o se atunuu. Peitai, o lea ua atagia mai le matagofie o a outou galuega sa fuafuaina ma ua tulaga manuia ai lenei faamoemoe, ma maua fua ai e le tatou Malo, aemaise le tatou atunuu nei fesoasoani tele mai faletupe mai Asia.

E le gata foi i lea, e momoli atu le faafetai i paaga uma a le tatou Malo o loo latou galueaiina le tamaoaiga o le atunuu, a o lea foi ua tele le fesoasoani mo le Tala Faatatau Faaopoopo o le Tupe i lenei tausaga. Ia, ona oo atu lea o se faamatalaga e molimoli atu ai le agaga faafetai i le tatou Paeaiga i lenei tausaga. Ua mavae atu tausaga e lua ua mavae, ae ou te manatu ua toe lua ma le afa ia te au, a o loo vaaia pea ma taumafai atu lava lenei itumalo mo ni tulaga e fia faaleleia o lenei itumalo talu mai lava ona tulai atu i lenei tulaga mo se faamanuiaga a lenei itumalo, a o loo talitali lava le paia o le tatou Palemene i se fesoasoani mo lenei itumalo. Ona auala atu lea o se manatu lau Afioga i le Minisita o loo feagai ma tatou galuega.

E muamua lava ona momoli atu le agaga faafetai i le afa o Eveni talu ai nei, ae tele foi ni mea o lenei nuu sa faaleagaina, e i ai le vaitele lea e i Falefa sa faaleagaina ona o le malosi o le tafe o le vai, a o lea ua maea ona toe teuteuina ma toe faataina ma toe faaleleia ia tulaga. Malo faafetai le galue.

E fia momoli atu foi le faafetai i lau Afioga ona o nisi tulaga ua faaleleia o lenei itumalo. E maitauina i le lauga talu ai i le tausaga ua mavae i le tatou Tala Faaletupe lenei sa ou talosagaina ia lenei itumalo i nuu o lo o i tua aemaise nuu nei i Sauano ma Saletete, Lalomauga o loo mamao ese ma le auala. Ua matagofie i le vaai atu ona o le oo atu o le teuga o tafaala ua oo lava i nuu ia, ua maea ona teuteu lelei. Ma e talosaga atu ina ia faaauau pea lea auunaga a o lea foi o le a sauni le tatou atunuu mo le tatou taligamalo, ina ia aliali ai pea le matagofie i totonu o le atunuu.

E talosagaina foi lau Afioga i le Minisita, ua faalogoina foi ua amata ona fuafuaina e lau Matagaluega i totonu lava o Falefa o i ai le auala galue ae o lo o i ai ma le faleaoga i totonu o lenei nuu. O le auala e alu agai i uta i lenei faleaoga, ua matua faaleagaina lava, a o lena foi o loo i ai talosaga o lenei auala galue, ma e talosagaina lau Afioga, sei e tagai ifo i le auala galue o lenei nuu faatasi ai ma tulaga ia ina ia faaleleia atu ai ma le teuteuina o le auala aua alo ma fanau o lenei nuu o loo gasolo atu i nei nuu.

E faapea foi ona lagona le agaga faafetai ona ua logoina foi nisi o lenei nuu o lo o fuafua le Malosiaga Faa-Eletise (EPC) e faaauau atu le uila i le auala lea e alu i auala galue o lenei nuu i itu uma e lua. Atonu o se tulaga lelei foi lea e faaauau atu ai ma tulaga o le teuteuina o lenei nuu i auala galue, aemaise lava le faaleleia o auala galue o loo i ai nei. E talosaga atu i lau Afioga sei e tagai ifo i le talosaga o loo i ai ina ia faaleleia atili tulaga o lenei alaafaga.

Ona oo mai lea o se talosaga ma se faamanatu atu foi i lau Afioga i le Minisita mo le Siosiomaga, ia e le o toe po se lilo o lena ua e silafia le tulaga o lenei nuu o Lalomauga, ua uma foi ona silasila i ai lau Afioga i le tulaga faigata ma le fita o loo i ai lenei alaafaga, toetoe lava a tafe lenei vaitafe tele i totonu o le alaafaga ae ua tele foi nisi tulaga ua faaleagaina, e amata mai



lava i le taimi o le afa o Eveni, e oo mai lava i le taimi o timuga lea faatoa uma atu nei, a ua faateteleina lava lona faaleagaina. Ae i ai le faamoemoe o lena ua taatia atu i lau Afioga se talosaga ma e manatu foi ua lava tapena ai foi ma sauniuni i ai lau Afioga ma le Matagaluega mo se tulaga lelei mo le faaleleia o lenei tulaga i totonu o alaafaga o lenei itumalo. E molimoli atu foi le agaga o le toe fia tuuina atu o se talosaga, tasi lenei mea sa taua lava i lau lauga faataupou foi lea na ou le toe taupou ai, o le taligalu o lenei nuu o Falefa. O le taligalu lenei, na sauni lava lenei alaafaga a o i ai foi le sa nofoia muamua lenei Nofoa ma faatalosaga, ma sa oo atu lava le tulaga sa i ai le faamoemoe o lenei Palemene o le a faataunuu le taligalu o lenei nuu o Falefa. E toe faamanatu atu, e oo mai nei, o lea lava e tatali Falefa i se taligalu, toetiiti foi toe oso mai se Tsunami ona toe aafia lea o lenei nuu i ia tulaga faigata. E faamoemoe lava o lena ua taoto atu se talosaga ina ia faautagia mai ma fesoasoani mai i le fita o loo feagai ma lenei alaafaga.

Na pau ia o nai talosaga e fia molimoli atu i a outou Afioga i Minisita, aemaise foi le mamalu o le Kapeneta ina ia saunia. Na pau lava o lea, lau Afioga i le Minisita o Tupe, o lena foi ua taoto atu le talosaga, e te silafia o lenei lava nuu o Lalomauga, ua matua faaleagaina lava le lotovai atoa, le mea e tafe i ai le vai. O le faigata o loo i ai, ua tau le tafe lelei le vai ua alu solo i lenei auvai ma tau le maua lelei ai se auala mo faatoaga a tagata i le feoai o tagata e kolosi lenei vaitafe. A o lena sa tagai foi i ai lau Afioga i le tulaga faigata o lenei afioaga ina ia foia se vaega ina ia faatulaga lelei aua le femalagaai o lenei alaafaga i le kolosiina o le vai aemaise lava taimi e oo mai ai le malosi o lenei vai.

Ia, na pau lea o se faamanatu atu a lenei itumalo, ia manuia tele lenei aso ma le alofaiva o le tatou Palemene. Soifua.

**FOFOGA FETALAI:** Malo saunoa i le sui usufono mo Anoamaa Sasae, e manatu ua faafofoga le tatou Malo aemaise le Kapeneta i talosaga ma manaoga o le tatou nuu. Faafetai le saunoa.

O se isi sui usufono o loo fia saunoa, o loo tele pea le tatou avanoa. Ia, tulai mai se tasi o sui usufono mo Vaimauga Sisifo, Tofa Lenatai Victor Faafoi Tamapua, ua avanoa le Maota mo le saunoaga.

**Tofa LENATAI VICTOR FAAFOI TAMAPUA (Vaimauga Sisifo):** Faafetai i lau Afioga i le Fofoga Fetalai e tusa ai ma le avanoa. Faafetai foi i le Afioga i le Palemia ma lau Kapeneta, afio le Afioga i le Taitai o le Itu Agai ma le Sui Taitai, aemaise foi o sui usufono mamalu uma o le Palemene o Samoa. E faatalofa atu foi i Ofisa Sili o Pulega, aemaise foi o Sui Sinia o Matagaluega ma Faalapotopotoga ua mafai ona tatou faatasi foi i lenei taeao. E faatalofa atu foi i le faafofogaaga a le mamalu o le atunuu, a o le faatalofa faapitoa i le tapuaiga a le itumalo pele o Vaimauga Sisifo. Malo lava le soifua maua ma le lagimama i le alofa ma le agalelei o le Tama i le Lagi. Lau Afioga i le Fofoga Fetalai, o le a le umi se faamatalaga a lou nei sui usufono, ae tau ina faaleo le lagolago i le Tala Faatatau Faaopoopo (Nu.1) o le Tupe 2013/2014. Faamalo faafetai i lau Afioga i le Minisita o Tupe ma lau Matagaluega e tusa ai foi ma le tapenaga. Faafetai foi i le tatou Malo mo le siitaga o totogi o tagata faigaluega, aemaise o le tupe faaopoopo mo penisione a tagata matutua.

Lau Afioga i le Fofoga Fetalai, o le a faaoga foi lenei avanoa e tolaulau faalauaitetele ai nisi o manaoga o lenei itumalo, ae o le a ou le oo i le loloto, ona ua maea foi ona faaoo atu i talosaga tusitusia i Afioga i Minisita. O le faaleleia lea o le taligalu i Vaiala ma le agai atu lea i Taumeasina ma Moataa. O le aualatele mai Vaivaseuta e agai atu i Magiagi. O le auala lea e foliga o se auala galue, ae a tuu i se isi itu, o le access road foi, e mafai ona taamilo atu ai i Vaivaseuta ona oo mai lea i Magiagi, agai atu foi i le faatanoa o loo i uta i Magaiagi. O le faleaoga tulagalua i Moataa, o le auala savali i le togatogo i Moataa, o le auala i se pitonuu o Faatoia ma Vaivaseuta ma se auala taavale i Ueligitone i Magiagi.

Ae ua i ai le talosaga faaopoopo i lenei taeao lau Afioga i le Fofoga Fetalai, ona o se faalavelave na tupu i le po anapo. O le magafa lea e i luga tonu o le aega mai Lelata e agai i Magiagi ma Vaivaseuta i autafa ane o le fanuatanu lea e i Magiagi ua faaigoa nei e lau fanau o le danger zone. E le gata i le i i o pau o taavale mai le taeao seia oo i le po ona o le taofi faafuasei, ae i totonu o masina e 6 mai ia Setema i le tausaga ua tea sei oo mai i le po anapo, ua soa sei tulou faatolu le matou pa piliki o lea e lio ai le matou fanua. O le saoga lea mai le Kolisi o Samoa e agai mai luga o le aega mo Lelata, e fai lava sina milotu, o le uiga o lau faamatalaga a saosaoa le sau o se taavale mai Vaivase e agai mai i le aega lea, e lua lava mea e filifili ai le avetaavale, o le mimilotu ona taavalevale lea o le taavale i lalo o le aega, a leai, sau sao loa i le matou pa, ua tele ina filifili e sau sao i le matou pa. O lea la e talosaga atu ma le faaaloalo i lau Afioga i le Minisita mo Galuega, Felauaiga ma Atinae Eseeese i se fuafuaga aua foi ia le saogalemu o le alatele e feoi ai ia o tatou tagata, ia pe fai foi se hump i luma ifo i autafa ane o le falesa Aso Fitu e mafai ai ona faailoa i avetaavale o lea ua latalata i le faailoilo lea e i ai le stop sign aua ua tele ina le amanaia e o tatou avetaavale.

Ia lau Afioga i le Fofoga Fetalai, o le naunautaiga lava aua le saogalemu o avetaavale aemaise foi o e o lo o faaoga auala savavali i autafa ane o le alatele.

Lau Afioga i le Fofoga Fetalai faafetai mo le avanoa. Lou itumalo pele o Vaimauga Sisifo, faafetai tatalo faamalo tapuai, ia alofagia e le Tama i le lagi le tatou folauga i lenei tausaga, faafetai.

**FOFOGA FETALAI:** Malo faafetai timai. E manatu o lea ua maua lelei e le Afioga i le Minisita mo Galuega le atugaluga o le sui usufono, aemaise foi o le tuuina mai o se mataupu na faatoa tupu anapo, o le agaga lelei lena ma le taua e le moemoenoa le paia ma le mamalu o sui usufono o lo o lipoti mai mea na tutupu o mea sa tutupu ma mea ua tutupu, ia faafetai.

Ua avanoa le Maota mo se isi sui usufono e fia saunoa. O lea ua tulai mai se tasi o sui usufono o lea itu o le Maota, le sui usufono mo Sagaga le Falefa.

**Afioga TUISA TASI PATEA (Sagaga le Falefa):** Faafetai atu i lau Afioga i le Fofoga Fetalai, sa ou faapea o le a leai sau faamatalaga e avatu ona o lau Matagaluega lea e ona le Tala o le Tupe, ae faafetai tele mo le avanoa.

Ae ou te lei utufiaina la le makei o Aiga e tolu ma le Aitutagata pei o le muai fetalai i Saumaiafe, ia ou te tapui le tapu Tama a le Taofia ma Saleutogi ae faigata le paia ma le mamalu lea e sasao nei i le Maota. O le paia

foi ma le mamalu o le malae i Tiafau nei o le malae o le faautuga tootoo o le atunuu.

Lau Afioga i le Fofoga Fetalai, lau Afioga i le Palemia, Sui Palemia ma le Kapeneta, lau Afioga i le Taitai o le Itu Agai aemaise sui usufono mamalu uma o le Maota. E faapena foi ona faatalofa atu i Faauluuluga uma a le Malo ua tatou faatasi i lenei foi taeao liugalua, o i latou o lo o fitaituga i le tautuaina o Matagaluega uma a le Malo aua se manuia o le tatou atunuu.

E faapea foi ona faatalofa atu i le vaega o le Tafatolu o le Faigamalo, Lana Afioga Mamalu O Le Ao o le Malo ma lau Masiofo, lau Afioga i le Sui Tofia ma lau Masiofo, le Afioga i le Faamasino Sili ma le Ofisa o Faamasinoga. E le mafai foi ona galo le tapuaiga mau a Samoa o lo o tui mai le mulipapaga i maota ma laoa e tapuaia o tatou faiga alofilima aua lava le manuia o Samoa e ala i le Maota Fono lenei.

O paia o Aiga o Nofo, Aiga o Tupu, Aiga o Papa, Aiga na Tafaitoa o Tootoouli o Tootoosina o Tulati ma Tulatoa ma le aufueloloa o Faleupolu tofia, mai lava i e matutua tuua sinasina ua pulapula lagoto lo latou soifua e oo lava i se aupito itiiti, faamalo, malo le soifua ma le lagi matafi. E faatalofa atu i le amatalia foi o lenei tausaga fou, faamalo le tapuai.

E le mafai foi ona faagalo ia le Aiga Sa Levi le paia i Auauna o le Talalelei o Auauna Paia a le Atua, e talitonu le taofi o lo outou sao e ala i le faanonomanu, o lo outou tatalo faipea i so o se fata faitaulaga i so o se nuu ma alaalfaga o lo o faafaletuluia ma faafale le malu ai, aua lava le talosia o se manuia o Samoa, ma e talitonu le taofi, e faale lava le tamaoaiga o le tatou atunuu e ala i le vao ma le sami, ae a ua tatou tagai i lenei Tala o le Tupe Faaopopo, e maeu le alofa o le Atua ia Samoa, aisea? E mafua mai i Auauna o le Talalelei o lo o nonomanu aua le atunuu, aua Samoa mo a taeao. Ia faafetai atu i la outou faiva alofilima ma lo outou fatu aiga tausi, aua se manuia mo le tatou atunuu.

E avea foi lenei avanoa ou te faatalofa atu ai i lou itumalo pele ia te au o Sagaga le Falefa, le paia i Fogaa ma malae Paepaetui ma Vaione alofa e afifio ai ia Toetaufanua, susu alo o le Malietoa, afifio ai le Maopu, alaatai lau fetalai le Tagatafou, lau fetalai Laupa le faletolu ma Tapunuu. Le paia i Fuafua ma le Fuluva e susu ai alo o le Malietoa, e afifio ai sa Tilialo, lau fetalai Luatua ma le Gautaala ma le faletolu. Le paia i Falesoa e afifio ai le aiga Sa Pula ma Usoalii ma le nofo a Maopu, alaatai lau fetalai le Aitutagata, lau faletolu ma le Gautaala. Avevai e afio ai oe le Faasaosao o le aiga Sa Tilialo le Matua aemaise foi le Gautaala ma le Faletolu. Le paia i Niuvai ma Mataale, e afifio ai le Toetaufanua ma le la tama ....le Matiu o le Galumalemana ma le Luafalemana, pola puipui le Gautaala ma le Faletolu ma Siufanua. O le malae i Lotosoa e faamemelo i ai Aiga e tolu ma le Aitutagata na Faialaga i le Tuamasaga, le Faletolu ma le Gautaala, o paia na o le ta itumalo.

E avatu le faamalo ma le faafetai tele i la outou tapuaiga aua foi tausaga ua mavae, aemaise foi o lenei o le a alu ua tau amata o tatou galuega fai i totonu o nuu ma alaalfaga, ia faamalo faafetai. Ou te talitonu e leai se mea e mafai e la outou sui usufono, a o lo tatou galulue faatasi, aua lava le tau atiaaina o nisi o galuega i totonu o tatou pitonuu ma fuaiala taitasi.

E le galo foi Auauna a le Atua i lo tatou itumalo, lau afioga Patele Lu faafetai tele le onosai, o le a foi se faaletonu o le fanau, malo le mau o le

toovae faafetai i lou alofa i tupulaga o le tatou pitonuu. O Auauna a le Atua i so o se fata faitaulaga, faafetai, faafetai, faafetai tatalo.

Sei avatu se faamatalaga i le tatou Tala Faaopoopo o le Tupe i lenei foi tausaga, e ui lava foi ina avatu i le taimi ua mavae o le matou Matagaluega, e avatu le faamalo tele i lau Afioga i le Minisita aemaise foi o le taiulu o le tatou Matagaluega ma ofisa taitasi malo le galulue. E lagolagoina foi e le sui usufono mo Sagaga le Falefa ma lenei usugafono le matagofie o le faasoa i lenei foi Tala Faaopoopo o le Tupe.

O nai motugaafa e tuualalo aua foi ia le faagasologa o galuega o lenei foi tausaga mo le agai i luma. E talitonu ua toatele i latou ua saunoa ma fetalai foi nisi o sui usufono o le Maota i le tele o nisi o fuafuaga pei ona faataatia aua le agai lelei i luma o le faagasologa o galuega a lo tatou Malo.

Ou te amata atu i le Afioga i le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei, o le Matagaluega sa ou i ai muamua e pele foi ia te au. Lau Afioga i le Minisita faafetai tele e avatu le faamalo i afioga i komesina lagolago, faamalo, e talitonu o lo o nofofale ia Satuiamaa i le atunuu atoa le tulaga o lo o i ai la outou taitai, o lo o talia lupe o mau ma lupe pupula aua se faaiuga, ae tou te lei alo tamala i le matagofie o le faatinoina o la outou matafaioi i le vaitaimi o aso fiafia, e moni ai upu a le atunuu, 'e le iloa se tautai matapalapala i le taimi e malu ai le tai, faatoa iloa lava le tautai matapalapala i le taimi e sousou ai le vasa, pei ona i ai a outou afioga i komesina lagolago ma faauluuluga o vaega taitasi a le Matagaluega matagofie le faatinoina o la outou tiute e pei ona i ai le vaitaimi o aso fiafia, e leai ma se faafitauli na i ai le vaitaimi o aso fiafia, ia e leai ma se faafitauli na i ai po o ni faalavelave na tutupu vagana ai foi nisi o faalavelave ona o le tatou faatamala lava ina ua maea aso fiafia.

O le a ou oo atu i le Matagaluega o le Soifua Maloloina, e talitonu na o le faafetai lava e avatu, faafetai atu o lena ua amatalia le galuega i Afega o le Laumua o Tumua, ia faafetai atu, ou te talitonu foi e ui lava foi o totonu o Sagaga le Usoga ia a o Sagaga le Usoga ma Sagaga le Falefa o le auso, e omai uma i ai e faaoga le tatou atinae lea. E faafetai atu e talitonu o lo o i ai nai faafitauli laiti ia o le a ou oo atu i ai i se taimi.

Le Minisita mo Aoga, Taaloga ma Aganuu e faapena foi e avatu le faafetai tele i lau Afioga i le Minisita ona o le Kolisi o Sagaga e ui foi ina luga lalo, ae talitonu ua uma faataatitia aulape ma taiala e faagasolo ai le faamoemoe lea i le tatou aoga, ona e i ai le talitonuga e ese le aoga ona o le tupulaga foi a lenei foi itumalo aemaise ia taiala ua faataatitia e le Matagaluega mo le agai i luma.

E avatu foi le faafetai tele i lau Afioga i le Palemia pei ona maua i lau saunoaga i le itula ua sola, e moni lava o lo o i ai faafitauli i eleele ia e lua, e pei ona maua tafafao foi taliga o tufugauli i tala e aumai. O le mea lea ou te tatalo atu ai i le tatou nuu i Afega, o oe o le Laumua o Tumua, i le paia i le Aiga Sa Gauifaleai, Fata ma Maulolo ma Tuitui o le Natoaitete, Tuisamau ma le Vagana na autaele ai le Alataua. O paia ia o si ou nuu i Afega, ou te tatalo atu ia outou alofagia, e pei lava ona maua mai i le saunoaga a le Afioga i le Palemia, e toe valuvalusia ai foi aa o le laau i se tofa autasi i le paia i Aiga ma se faautautaga loloto, le susuga pau ia te oe Tuisamau Fata ma Maulolo, ia alofagia le avanoa lenei ua maua mo i tatou, aua si o tatou nuu ma si o tatou itumalo ma tupulaga lalovaoa mo le lumanai. Ia outou alofagia le avanoa ne i maumau. Ia aua ne i melea lenei avanoa lelei ma le taua mo i tatou. E faaoololomaa atu ai ia te outou le tatou nuu, leai o oe lava o le Laumua o

Tumua. O Tumua uma lava i inei i Upolu, ae mua lava oe, o oe o le Laumua. Lau Susuga Fata ma Maulolo, alofagia ina ia soalaupule nei mataupu uma ia maua se toafilemu ia mafai ona faatinoina galuega uma a le tatou itumalo e ala i le tatou kolisi i Sagaga, aemaise foi le tatou falemai aua le manuia o si o tatou itumalo, aemaise lava oe o le Laumua, mo se manuia mo oe mo a taeoa ma tatou uma.

Ia, ona oo atu lea o lau tautalaga i le Matagaluega o Faamasinoga i lau Afioga i le Minisita, e talitonu foi ua faafagogo tagiao i lau faafofoga i nisi foi o saunoaga ma fetalaiga, sa avatu foi i nisi o Fonotaga, e ese le taua, i le talitonuga o lenei usugafono, o se tuualalo, e taua tele le i ai o se sao o i latou o alii ma tamaitai loa mo le taitaiga o tatou Faamasinoga nei i totonu o le Ofisa o Fanua ma Suafa i le Faamasinoga a aiga, o measina a o tatou aiga. Ua i ai le talitonuga o loo tatou manatu mama i tulaga ia i Faamasinoga a o tatou aiga, sei tulou, ae i ai lava le talitonuga e ese le taua ona o measina a aiga. E pei foi ona maua i le saunoaga a le Tamaitai tasi, e i ai nisi o gafa e sese. Ou te talitonu o le aoga foi lea o fuafuaga pe a oo i ai ina ia malupuipua tulaga uma ia e pei ona taua. Ae faafetai atu i le tatou Matagaluega i le Afioga i le Ofisa Sili o Pulega, ia, e fiafia lava foi e tagatagai atu ma tilotilo atu ua matagofie foi le tele o galuega i le taimi sa asiasi atu ai, ua matagofie le tatou Matagaluega o Faamasinoga. Faafetai tele.

O le Matagaluega mo Faatoaga, lau Afioga i le Minisita, ia, ne i te i ua maitau mai se leo, a o le toe faapoopo atu foi ma tuualalo atu i le tatou... ou te talanoa lava au na o le talo, na o le talo lava. O le talo lava, o le talo, talo. I Niu Sila, aemaise lava i Niu Sila ma Ausetalia, na o tatou tagata lava o loo faatauina le talo. E faafetai atu foi i lau Afioga i le Sui Palemia, ua saunoa foi le Palemia i nisi o Polokalame sa auai i ai, aemaise foi lau Afioga i le Minisita, o lea ua manino le mata o le vai. E i ai lava le talitonuga tatou te tuitui pea, aemaise i o tatou tagata o loo faatauina le talo i Samoa ma aumau i Samoa, o loo i ai le Faapotopotoga o Ekalesia Soofaatasi, soo se Ekalesia o loo fai mai a latou fonotaga i totonu o Samoa nei, a o le toatele oi latou o loo i Niu Sila ma Ausetalia, ou te talitonu, a mafai ona fai i ina se komiti galue foi lea e tilotilo i ai i auala e mafai ai ona maketi atu le tatou talo aua o Samoa lava lea e faatauina le talo a Fiti. Ia, o le tuualalo lena i le ava ma le faaaloalo.

O le Afioga i le Minisita mo le Soifua Maloloina, lau Afioga i le Minisita mo Aoga, Taaloga ma Aganuu ma le Minisita mo Tagata Tafafao Mai Fafu, e tasi lava se mataupu ou te fia tuualalo ai, masalo e lavevea uma ai lava ma le tele o Matagaluega, o lea foi e faalogologo atu o lo o lavea ai foi ma nisi o le Matagaluega a Leoleo. O le tatou customer service, e ese le taua o lea... ae i ai le talitonuga, e fofoa mai lava i totonu o tatou aoga, o aganuu ma faalauaitete ma ii isi industries, ae amata mai lava i totonu o aoaoga, e build ai le... o le customer service a tatou, e i ai lava lou talitonuga o loo fai lava sina pau. Ou te le toe talatala atu le uiga o lea faamatalaga o lena e silafia uma e tatou, o loo i ai lava nisi o Matagaluega o loo faaletonu le Customer Service, e i ai le talitonuga e mafai ona faaleleia atili i totonu o Matagaluega e pei ona tauina atu, aua o le isi lea tulaga e tataua ona i ai ina ia faaleleia atili aua le fiafia o i latou o lo o fai mai o le autafafao, aemaise ai foi e le gata o le autafafao a o nai o tatou tagata o loo manaomia fesoasoani i totonu o Matagaluega. E moomia lava e pei foi ona taua e nisi o sui usufono, ia, e combine ai i ina le tatou vafealoai, o le faaaloalo ma le faa-Kerisiano, aua e le

o se faa-Kerisiano le mea lea o le sau o le tagata matua ae tu atu le tamaitiiti o loo alu atu e serve ae ese tala e fai i ai.

**FOFOGA FETALAI:** Toe lima minute o le sui usufono.

**Afioga TUISA TASI PATEA:** Ia, ona faauma atu lea o lau tamai tala, e avatu le faafetai tele i lau Afioga i le Minisita mo Galuega, Felauaiga ma Atinae Eseeese mo galuega fai o lena tausaga ua mavae, ua maea si ou auala i Levi. E pei lava foi ona silafia e lau Afioga, e feoloolo lava foi nai auala o lenei itumalo e lei maea. O le a ou amata atu i le auala i Utumoa ma AeLe. O le tele ia o tagatanuu lolotu o loo i ai le Metotisi, o le AOG ma nisi o fatafaitaulaga e faaagaina le auala lea e alu agai i uta i AeLe, e faigofie foi pe a lelei feutanaiga o le galueaiina o auala nei e faafaigofie ai le agai i uta i nuu ma agai atu i Tafaigata.

O le auala lona lua o si ou pitonuu i Alamutu, o loo faapena foi ona moomia. O si ou pitonuu i Lotosoa, o Nonoa, o Utualii ma Tufulele. O nisi na o auala o loo manaomia e fia faia ona e lei oo lava i ai se ta. O le isi auala e manaomia foi le fesoasoani i lau Afioga i le Minisita o Galuega, Felauaiga ma Atinae Eseeese, o Saleimoauta. E pei lava foi ona silafia, tasi lenei pitonuu o Saleimoauta ua toatele lava i latou ua aumau ai i le taimi lenei. O new subdivisions uma lava na e i ina, ae faalelelei lava auala faamolemole. E manaia lava ae fesootai atu ma Lotosoa agai i uta ona faigofie lea ona feoi nai tagata, aemaise o alo ma fanau i aoaoga.

E avatu foi le faafetai tele i lau Afioga i le Minisita ona o le vai i Falelauniu, faafetai foi i le Palemia ma le Malo o loo faatinoina nei atinae uma, faafetai tele, o lea ua ola mai le vai ae lei mafai ona faasafua foi lele i aiga taitasi. E toe soso atu ai foi i le ava ma le faaaloalo ia alofagia ona o loo talia foi vai o nai na pitonuu. E feoloolo lava nai tagata o lo matou itumalo o loo i ina i Tafaigata ma Nuu o loo manaomia lea auaunaga. E faatasi ai foi ma...

**FOFOGA FETALAI:** Malie le sui usufono o loo saunoa sei tulai mai le Minisita mo Galuega, Felauaiga ma Atinae Eseeese.

**Afioga Hon Manualesagalala Enokati Posala:** Lau Afioga i le Fofoga Fetalai, na pau lava si vaega lea o le vai i Falelauniu, leaga o lea ua saunoa i ai le sui usufono mamalu, e faalagolago i le talosaga. Ua uma ona faataatia alapaipa mo aiga taitasi, ae faalagolago e talosaga mai aiga ona... O le aso na tatala ai sa ou maua na o le 20 aiga, ae o la e faafofoga mai aiga, e talosaga mai i le Pulega o le Suavai ona faapena lea ona tai. O la e foi sa i ai le matou polokalame ia mama le tulaga o le totogi o connections ia ma tuu i totonu o latou mita foi nei tupe ia mafai ai ma faigofie ona maua le suavai. Ae afai o faafofoga mai Falelauniu, talosaga mai, aua e le mafai ona fesootai atu pe a le oo mai le talosaga i le Pulega o le Suavai ona faapena lea ona faasafua atu le suavai. Ma le faaaloalo.

**FOFOGA FETALAI:** Malo. Faafetai i le saunoaga manino a le Afioga i le Minisita. E manatu foi ua tele lenei faamamaavega ua avatu nei, e le tau tulitulia e avatu loa ma totogi lau tupe o le a tuu i luga o le pili. Ua leva foi ona tagisa le tatou nuu lenei ua leva ona pepese i le leai o se suavai, a o lea foi ua toe avatu ma lenei faamamaavega, ae talosaga, ui i auala aloaia,

faafesootai le Afioga ia Moefaaauo ona vave lea ona connect le tou paipa ma faaaoga ai le tatou atinae na tatala nei.

Tulai maia e faaiu mai le saunoaga lau Afioga i le sui usufono mo Sagaga le Falefa.

**Afioga TUISA TASI PATEA:** Faafetai atu i lau Afioga i le Minisita mo Galuega, Felauaiga ma Atinae Eseeese. Ia o lena ua faafofoga mai le tatou itumalo i uta i le vaimea lena i Tafaigata ma Falelauniu, e o sao lava ia Moefaaauo e totogi ai a outou tupe, aua tou te omai i i e le totogia e le sui usufono.

**FOFOGA FETALAI:** Malie le sui usufono sei tuu atu le avanoa i le faauilavea a le sui usufono mo Faleata Sisifo.

**Tofa Lealailepule Rimoni Aiafi:** Lau Afioga i le Fofoga Fetalai, o lea ua ou faalogologo atu i le lauga a si ou uso a sui usufono, poo le mea ea ua sii mai lona itumalo i uta i i. Faafetai o loo fesoasoani mai i lau galuega, ae ua ou nofo nei poo le mea o se isi suiga fou i le tatou Faigapalota ua oo mai i Tafaigata ma Falelauniu le afioaga o le sui usufono. Ae faafetai mo le fesoasoani mai.

**FOFOGA FETALAI:** E leai o lea e maua o gauta lava o Faleula o loo i ai foi le toatele o le au palota a le susuga i le sui usufono. Ma e manatu e agai ia Moefaaauo o lea ua fai le faamamaavega a le Matagaluega i le totogiina o le tuuina o le connection fee i totonu o pili ae togitogi. O le faamalamalama lena a le Minisita, ae tulai maia e faauau mai le saunoaga.

**Afioga TUISA TASI PATEA:** O le tulaga lea, o lea lava e manino taiala i itumalo uma ua uma ona faia boundaries. A o lea e foliga mai o le tasi la lea gaoi palota lea e i ai nei. E ui i lea, faafetai tele ua maea se leo. Faafetai lava mo le avanoa i lau Afioga i le Fofoga Fetalai, ia alofagia e le Atua ia faamanuia le Maota nei aemaise foi o Ofisa Sili o Pulega. Ia alofagia e le Atua le tapuaiga mau a Samoa. Ia manuia Samoa. Faafetai.

**FOFOGA FETALAI:** Malo faafetai saunoa. Faafetai mo timaiga aemaise foi o fautuaga mo le tatou Tala Faatatau Faaopoopo o le Tupe, aemaise foi o le taumafai o le Malo e tali atu.

Ia, o loo maua pea le tatou avanoa ae tatou te lei malolo i le itula e 1. Ia, tulai maia le sui usufono mo Aiga i le Tai, ua leva ona fia faafofoga le tatou nuu poo afea e fai ai le tatou auala laupapa i Manonouta.

**Afioga IFOPO MATIA FILISI (Aiga i le Tai):** Faafetai lava i lau Afioga i le Fofoga Fetalai. E faafeiloai atu foi le Afioga i le Palemia poo le Tama o le atunuu faapea foi le Sui Palemia ma le mamalu o le Kapeneta poo le Aiga Minisita. E faapea foi le Taitai o le Itu Agai ma sui usufono o le Itu Agai ma le mamalu o le Palemene atoa lava, faapea foi i Minisita Lagolago ua tatou faatasi ai nei. Faamalo foi i le Failautusi o le Fono ma le Matagaluega, faafetai mo le galuega. E faafeiloai atu foi i Ofisa Sili o Pulega o Matagaluega taitasi o loo galulue i le Malo.

E le uma foi le faafetai i le tapuaiga a Lana Afioga Mamalu O Le Ao o le Malo ma le Masiofo faapea foi le Sui o le Fono a Sui Tofia ma le Masiofo ma le Afioga i le Faamasino Sili ma le Ofisa o le Faamasinoga. Faafetai mo le tapuaiga.

E le mafai foi ona faagaloina le Aiga Sa Levi o le atunuu i la outou tapuaiga i fatafaitaulaga e fia. Faamalo. Ou te faatalofa atu foi i lou Itumalo i le toafa o alii ma le toalua o tulafale faapea foi le Aiga Sa Sau ma Sauma. E le mafai foi ona ou le faatalofa atu i lou nuu o lo o matou momoe ma matou faifai mea faatasi o Mulifanua, le paia o Aiga, le Susu o Alo o Malietoa, le faaaaloaloga ia Moananu ma Taulapapa, Mauinatu ma Utuimalie.

E faatalofa atu foi ia Fualefau ma le Pouli faapea foi le faaaloaloga ia Fualefaulote faapea foi le tatou Aiga o Leusoalii, taalologa ia Togia ma le tatou Aiga ia Togia ma Ifopo. Ou te faatalofa atu foi i le tofa i le tuua le Tofa Vaatiuola Atimalautolo aemaise o le aumaga o Laauli.

Ona ou oo mai lea lau Afioga i le Fofoga Fetalai i le Minisita o Tupe, malo le faatoatoa, malo le fai o le faiva, malo lava mo le Tala Faatatau o Tupe (Nu. 1) 2013/2014, ou te iloa lava le le auau o lau faasoa ae faafetai ou te talitonu lava o le a maua nisi a tatou tupe se tele pe a uma ona fai atu lau tamai tala lea i la matou faigamalaga. Ona ou oo mai lea i le Minisita o Tupe o lea ua taatia i le Laulau a Fono le Tulafono Tau Faaofi o le Tala Faatatau o Tupe (Nu. 1) 2013/2014 o se taimi ona toe talii atu lea o se faamatalaga i ai ae ua talisapaia lava ma le fiafia e lenei Itumalo le Tulafono Tau Faaofi o le Tala Faatatau o Tupe (Nu. 1) 2013/2014.

Lau Afioga i le Minisita mo Galuega, Felauaiga ma Atinae Eseese, na ona faamanatu lava ao lena ua i ina le talosaga. E toe faamanatu atu le vai, a maua le moli ae a leai se suavai e leai se aoga. O le vai lea o matou i Mulifanua e pei ona tatalo atu i le nuu fou i eleele ia na aumai i lo matou nuu ua soo uma i faatoaga ma le faatoaina uma o ia fanua o le 200 eka, e pei ona fai atu na ala foi ona sosola i uta ona o le tulaga o mala faalenatura e pei o Tsunami pe a oo mai, e tatau lava ona ave le vai ma le eletise i uta. E tatalo atu ai ma le faaaloalo e faamanatu atu ai le vai. O lau tala foi e manaomia tele le vai lea i Manono tai, ou te tatalo atu faamolemole afai o i i le Ofisa Sili o Pulega o le Suavai, toe ave pea se asiasiga i Manono tai, ua soo uma i paipa ae le i soo i le suavai, e i ai le mea ua gata ai le suavai ae pei e foliga mai ua le faaaogaina isi paipa la e taamilo i le motu i tai. O le maitau i ai o Mulifanua ma Apolima, Tausani ma Olomanu o lo o taatitia uma iina le water caps atoa o le Malo, e malamalama foi i ai le Minisita mo Punaoa Faalenatura ma le Siosiomaga, ina ne i te i ua ou sese e fitu nai a tatou pamuvai o lo o i ai i uta, ae tatau lava ona ave le faamuamua i lo matou Itumalo aemaise lava o lou nuu o Manono tai aua e maoti, e le o i ai se auala, e isolate foi i tai. E maua foi le vai i Apolima ae ou te iloa o lo o malamalama lelei i ai le Afioga i le Minisita o Tupe ma le Minisita mo Tina ma Tamaitai, Atinae o Nuua, Afioga ma Agafesootai, ua iloa foi na gaofi lava e le aitu le vai lea mai Manono ma ave i Apolima. Faamolemole lau Afioga i le Minisita mo Galuega, Felauaiga ma Atinae Eseese, o le suavai e manaomia tele ma lou faaaloalo lava.

O o matou auala galue ou te iloa ua uma mai Savaii, uma mai tua, lea o le a oo atu i o le faasologa, ia faasolo atu i Mulifanua seia oo atu i Falelatai. Ma lou faaaloalo lava o le a le toe oo i ai se faamatalaga i lea auala. O le isi mea sa tatau ona ou tauina atu pe faailoa atu, o Aiga i le Tai o lo o matou faifai mea faatasi ma le Itumalo o Falelatai ma Samatau ae tovaa ai foi i totonu le



Itumalo o Aana. E pei o lea ua i ai uma Itumalo e tolu i i, o le mea lea ou te tatalo atu ai faamolemole ina ia alofagia o matou auala, e i ai le auala a o le auala i le faleaoga e alu i Mulifanua, o le auala o le faleaoga e alu i Satuimalufilufi e lavea ai Aana, o le auala e alu i Apolima e aveva ai Falelatai ma Samatau ma le Itumalo atoa. Na ona faataatia atu ai faapena ina ia silafia ai o lenei e tolu Itumalo tetele, ia alofagia o matou auala ae ou te iloa o lo o ua faagasolo atu galuega.

O le tuualalo faamolemole i lau Afioga i le Minisita e auala atu ia te oe o le uafu i Mulifanua, ou te iloa foi ua tele nisi sui usufono na lauga ai i le access road po o se mea e tutu ai taavale e agai i le vaa mo le motu tele i Salafai leaga o lea e faaoga le main road ae faaeteete i tupu ai se faalavelave ona ua one way pe a oo i aso e pisi ai i aso fiafia po o public holidays e o ai ma omai mai Savaii tagata ae matua one way ai loa i ina le auala i le alu i Falelatai ma lo matou Itumalo. O lea e tatalo atu ma le agaga faaaloalo.

Ona ou oo mai ai lea i le Minisita mo Punaoa Faanatura ma le Siosiomaga, faafetai lava i galuega o lea ua tali mai le talosaga a lenei Itumalo, leaga sa ou le malamalama, faapea au o seawalls uma lava po o tatou taligalu e fai uma e le LTA ae leai o le LTA na o tafatafa lava o le auala a o le puipuiga mai o aiga mai o latou maota ma laoa i luga o le sami o lo o nafa ma lau Afioga i le Minisita. O lea e tatalo atu ai ma le agaga faaaloalo o le a taatia atu lava faamolemole e le tele lava ni fale i tai le sami i le agai atu i le uafu o Mulifanua ma agai atu ai i Salua ma Samatau ma Falelatai. O le agaga lea ma le faaaloalo i lau Afioga. O eleele mo lo matou nuu faafetai, a maua se avanoa ua ou oo atu i le Ofisa ma toe talatalanoa, e pei ona lauga se tasi o sui usufono e avatu tupe ma outou ae aumai eleele matou te lisiina aua le tamaoaina mo le galueaina o le Malo, ma le agaga faaaloalo.

O le Matagaluega mo Aoga, Taaloga ma Aganuu, faafetai i lau Afioga i le Minisita, faafetai lava i le tali mai mo le malae o le matou aoga. O le malae o le aoga i Mulifanua e pei ona avatu ai o matou eleele, o lea ua faamatala atu pea lenei tala ina ia malamalama i ai, ua matou le faaogaina le 4 eka a le matou nuu a ua toe tuu i ai e faaatoa ai le sefulu eka ae la ua totogi lelei lava le lisi, fai lelei le lisi ma totogi ma ii le MNRE po o le Esetete foi, ona o le agaga lava ua e tali atu i le malae. O Falelatai seia oo mai i Mulifanua lavea atu ai ma Satuimalufilufi o ou Itumalo uma foi nei, e fai uma lava taaloga i le malae na sua aua e lelei e mafolafola lona eleele, a toe faaopoopo i ai ma le faaleleia atili ona matou fiafia ai lea, fai uma ai lava. E le o i ai lava se totogi o isi aoga ma faapena i lo matou malae, e oo foi i afeleti, lakapi, soka ma le kirikiti palagi lea o le a oo atu foi ia matou, o lo o faatalitali mai lava le alii o lo o vaaia kirikiti.

O le agaga lea o le Miniista mo le Soifua Maloloina, malo faafetai mo le faaaliga o le tatou falemai foi lea i Aana Alofi i le la itu o Aiga i le Tai, Falelatai ma Samatau o lo o fausia i Faleolo faamalo lava, sa tatou i ai i le tatalaina o le falemai manaia, ao lea foi ua maua mai le faaaliga o Mati faatoa avatu ai Fomai, o lea e tatalo atu ai e avatu uma Fomai lea i Leulumoega ae se i faafou le falemai o Leulumoega ae avatu uma loa i Faleolo ma vailaau. Ia o lo o i ina lava le faafoeina o galuega a le Malo, e momoli atu ai le faafetai tele i lau Afioga i le Minisita mo le Soifua Maloloina. E le tele ni mataupu o lenei sui usufono.

O le tatalo faamolemole i le Afioga i le Palemia o le tama o le atunuu, afai e tasi pe lua gate lea e faaoga i auala galue i uta i Upolu ma Savaii, a mea e le

lava ai se gate se tasi e fai ai se auala i Manono e savavali ai tagata asiasi maimoa mai fafo aua ua i tai uma lava le tele o mataaga. O la foi e i tai le mataaga o le Palesoo ma ua tele foi mataaga i tai o le nuu o Manono, ae tatalo atu o la foi ua i ai ma masini na avatu e se tasi o le nuu i tai i Manono o lo o i ai masini a Uria, pe le faaoga e sua ai so matou auala taamilo, a na o le sua lava ae aua le faataina ua lava lena, e le tele se faataamilosaga i le nuu o Manono, e le atoa foi se afa itula tatou te taamilo ai i le nuu. O le tatalo lea e tuu atu i ina i le aiga Minisita ou te iloa e aafia ai le MNRE faapea foi ....

**FOFOGA FETALAI:** Malie le sui usufono, sei tulai mai le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, ou te alu soo lava i Manono ma ou matamata ai, ailoga e manaomia e Manono se auala, aua a na manaomia ua leva ona omai ni savali. E pei e lelei ona e fesiligia pea Manono aua a alu atu loa le masini e faigofie na o le tasi lava le aso ae soo, ae talu mai lava ona tulai mai le tatou Faigamalo o lenei ua 50 tausaga, ou te lei vaai lava i se faamaumauga o manaomia e Manono se auala. Ae a faapea o manaomia e lelei ona omai pea toeaaina, ina ne i te i ua maimau lou naunau ma le avatu o le masini ae teena mai.

**FOFOGA FETALAI:** Tulai mai le sui usufono e faaauau le saunoaga.

**Susuga IFOPO MATIA FILISI:** Faafetai lava i lau Afioga i le Palemia o lea ua maua le tali, e talitonu lava leiloa poo taeao ua tutu mai lo matou Itumalo e fia maua se avanoa i lau Afioga, ae lelei lafo maia o le a matou toe talatalanoa ma toeaaina o lo o taputapu mai ma le agaga faaaloalo.

E le o se fagogo a o lau tamai tala laititi lava lea e fai i le faigamalaga na matou malaga ai ma le Afioga i le Palemia i Peretania fai loa ma le Kerisimasi.....

**FOFOGA FETALAI:** Ou te faamalie atu i le sui usufono o lo o saunoa, ou te manatu ua tatou taunuu tonu i le tatou faiga malologa. Ou te talitonu o le a taatia lau fagogo sei tatou toe foi mai i le afaiafi i le itula e 3, ma maua ai foi ma le avanoa lea e te valaau ai i toeaaina e tataua ona omai nei leaga i uma le tatou Fono ma malaga le Afioga i le Palemia taeao ma le maua ai se taimi o le tatou nuu.

Ou te talitonu le paia o le Maota o le a tatou alo i le tatou malologa e pei ona faatulagaina i le tatou Fono, ae mo le silafia se i faataatia atu pea i polokalame o Aso Lulu uma taitasi e fai ai le tatou Fono Tatalo e pei ona tatou molimauina. Ua fai foi sina suiga i lenei vaitaimi ona o le manatu ia aafia tele taulumaga o tonu a le Malo ma le Palemene ia tatou Fono Tatalo o lea ua filifilia ai e faasolo i Matagaluega taitasi. Mo le silafia e le tatou Maota, o lea e uma tonu le tatou Fonotaga i le itula e 7:00 a maea le tatou Fonotaga, o lo o ua saunia e le Minisita mo Leoleo ma Falepuipui, o ia o lo o taimua i le taitaiina o le tatou Fono Tatalo i le po a nanei ma e valaau faaaloalo atu ai i le tatou Palemene o ai e avanoa, o lo o avanoa le tatou Fono Tatalo pe a maea le tatou Fonotaga. Na ona ou tau mamao atu ina ia fua i ai ni fuafuaga mamao ina ne i faateia faamanu ofaga i le po a nanei ona faapea

lea sa tatau ona tau mamao atu, ae amata lenei tausaga i lo tatou agai e faataua le tatou Fono Tatalo aemaise o le Anapogi a le tatou Maota.

Ou te faasilasila atu o le a faataatia ese Taulumaga a le Fono Aoao Faitulafono seia aulia le itula e 3:00 i le afiafi a nanei.

Tatalo.

*Na motusia felafolafoaiga a le Fono Aoao i le itula e 1:00 i le aoauli seia aulia le itula e 3:00 i le afiafi.*

*Na toe faaauau Taulumaga a le Fono Aoao i le itula e 3:00 i le afiafi.*

**TULAFONO TAU FAAOFI O LE FAATATAUINA O TUPE  
FAAOPOOPO (NU. 1) 2013/2014 – felafolafoaiga faaauau i luga o le  
faitauga faalua – Aso 2**

*Na toe faaauau felafolafoaiga.*

**FOFOGA FETALAI:** E i ai le agaga maualuga ua tatou taunuu manuia mai i lenei vaega o le afiafi. Ou te manatu ua lava lelei le 2 itula lea sa tatou malolo ai aua se faasiliga malosi e le gata o le malosi a o taliga sua. E faamalulu atu e lei i ai se tatou taliga sua i le aoauli ona o tapenaga a lo tatou Ofisa pe a alu le tatou taamilosaga mulimuli o le a tatou sauni atu ai nei.

E momoli atu le agaga faafetai tele i sui usufono o le Maota ona ou te manatu ua tatou taunuu tonu lava i lo tatou taimi amata ma le faamoemoe o lo o tulituililoa pea le manulauti a le Malo e ta loa le taimi, ua tatau ona amata a tatou galuega ma fuafuaga e pei ona faatulagaina.

E faia le malologa ua tau faamaea mai le lauga a le sui usufono mo Aiga i le Tai, ou te manatu o le avanoa lelei lenei ona e maitau atu o lo o tau fai mai lau fagogo e uiga i lau malaga, tusa lava foi pe umi le malaga o lou lato i le ea ma lou lato i le tai, o mea na e le mafai ona tuua ona o lea ua e talatala la outou faigamalaga na outou malaga ai ma le Afioga i le Palemia.

Tulai mai le sui usufono mo Aiga i le Tai.

**Susuga IFOPO MATIA FILISI:** Faafetai lava i lau Afioga i le Fofoga Fetalai mo lou avanoa. E pei lava ona ou fai atu e le o sau fagogo a o le tala e fua lava i luga o le Tulafono Tau Faaofi o le Tala Faatatau o Tupe (Nu. 1) 2013/2014 a le tatou atunuu.

O le faigamalaga lea sa faapea o le a faaiuina le fonotaga i Pereseuma a o lo o Taitaifono ai le Afioga i le Palemia po o le Tama o le atunuu, sa ou maitauina ai e 70 Atunuu o le Karipeane, Aferika ma le Pasefika sa i ai, ae foliga mai i lea 70 po o le 30 Atunuu e i ai arrears i le Tala o le Tupe e pei o le – ona debate lea ma taumafai – ua mananao lava latou e faamagalo le arrears ae sa ta lava e le Afioga i le Palemia le samala e le taliaina mea na o arrears e faamagalo, e tatau ona totogi uma mai ona toe maua ai foi lea o isi nonogatupe mo atunuu taitasi nei.

O le mafuaaga o lau faamatalaga, o lau lea foi tuualalo i Matagaluga a le Malo e tatau lava ona taumafai e achieve targets po o goals po o mea ia e maua ai S.O.E faapea foi le VAGST e le o totogiina e fesoasoani tele i le Afioga i le Minisita.

O lau tala lea ma e lagolagoina foi e le sui usufono mo Aiga i le Tai le Tulafono Tau Faaofi o le Tala Faatatau o Tupe (Nu. 1) 2013/2014. E momoli atu ai foi lau faafetai tele lava i le aiga Minisita, malilie foi po o le a se tetele atu ma se faamatalaga o le naunautaiga lava ona e vaai atu lava ua toe lua tausaga o lo o totoe o le tatou Paeaiga a o nai galuga e fia faatino mo nai Itumalo taitasi.

Lau Afioga i le Fofoga Fetalai, e i ai lava le mea lea sa tulai mai nei i le tatou Fonotaga na lagona ai foi le faanoanoa o le Feagaiga, ioe i le debate po o le le usitaia o Tulafono o le Maota. O i matou nei aemaise lava lou sui usufono ou te fou mai, e i ai le naunautaiga ou te faateete lava e fai se faamatalaga i le Maota Fono, ae ou te iloa o lou agalelei ma lou loto faamagalo ma le taitaiina o le tatou Fonotaga, po o lou pipii foi i le Divine Mercy po o Monike ma latou polokalame tauave lea e ala ai ona e loto faamagalo. Ae ua ou fia vaai lava a faaetonu lava le sui usufono ma tuli i fafo ae sei matou vaai matou nei e fou mai, e pei o le agaga lea. Ia manuia tele le tatou Fonotaga i lenei aso. Faafetai i lou Itumalo ma la latou tapuaiga, faafetai foi Samoa ma le tapuaiga. Manuia le tatou Fono faafetai.

**FOFOGA FETALAI:** Malo faafetai i le saunoaga manino a le sui usufono. Ou te iloa ou te le seetia foi i le malu o le tai taeao. Ou te manatu e i ai le upu i le Itulagi lea e i ai lou suafa le sui usufono mo Aiga i le Tai, o le tamalii e po lava o ifo, e ala ona ifo o le faaaloalo. O lena ua e maua tonu mai lava le sui usufono le agaga lea e taumafai atu ai le Nofoa, o lo o maitau mai le atunuu o i latou na e faia le tonu o tatou.

Samoa, o lea tou te faamasino aua e le faigofie le galuga a le Fofoga Fetalai lea e fai atu nei i le tau faatoatoaina, tau soalaupuleina ma tau faasoa atu le tofa leaga e le faigofie le tagai atu i lo outou paia ma lo outou mamalu, o outou o Tootouli na fili mai i le fuifui o le vaosa o Samoa. O lea e faamasino mai Samoa, o le tagata e le usitai i le Fofoga Fetalai ua le usitai lava lea ia Samoa atoa ae faafetai le faamanatu. O le agaga lava ia i le paia ma le mamalu i le aualii lea e talie mai i le Itu lea, ia talie pea ae i ai le taimi ma le itu aso, o le lagona ma le faamoemoe o lea lava e olo le fua ma avatu le faaaloalo, o le faaaloalo i le faaaloalo toetiiti lava tumu le fua a o lea lava e fai atu le va tapuia ma le faatamalii ui o lea e faapena se lagona, leaga o le Maota lenei o le faata mo le lumanai. O a ni mea lelei ua silasila i ai outou faatoa ulufale mai i le Maota, apo.

O a ni mea ua faaetonu ia faatuatuanai, ae inu lava le tagata ia i lana galuga. E palasi sao foi le samala i le ulu o le fao. O le fua e lulu e le sui usufono a manuia e toe vaia i le tausaga fou, ae a leai ia tofa soifua.

Ua tatou taunuu mai i lenei aso ma le faamoemoega o le tatou Fono, o lea ua toe avanoa le Maota mo se tasi o sui usufono e fia saunoa. O lea foi ua atoa pulu fagota a le Kapeneta, e manatu o le a lafo atu pea i lau Afioga i le Sui Fofoga Fetalai masalo toe o oulua lea e totoe, a faapea loa e leai nisi sui usufono e toe fia saunoa ona faasolo loa lea o Tali a le Malo o lea e alu le tatou taimi.

Tulai mai lau Afioga i le Sui Fofoga Fetalai ua avanoa le Maota mo lau saunoaga.

**Tofa AGAFILI PATISELA ETEUATI TOLOVAA:** Faafetai mo le avanoa i lau Afioga i le Fofoga Fetalai. O le taeao ua fano na maua ai se avanoa e faafeiloai atu ai i lenei Maota faapea foi le faafogafogaaga a le atunuu, o le a ou le toe oo i ai a o le a faaali loa se manatu e tusa ai ma le Tulafono Tau Faaofi o le Tala Faatatau o Tupe (Nu. 1) 2013/2014.

Ia le paia o lou Itumalo mai Nuuuli ma Vaipaepae seia paia le Falemai, tapuai maia se i taumafai atu sa tatou faamatalaga e tusa ai ma le Tulafono Tau Faaofi o le Tala Faatatau o Tupe (Nu. 1) 2013/2014 i lenei itula o le aso.

O le tasi lenei Itumalo e ese le manao lasi, manao, manao ma ua oo mai foi le faamatalaga a fau loa le auala e tasi fau ia uma. Ou te faafetai tele atu i le Tulafono Tau Faaofi o le Tala Faatatau o Tupe (Nu. 1) 2013/2014, ma le saunoaga a le Afioga i le Palemia i le tatalaina o isi auala i le tausaga na tea nei lea ua tali ai manao ia. E fuafua lava le manao ma galuega faatino ma atinae i tupe e maua i lea vaitaimi ma lea vaitaimi ma e le mafai ona faia ni auala se fa o se nuu e tasi i se taimi se tasi. Faafetai tele i lau Afioga i le Palemia, o lea ua nofo malamalama lou Itumalo ma lou nuu o lo o faagasolosolo atu lava galuega fai a le Malo.

Faafetai atu i lau Afioga i le Minisita o Tupe mo lenei Tulafono Tau Faaofi o le Tala Faatatau o Tupe (Nu. 1) 2013/2014, ou te manatu o e manatua i lau lauga muamua lava i totonu o lenei Palemene, sa ou lauga ai i le ola faatusatusa o Palauli Sisifo ia Palauli le Falefa, a o le taimi lenei e pei ua toe foi mai lau upu ia te au. E pei o lea ua soifua faatusatusa Salega ia Palauli Sisifo i ona atinae e pei ona fuafuaina ma faatinoina e le Malo, faafetai tele lava mo lenei Tulafono Tau Faaofi o le Tala Faatatau o Tupe (Nu. 1) 2013/2014.

Lau Afioga i le Minisita mo Punaoa Faanatura ma le Siosiomaga, faafetai o lea ua ou vaai i le pepa e tapunia i le aso 27 Aso Gafua o le vaiaso o le a sau tauofoga mo le faatinoina o se tasi o vaega o taligalu o lou nuu lea o Siutu. Faafetai tele lava mo lea galuega ona o se galuega ua leva ona talosagaina ae taatia atu i le faaso a le Malo ma lau Afioga mo le faamaeaina o lea taligalu.

O le Minisita mo le Soifua Maloloina, faafetai tele lava mo galuega faaleleia mo le falemai o Foalalo, ua maea isi fale e pei ona e silafia a o lea ua faagasolo mo le fale o le Fomai. Ou te talitonu o lo o faafogafoga mai lou Itumalo, e le iloa pe uma loa lava ona faaleleia uma nei fale ona maua loa lea o se Fomai tumau mo lo matou Itumalo.

Lau Afioga i le Minisita, ona pau lava le mataupu ou te fia paia i Motootua o le Faletalavai. O le faasologa o le talaina o vai i tausaga ua tuanai atu e tasi lava le faamalama e te oo atu i ai tau mai le tau o au vai, ave lau pepa ona faatoa toe valaau mai lea o le tagata pe a oo i le taimi e aumai ai ana vai ma totogi. O le taimi lenei e tolu faamalama muamua e te alu i ai o lona fa i le faamalama e aumai ai lau vai. E te alu atu e alu i le isi faamalama, alu i le isi faamalama, e alu totogi lau vai i le isi faamalama faatoa e sau aumai lau vai i le isi faamalama. E le o se tala e fai ane lau tala leaga o au e masani ona ou alu e aumai ai au vai e faapena lava e fai lava sina umi, ae faafetai tele mo le Falemai. Ona pau lava le faalavelave a timu ma a le lelei le savali a le tagata ua see ona ua iila tele le Falemai.

Ua ou talia ma le fiafia le faaiuga a le Matagaluega e tusa ai ma togafitiga, pau lava lau talosaga ia mautinoa e oo mai le Team Faapitoa mai fafo nei ia Mati, ae ua ou talia ma le fiafia le faaiuga a le Matagaluega e tusa ai ma ou togafitiga.

Lau Afioga i le Minisita mo Faatoaga ma le Faleoloa o Faatoaga, o lo o faagasolo lelei le polokalame a Saina i lo matou Itumalo, ua tele foi le niu faapea le koko Samoa lea ua faasafua atu i le aufaigaluega. Ona pau lava le vaivaiga lau Afioga e le o maua le agaga i tagata e mafai ai ona sooto, e pei lava ona ou fai atu i le isi au lauga muamua o le mea lena o lo o vaivai ai tagata i nuu i tua e le o lava le sooto i le niu ma le koko, ae atonu lava e fai fai lava polokalame a le Matagaluega ma faalauiloa e iu ina toe fiafia mai tagata e faatino le toe sooto o le niu ma le koko, a o la ua faatino galuega a le Matagaluega, ua tele le faamiliga o le niu faapea foi faamiliga o le koko.

Lau Afioga i le Minisita mo Leoleo ma Falepuipui, e to lou pulou i lau Afioga, faafetai tele le faaloalo, faafetai lava le manatu mai i lenei Itumalo, faafetai foi lou silasila mamao aua lea itu o le tatou atunuu matou te i ai.

Le Minisita mo Aoga, Taaloga ma Aganuu, faafetai o lea ua tino mai le miti sa i ai ina ia mafai ona faatino i Samoa nei suega uma mo aoga mauululuga mo le SC faapea foi le suega o le Samoa Secondary for Leaving Certificate. O le tausaga muamua lenei a i ai ni vaivaiga e mafai lava ona faaleleia, a o lau lava maitau faamalo lava i le Matagaluega. E i ai foi suiga tetele ua i ai, e moni ai le Matagaluega a oo loa i le aso 27 o atu loa amata aoga ae aua nei toe faaalaina le taimi o tamaiti e tau teu ai le potu ma sasa le vao ma tulaga uma faapena, faafetai, o le faailoga lena o le laalaa i luma o le tatou Matagaluega.

Lau Afioga i le Minisita mo Galuega, Felauaiga ma Atinae Eeseese, faafetai tele mo lo matou auala. O lea o le a silasila foi i ai le Afioga i le Palemia ma le Malo i lea vaiaso e pei ona fuafuaina e tatala aloaia ai lo matou auala ma nisi o auala i le motu i Salafai. E pei ona maitau e lau Afioga e i ai lava faafitauli o lo o feagai pea ma femalagaiga i le motu o Savaii, o le faafitauli o lo o tupu o le lē lava o pasi e faatalia vaa mai Savaii aemaise le vaa o le 2:00 i le afiafi. Ou te molimau atu leaga na ou malaga i Savaii i le vaiaso na tea nei ma le isi vaiaso atu i ona tua. O le vaiaso lea i le aso 7 o Ianuari, e sau le malaga o le 2:00 i le afiafi e ova i le 600 ae 2 pasi, semeamanu o nai Malu o le Malo sa la tau faasoasoina nei pasi e lua a o le toatele na ou toe alu lava i Mulifanua e aumai lou aiga na omai ona e le taitai ona lava pasi. A ou maitauina taimi e feoi ai le tele o pasi o le vaa toeitiiti lava sefulu ma ona tupu pasi o lo o laisene ai i o, a o le tele o taimi nei e omai ai e le taitai ona gafatia e ni pasi se tolu po o le fa pe lima se pasese e 500. Ou te tatalo atu i lau Afioga sei toe silasila ane i lea tulaga, afai lava ua laiseneina le pasi e tatau ona faaoga le laisene ua avatu i ai leaga o le auaunaga i le atunuu. A lua itula o ou faatali i le vaa o le 2:00, toe sau i le itula e tasi toe sau foi toe faatalitali isi itula e lua e tau sue ai se isi taavale e sau ai mai Mulifanua e le o se mea e faigofie ia i matou nei e feoi.

Sa ou taua i lau lauga i le Tala Autu o le Tupe i le tausaga na tea nei mea ia o loli tetele ma le lauina o latou uta, afai pe na i ai se sui usufono na oso atu i i nei i le aoauli, lea la ua tupu le faafitauli, lea la ua masaa le uta a le loli amata atu lava i moli lea e i le magafa i Maluafou faatoa tu lava le loli faafesagai ma le aoga a Maluafou, toeitiiti lava uma i lalo le uta o le tele o le uta lea ua masaa, ae lei taitai lava ona lau uma mai le uta o lo o i luga, e te

iloa atu lava i lalo le tele o le uta. O lea sa ou fautuaina ai lau Afioga i le Minisita, pe le silasila pe le tataua ona i ai se fua e fua ai. Sa ou alu atu nei ma ou tu ai ma ou talatalanoa i alii leoleo la e i ai, o le faafitauli lea e tupu mai, ua iloa e leoleo e le laiseneina le loli, a o le loli o le pau sefulu, a o lea e fealuai i luga o le aualatele e lau uta tetele ae lei laiseneina. O lea foi sa ou fautua atu lau Afioga i le Minisita, sei silasila ane pei lava e i ai se tulafono e i ai se taimi faatoa faataga ai loli tetele i luga o le aualatele i le taeao ma le afiafi. O lea o le a ae aoga i le vaiaso lea i le aso 27, faateleina le Iunivesite, o le Kolisi o Samoa ma isi aoga faapena, o le a fai ma faalavelave loli tetele ia i le taimi lea i le va o le 7:00 i le 9:00 i le aualatele lea ia matou, a o le tele o loli tetele ia o loli toso pusa oloa ma loli ia e lau ai uta, e leai ni o latou moli i tua, ta te te i lava i le tu o le loli pe te i ua afe le loli, a o loli o loli tetele. E na o se tuualalo, silasila ane pe i ai se tulafono e i ai se taimi o le taeao ma le afiafi e le faatagaina ai loli tetele ia latou te feoai i luga o le auala.

Lau Afioga i le Fofoga Fetalai, pau ia o nai mea e tuualalo atu ai i Afioga i Minisita aua lenei itumalo, faafetai foi i le Minisita mo Tina ma Tamaitai, Atinae o Nuu ma Afioaga ma Agafesootai, o lea ua i ai se tupe faaopoopo lea mo matou nei o vai tumaoti, ae mo le silafia e lau Afioga, na ou alu i le vaiaso lea na tea nei e totogi le matou \$200 foi lea o le matou subscription o le matou talosaga i le vai tumaoti, ae ou alu atu ae tau mai, e ese le \$200 lena, ese foi le isi \$200. Sa ou fesili atu i le failautusi po o le a le isi \$200 faaopoopo lea, ae fai mai o le \$200 muamua latou ia, e aofia uma ai lava vai tumaoti uma o lo o i lalo o le polokalame lea, a o le isi \$200 lea, ua finagalo le Komiti o Vai Tumaoti e faaopoopo le \$1 i le viliga e tasi, ona o le matou vai la e \$200 viliga lea e i ai le \$200 faaopoopo. Ua ou faafesili atu pe faapefea ona...o le a se mafuaaga ua faaopoopo ai lea tupe e \$1 i le viliga? Ia ou te le tuuaia le ofisa, o le saunoaga a le alii o lo o vaia le ofisa e faamalie mai o le iuga lava ia a le komiti na avatu, o lana ia matafaioi o le faatino o le galuega, ae sei silasila ane i ai po o le a le \$1 i le viliga lea ua toe faaopoopo i luga o le \$200 lea i le annual subscription lea e totogi e komiti o vai tumaoti.

Ia manuia le tatou Fono i lenei aoauli i lau Afioga i le Fofoga Fetalai faapea le Afioga i le Palemia ma le Taitai o le Itu Agai, manuia foi le faafofogaaga a Samoa.

**FOFOGA FETALAI:** Malo faafetai saunoa, faafetai mo le sao taua i lau Afioga i le Sui Fofoga Fetalai.

O lea ua tulai mai le sui usufono mo le Vaa o Fonoti, tulai maia le sui usufono mamalu e saunoa e ala i le tatou Tala o le Tupe.

**Afioga TIALAVEA FEA TIONISIO SEIGAFOLAVA (Vaa o Fonoti):** E faafetai i lau i lau Afioga i le Fofoga Fetalai ua maua se avanoa o le itumalo o Vaa o Fonoti e fai ai se manatu aua le Tala Faatatau Faaopoopo o le Tupe 2013/2014.

Lau Afioga i le Fofoga Fetalai e faatulou atu i le Afioga i le Palemia aemaise le paia i le Kapeneta, e faatulou atu foi i le Taitai o le Itu Agai ma le Sui Taitai, aemaise foi o Minisita Lagolago ma le paia lasilasi o sui usufono o le Maota nei. E faatalofa atu foi i le paia o le aufaigaluega i Faauluuluga ma ofisa sinia o Matagaluega ma Faalapotopotoga a le Malo ua tatou faatasi i lenei aso. O le paia foi o Samoa o lo o faafogafoga mai, mai ao seia oo i ona

iu, e faatulou atu ae sei fai atu se faamatalaga ma se motugaafa a lenei sui usufono aua le Tala Faatatau Faaopoopo o le Tupe.

Lau Afioga i le Fofoga Fetalai, e talitonu ae lei avatua se faamatalaga, ua uma ona avatu le lagolago a lenei itumalo e auala atu i le Komiti o Tupe sa lauliuina le Lipoti lenei, ma ua talitonu foi le sui usufono o lenei itumalo, ua lelei ma atoatoa le Tala Faatatau Faaopoopo o le Tupe o lo o i ai nei. Ae na o ni nai mea lava o lou itumalo, e talosaga atu ai i Afioga i Minisita o le a aafia i le faamatalaga i lenei aso.

Lau Afioga i le Minisita mo Galuega, Felauaiga ma Atinae Eseeese a le Malo, e momoli tele atu lau faafetai e tusa ma le auala i le soosoo atu o le auala lea i le alu atu i Lona e tau i Samamea, ua uma ona faatinoina, e momoli atu le faafetai mo lea galuega lelei aua lo matou itumalo, aua e talitonu lava le agaga ma le faamoemoe, o sui usufono uma lava o le itumalo lenei e mai lava i le 1962 sei tau mai lava i le taimi lenei, o le latou mau lava lea, o auala, e le o ni auala galue o alatetele o le Malo e faaaoga e le lautele. O le galuega foi lena sa feagai ma le Afioga i le Minisita mo le Soifua Maloloina a o tulai mai foi i le tofi o lenei itumalo, o le auala lava. I le faalogologo atu i le tele o sui usufono ma itumalo, amuia latou ua tai tolu auala galue ma ua uma ona faataina o latou auala galue, a o lo'u itumalo o Fagaloa e lei faataina le alatele e feoi ai le itumalo. O lou itumalo o le Vaa o Fonoti, e tasi lava le auala galue o lo o i ai ae lei faia foi. E faaamua atu i le tele o tatou sui usufono, a o le agaga lava i lau Afioga i le Minisita e auala atu i le Fofoga Fetalai, e talitonu ma iloa lelei le utiuti o le faasoa. Ae tuu atu pea i luma o le Laulau a Fono i lau Afioga ma le paia o le Matagaluega, sei alofa ane i le auala o lo o agai mai i Taelefaga i Musumusumu ma le alu atu i Samamea e tau i Uafato. O le agaga lava ia i le auala lea e alu atu i Uafato, a mafai lava ona fai se 1 le kilomita i le tausaga e aua le faataina ae ia faalaulelei ma ia mafai ai ona faaaoga, aua o le matua lauleaga o le auala aemaise o le vaitau lenei o timuga. Na ou alu i ai i le vaiaso i tua na ou alu ou toe foi mai, ua matua lauleaga lava ae o le 4wheel na ou alu ai. E tuu atu pea i luma o le Laulau a Fono pei ona fai atu se manatu, e utiuti le faasoa ae faafetai foi mo le faasoa lelei ua amata ai ona fai atu le auala.

E momoli atu foi e auala atu i lau Afioga i le Minisita le faafetai i le Pule o le Matagaluega a le LTA i le tali mai i se fanoga na avatu i ai ina ua solo le ala lea o matou i Fagaloa. Sa vave ona oo atu i ai masini ma faaleleia, e momoli atu ai le faafetai a lenei itumalo. O i i le matou pitonuu lea i Faleapuna pei lava ona fai atu e tasi le auala galue o lou itumalo, o le auala galue lea o lo o i ai le pamuvai a le Ofisa o le Vai o lo o taumamafa ai Lufilufi, Falefa ma Faleapuna i le pamuvai lea e tasi, ae o le matua lauleaga o le auala o lo o agai i ai. A maua ifo le faasoa i lenei tausaga, e momoli atu le faafetai i lau Afioga, a o le logologo lava ae tuu atu pea i ina tou te faasoasoa lima lelei aua le manuia o le atunuu ona o le tele o sui usufono.

Lau Afioga i le Minisita mo Punaoa Faanatura ma le Siosiomaga, e momoli atu le faafetai i le taligalu i Faleapuna. E pau lava le agaga pe mafai ona toe siaki le taligalu lea, o lo o i ai ni mea o lo o faaletonu ae ua uma le galuega, e le o se mea tele o se mea itiiti ae le o taitai ona uma lo matou nuu i le galuega lea, ae momoli atu le faafetai i le tulaga ua i ai le galuega ua matagofie, ae pei o ni nai faaletonu laiti lava ua toe tafia le taligalu sa fai ae le tele, masalo pe na o se 20mita o lo o faaletonu, lau Afioga i le Minisita mo Punaoa Faanatura ma le Siosiomaga ae faafetai mo le fesoasoani.



Ona oo mai lea i le Minisita mo le Soifua Maloloina. Ia sa alu le asiasiga a le Komiti o Tupe ma iloa ai le matagofie o le falemai fou, e momoli foi le faafetai i le siitaga ua i ai, e talitonu lava so o se mea faigata ona talia e le atunuu, o mea mautu ia ma le sologa lelei aua le faaauauina o le auaunaga, aua a leai se tupe e mafai ona maua mai, ia e faaletonu foi auaunaga a le ofisa o le soifua maloloina, ae faamalo i le Afioga i le Minisita ma le Matagaluega i le matagofie o le falemai ua i ai nei, ae talitonu e le o se tupe laitiiti e fuafua mo le maintenance o le falemai lenei ne i te i ua toe faaletonu foi. O le tasi lena mea taua i so o se galuega fai ma so o se fale e fai, o se maintenance program e mafai ona faatino i lea tausaga ma lea tausaga, a o le galuega ia a le auaigaluega i le matou maitau, o lo o maua le avanoa lelei, sa matou asiasi foi i ai i le Aso Sa, o le umi sa faatalitali ai lo matou taimi e 45 minute ae vaaia le fomai, o lea ou te fai atu lava ia te au o au lea na ou alu e vaai le fomai i le Aso Sa, e 45 minute ae ma faafesagai loa ma le fomai tamaitai Initia ma fai ai lou togafitiga aumai ai au fualaa. E talitonu o lo o faapea foi ona tele taimi ua faalaitiitia mai, ae talitonu lava, o le taimi e tataua ona e i ai i le falemai e faatalitali le fomai, e lua lava itula le umi e le tataua ona ova atu.

Ona oo mai lea i le Minisita mo Tina ma Tamaitai, Atinae o Nuu ma Afioga ma Agafesootai. E talitonu lava o lo o i ina le talosaga a lo matou nuu i Lona e tusa ma le vai tumaoti. O lea vai o le faamoemoe, o lo o i ai le faleaoga o le matou itumalo i ina o lo o faaogaina le vai lea, e na ona valualusia aa o le fau, o le a se tulaga o i ai le fesoasoani ona e manaomia ona o lea o le a ae aoga i le vaiaso fou. E taatia atu pea i lau Afioga o le a lava se mea matou te taumafai e manaomia ai le matou fesoasoani atu, ona logo mai lea o matou e tatou te galulue faatasi ai ina ia vave ona faataunuu le faaleleiina o lea vaitaumafa aua alo ma fanau o lo matou itumalo.

Ona ou oo mai ai lea i le Minisita o Tupe, ia lau Afioga i le Minisita o Tupe ma le Matagaluega, e talitonu o le tamaoiga o le atunuu i lenei vaitau, e talitonu le agaga o lo o lelei ona faafoe e auala lea i le toe faameaalofa mai o le \$22miliona mai le faletupe o Asia e fesoasoani i le tatou Malo. E le mafai ona aumai fua nei fesoasoani sei vagana ua talitonuina le faaogaina lelei o fesoasoani o lo o aumai e mafua lea i le lelei faafoe e lo tatou Malo o auala o lo o faatino ai lo tatou tamaoiga ua ala ai ona talitonuina e atunuu mamao mai fafo ma aumai meaalofa. Tau ia alofa le Atua i lea foi tausaga i le Tala Autu o le Tupe ia maua mai foi nisi fesoasoani tuusao faapea, e mafai ai ona fesoasoani i le Tala o le Tupe a lo tatou atunuu ona e leai ni a tatou minerale, e laitiiti le tatou faamoemoega ae ana le seanoa tagata tafafao maimoa mai ma tupe faamomoli mai fafo ma tatou lafoga o lo o tau faasoasoa aua se manuia o le atunuu meamanu e le mafai ona faatino a tatou fuafuaga. O lea foi ua tatou siitia atu i atunuu e lelei le tamaoiga, e talitonu le agaga e le teitei o tatou siitia atu i lea tulaga, ona o le faasoasoa lelei lava o tatou tupe faameaalofa mai fafo, e oo foi i ni tatou nonogatupe e mama le tului, e momoli atu le faafetai i le Matagaluega i le faasoasoina ma le vave ona tali i mea o lo o fesiligia mai i atunuu i fafo o lo o auala mai ai nei fesoasoani.

Ona oo mai lea i le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei. Ou te iloa o lo o ma galulue faatasi ma le Afioga i le Minisita e le faapea e selu atu, ae momoli atu le agaga faafetai i lau Afioga e tusa ai ma lou oo atu ma tatou galulue, e maeu foi lou tamalii i le faatinoga o ou tiute aua le tatou Matagaluega aemaise foi ACEOs o lo o i ai o lo o auauai e Sui Komesina. E momoli atu le faafetai i a outou Afioga ma le

mamalu o le Matagaluega e tusa ma tiute o feagai ai i aso fiafia o le kerisimasi ma le agai mai i lenei vaiatau. E talitonu foi ua tele le galuega o lo o fai ona ua mafai ona felagolagomai a outou Afioga o lo o i luga o le Matagaluega. O le agaga foi ua faaali mai, o lea lava e i ai le tomai i totonu o alo ma fanau mo le taitaiga o le Matagaluega o Leoleo. E momoli atu ai le faafetai ia te outou, o le galulue faatasi e maopoopo ai ma lelei se Matagaluega, a o le fevaevaeai ma fetui ai e malepelepe ai. A o le agaga e momoli atu le faafetai e tusa ai ma le galulue faatasi o Faauluuluga e oo lava i se itiiti o le Matagaluega, ua mafai ona taunuu i le manuia aso malolo o le kerisimasi ua tuana'i atu nei e aunoa ma se faalavelave.

O le falepuipui i Tafaigata, sa alu atu i ai le asiasiga a le matou Komiti, faafetai atu mo le \$120,000. E le taitai ona lava, ae faafetai mo le faaso'a. E ala ona fai atu se faamatalaga ona o le tulaga ua i ai le falepuipui i uta i le vave ona faatumulia. E pei ona saunoa nisi o sui usufono i le aso na matou i ai, e 18 pagota sa avatu i totonu, e leai se pagota na sau i fafo. Ae faafetai i lenei \$120,000 o le a taumafai ai e fai ni fale faa-Samoa se ono e faaso'a atu i ai e ua mafai ona faaoga i le po, ona o le taimi nei ua faaoga le faleai e tofafa ai pagota ona ua tutumu sela. Ae faafetai masalo e pasia loa le tatou Tala Faatatau Faapoopo o le Tupe pe amata loa i le vaiaso lea galuega ia mo fale ia e ono e fesoasoani mo le taimi lenei ona ua toatele le aofai o e o lo o taofia i uta.

O uta foi i Oloamanu, e 60 pagota o lo o i ai, o tamaiti i lalo o le 21 tausaga. O le 50% o ia tamaiti o faasalaga o le fasioti tagata, ae tofa alii leoleo o lo o galulue ai. E tuu atu i lau Afioga pe i ai nisi leoleo e toe ave i uta i Oloamanu ma le fale o lo o faaogaina e malu o le Malo, o lo o tofafa lava i le fale o lo o i ai le Ofisa i le ao ma le po mo le faaogaina. O le tala lava a nai tama o lo o i ai, e galulue lava ona o le tautoga ma le faamaoni, ae faanoanoa i le vaai atu foi i le mea o lo o tofafa ai. Lau Afioga i le Minisita e taatia atu i ou autafa ina ia galulue ai aua le faataunuina o ia faamoemoga.

Lau Afioga i le Minisita mo Fesoataiga ma Faamatalaga Tekonolosi, o lena ua avatu e le Tui Atua Faanofonofu lou uso a sui usufono ma te tuaoi le matou itumalo i le faaletonu o faasalalaga i televise, e faigata ua leai se Televise a le Malo, ae talitonu o lo o i ai fuafuaga a le Malo i le faamatuu atu o laisene. Faafetai i le saunoaga a le Palemia, ia matua lau mai ni Televise ia faigofie ona soo Samoa, ina ia mafai ai ona maua uma e Samoa atoa le faamanuiaga i le matamata i taaloga a le Manu Samoa poo fea lava e fai mai ai ma nisi taaloga.

Lau Afioga i le Minisita mo Tagata Tafafao Maimoa Mai Fafu, e talitonu e le faigofie le galuega, ae faafetai mo le fesoasoani ua tuuina atu i faletalimalo i lenei vaiatau. E talitonu lava ua amata ona ataata mai ata o tauleleia, ua amata ona faapoopo mai i latou e maimoa mai i Samoa nei ona e eseese ituaiga faletalimalo ma latou client tel, ese foi tagata tafafao mai ma o latou manaoga. E i ai lava le tagata asiasi mai e sau e tafao ma alu i tua, i ai foi le tagata e sau ona o fonotaga, o i latou na e nonofo i le taulaga nei. Faafetai i le Matagaluega e auala atu i lau Afioga i le Minisita, e le faigofie le galuega o loo feagai ma le Minisita mo Tagata Tafafao Maimoa Mai Fafu, e faatoatoa pea ma fai le galuega aua le manuia o le tatou atunuu. E pei ona fai atu i le amataga se faamatalaga, o faaiuga faigata uma lava e te faia, o faaiuga taua ia e manuia ai se atunuu, a o faaiuga e fai ona o le faamalieina o tagata, e uma lona aoga taeao.

Lau Afioga i le Fofoga Fetalai, ou te talitonu ua uma atu se manaoga o lo matou nei itumalo, aemaise foi ni fautuaga mo le tatou Malo ma Matagaluega taitasi. A o isi uma Matagaluega e lei oo atu i ai se faamatalaga, e momoli atu le faafetai e auala atu i Afioga i Minisita taitasi, i Ofisa Sili o Pulega o Matagaluega ma Pule Sili o Faalapotopotoga mo le galuega fita o loo feagai ma i latou. Aua tatou te faavaivai, aua foi tatou te faalogologo tiga, ae faamoemoe i le Alii, faamoemoe i le Divine Mercy e fofu uma ai faafitauli. Na pau foi lena o le fesoasoani tele mo i tatou, ia faamuamua le alofa i mea uma e mafai ai ona faataunuu o tatou tiute.

Ia manuia lau Afioga i le Fofoga Fetalai ma le Maota. Soifua.

**FOFOGA FETALAI:** Malo faafetai saunoa i lau Afioga i le sui usufono mo le Vaa o Fonoti, ia, o le lua fatuaiga tausii lena leaga o lea e te lua sootuli ma le Feagaiga, o oulua uma o Feagaiga a le atunuu. Malo faafetai, malo saunoa, malo fautua, malo faamanatu.

Ia, le sui usufono mo Palauli, tulai mai o lea ua manaia le faasolo, faamotu uma mai le tatou pito lea ona lafo loa lea o lea ua sauni mai le Fofoga o Alii o le Tautua Samoa.

**Afioga AFOAFOUVALE JOHN MOORS (Palauli):** Ou te manatu lau Afioga o lou taimi lenei aua foi pei ona lausilafia, o Palauli o le atoaga lea o Pule, e ao foi la ona faamaea atu e Palauli lenei Itu.

Ae ou te tulai ma lou ava tele ma le faaloalo lava vaeatu le pau o le Maota nei ma le mamalu o le saofaiga, i le afio o lau Afioga i le Fofoga o le Maota, le Afioga i le Palemia ma le Vasega o Minisita faapea foi i Minisita Lagolago. E faapena le alaatai mai o le la Itu i le Taitai o le Itu Agai ma le Sui Taitai ma sui usufono o le la Itu o le Malu, tainane le afifio o Afioga i Ofisa Sili o Pulega o Matagaluega a le Malo faapea foi Pule Sili o Faalapotopotoga a le Malo ma le mamalu i le Failautusi o le Fono ae a le afaigaluega a le tatou Maota nei.

Ou te faafeiloai atu foi i le afio o Lana Afioga Mamalu O Le Ao o le Malo ma le Masiifo, faapea foi le Sui o le Fono a Sui Tofia ma le Masiifo, ae le faagaloina lava fatafaitaulaga e fia, ae a o latou Faafeagaiga taulagi o loo faapena ona faanonomanu i lo tatou atunuu aua le tauasuina o le vai o le ola.

E faapena foi ona ou faatalofa ma faafeiloai atu i le tapuaiga mamalu a Samoa atoa. E le faagaloina foi la le tapuaiga mamalu a si ou itumalo pele o Palauli, i le afio o Faasisina ma Sa Lilomaiava, alaatai Sa Faleletaua na potopoto, o Palauli ma lona Itu ma oe le Pule.

Lau Afioga i le Fofoga Fetalai, e leai sau lauga, ae na pau lava lea na o le fia faafetai aua o le mataupu foi o loo faapea ona taatia nei i le Laulau a Fono, o le mataupu a le uso a sui usufono mai Palauli le Falefa. Ia e le lauga le isi Palauli i le isi Palauli, ae na pau lea na o le molimoli atu o le faafetai i lau Afioga i le Minisita ma le Ofisa Sili o Pulega o le Matagaluega, faapea le aotelega o le Matagaluega o Tupe. Ou te talitonu o le mataupu o loo faapea ona tautalagia, o loo loma nei se itula ona tatou faamaonia lea o le Tala Faatatau Faaopopo o le Tupe 2013/2014. Ua vave lava ona ou manatua se tuualalo foi poo se saunoaga foi a se tasi o Taitai iloga o le atunuu tele lea o Amerika, a o soalaupule foi e lana Palemene se tonu aua le faafoeina o le Malo, e faapea se faamatalaga, tulou, o le a muamua ona ou faa-Peretania atu ona ou taumafai atu lea e faa-Samoaina, “Let us not seek the republic an

answer or the democratic answer, but the right answer - Aua tatou te saili se tali faa-Tautua poo se tali faa-HRPP, ae saili se tali e tonu ma e tatau.” Ia manuia lau Afioga i le Fofoga Fetalai, manuia sui usufono uma o le tatou Maota nei, manuia Samoa. Faafetai.

**FOFOGA FETALAI:** Malo faafetai faamanatu. Ia, o lea e faafogafoga le paia o le nofo a Pule o lea ua fetalai oe le Matua, ae malo le onosai, o lauga na faa-Pule, leaga e pule. Faafetai le saunoa faafetai foi le timai ma le fetalai i lenei vaega o le aso.

Ia o lea ua tulai mai le sui usufono mo Faleata Sisifo, aumaia le tofa.

**Tofa LEALAILEPULE RIMONI AIAFI:** Faafetai i le avanoa lau Afioga. O lea ua maea le lauga faa-Pule, a o lea o le a lauga Lealailepule. Sa ou faapea, e le o le tali faa-Tautua poo le tali faa-HRPP, a o le tali faale-Atua, aua o le Atua e ona le aso lenei, e ona le malosi uma lava ma le mana, alleluia.

E faatalofa i lau Afioga ma le paia o lenei Maota, e faatulou i le Fonousu a Samoa i lau Afioga i le Palemia ma le Sui Palemia ma le vasega o le Kapeneta, aemaise Minisita Lagolago. I lenei foi ituvai i le Taitai o le itu malosi ma lou Sui Taitai ua atili ai ona e malosi, aemaise o sui usufono mamalu o lenei itu o lupe faalele a Samoa ua aofaga potopoto i Tiafau nei aua se sailiga manuia mo le tatou atunuu. E faatalofa foi i le aufaigaluega a le Malo ua mafai ona tatou faatasi a o le faafogofoga a Samoa ma lau tapuaiga, malo le tapuai. Na pau lenei o le atunuu a tatalo le toeaina pe tatalo le loomatua, e le mafai lava ona le afe e faamanuia Samoa, faamanuia ona Taitai. O aso uma, o le ao ma le po. O le ala lea o le manuia o tatou, leaga o Samoa e fai i ai le upu, ‘E le sili le tai, e sili le tapuai.’

Faafetai i le tapuaiga a Lana Afioga Mamalu, O Le Ao o le Malo ma Samoa i ona tulaga faalupe, aemaise o le Aufaigaluega a le Atua. E faatalofa foi i lou itumalo o Faleata Sisifo, malo le tapuai, malo le soifua. O lea lava tatou te nonofo i aso uma, a i ai lava se mea e finagalo ai, o lenei ua ia outou lau imeli, imeli atu, ua ou tali vave atu.

Ia, faafetai i galuega faatino o lenei tausaga, tele galuega ma atinae lelei o feagai ma le Malo. Malo le galulue. E faapitoaugafa foi i lenei itumalo i lau Afioga i le Minisita mo Galuega, Felauaiga ma Atinae Eeseese, o lea ua molimauina i lenei aso ma lenei vaiaso i le tatalaina o le vai i Falelauniu ma nisi o nuu lalata ane, se faafetai. E le gata ua maua le vai, ae toe alu atu i ai ma le faamamaavega i le tosoina o le vai. Se leaga o le tamaloa e Tiakono Toeaina, e alofa, e mamao lana tofa, faamanuia le Atua i lau Afioga ma le Ofisa Sili o Pulega ma le Matagaluega, e le o ni galuega mo i tatou ae mo le atunuu ua maua le mapusaga mo nai nei tagata ua loa ona manaomia le suavai.

Faafetai foi i le aufaipisinisi, ua outou tagai i Vaitele o lea ua tino mai le miti a le Malo, o se taulaga o pisinisi fou ma pisinisi tetele ua i ai. Faamalo ma faafetai i le Minisita mo Punaoa Faanatura ma le Siosiomaga sa i ai i le faaiuga a le Malo ina ia faatau nei fanua, ou te talitonu a na le vave faatauina e le aufaipisinisi e le vave foi ona atinae ma faamautu. Ona pau le vaega e ao ona fai i ai se fuafuaga a le Malo, o isi fanua ua faatau ae le o mafai ona faatoa pe faamamaina ona e ono aafia ai le tulaga matagofie ae faafetai tele i lea vaega o galuega i totonu o lou itumalo. A fai loa la le uafu lea e fuafua e

le Malo e fai i Vaiusu ona atoa loa lea o mea uma, faafetai lava atonu o le a lata mai se taimi, pe le tupu foi i lenei Paeaiga a o se taimi o lumanai ua matagofie lea fuafuaga tuutuuumamao a le Malo. Ia aemaise o se aoga fou, lau Afioga i le Minisita mo Aoga, Taaloga ma Aganuu ua faatupulaia lava lenei itumalo, ua i ai se fanua mo le aoga faaopopo aemaise o Nuu Fou ma Falelauniu ona ua faatupulaia ae tasi lava le aoga o lo o i ai. O lenei foi ua faaoo atu le talosaga ma ave i le Malo o Saina pe alolofa mai aemaise o nai auala, e le o toe tele ni auala o totoe o lenei itumalo. Lau Afioga i le Minisita mo Galuega, Felauaiga ma Atinae Eseeese, o lenei lava ua taatia atu i ina e fai ai lau faasoosoa pe a lava.

Ona ou oo mai ai lea i le Tulafono Tau Faaofi o le Tala Faatatau o Tupe (Nu. 1) 2013/2014, ou te talitonu ua fulisia uma le Maota mo le pasiaina o le Tulafono Tau Faaofi o le Tala Faatatau o Tupe (Nu. 1) 2013/2014, e faigata foi ona fai atu se manatu leaga ou te i ai i totonu o le Komiti o Tupe Maua ma Tupe Totogi, ua lava lou malamalamaga i mea ia e faaalu ai tupe. E faafetai atu ai e ui lava o lo o fai mai nisi e le tele ae pau le mea faafetai o lea tatou te omai e faasoa, aua o le a sa tatou tala e fai pe ana faapea ua le mafai ona faatino galuega ona ua leai se tupe? Faafetai mo le Tulafono Tau Faaofi o le Tala Faatatau o Tupe (Nu. 1) 2013/2014.

O le vaegatupe aupito sili ona tele o lo o ave i le vaega o a tatou Taligamalo lenei a Samoa atoa. Ua ala ona faigofie ona faatino mai i Samoa nei, ona o tala aave atu i le matagofie o Samoa ma le lelei o le tatou atunuu i le tulaga o i ai i lenei vaitaimi. O le taimi lava e oo mai ai ma faatino lenei taligamalo, o i ina e faamaonia ai tala ua aave atu is a test of a leadership. O le uiga o lau tala o lea ua fai fale tetele, o mea lava e masani ai i taligamalo e pei foi o isi atunuu, a o le mea lea e tatau ona ave i ai le faamuamua o nai mea laiti i le taulaga.

O le vaiaso na tea nei sa ou sau ai i Apia, faatoa ou toe oo mai lea i Apia ma ou savali ai i le seawall a tatou. O lau vaai a outou agai ma tagai i ai i le tele o le vao ua ola faasolo atoa amata atu lava i autafa o le Ofisa o Tagata Tafafao Maimoa Mai Fafu ma faasolo atu ai i o. O moli i luga o le auala savali lea aua e tele ina savavali ai tagata i le po ua leai ma se moli o toe ola, o moli o le auala e ola tai tasitasi. Po o ai tonu le Matagaluega e a latou ia vaega? O vaega taua lava nei e tatau ona.....ae le o le faatalitali se i tali ni malo a o mea masani lava nei a le Malo e tatau ona faaauau pea.

O le isi mea matautia o drainage, e te alu atu o le tele o mea ua leai, sa lavea ai le toalua o le isi toeaina papalagi o lo o matou faigaluega e uma lelei le tafaoga a si faletua o taotooto i le fale ua le mafai ona – ua sulu aua e leiloa o la e savalivali atu lava i luga o le footbath ua solo atoa le vai ae le o iloa ua leai se kava o mea nei, o mea laiti nei e aupito sili ona taua ma e tatau ona i ai se Matagaluega faapitoa e vaai i mea nei o mea aupito sili ona taua. O lea foi na outou faafofoga ananafi o faapea atu le sui usufono o lenei itu o le zero carbon emission foi lea – ae saunoa mai le Afioga i le Minisita o le a emission utility. O mea nei e ave i ai le faamuamua i tagata nei mai fafo e omai e fono i le environment ma le tulaga o i ai. O lea ua fuafua le Malo mo le taliga o malo ae ana o au ai se manaia ae omai sei faavevela i inei ma latou vaai ai i le vevela o le atunuu talu ai a latou mea nei e fai, ae fai nai faleoo foi nei e tatau ai nai tainamu ma momoe ai i le po ma fiafia ai. Atonu o le toatele o tagata nei o se experience faapena foi o lo o omai ai, ae tatau ona ave le faamuamua i tua i le fale o le Malo, o le tasi lea vaega e tatau ona fai ai se

galuega e faamama ma fai ai se fuafuaga i nai malae taalo ma mea e taalo ai tamaiti i le afiafi pe a o atu matua e savalivali ma nai faleoloa manaia e ai ai aisakulimi e taua tele le mea lea aemaise o tagata nei e omai i le fonolelei o le toatele lava e feala ane loa i le taeao o loa savali. O le naunautauga lava ia ave le lagolago a le tatou atunuu atoa ma le tatou Malo i lenei taligamalo, o le taligamalo a Samoa. Ua tatau foi ona i ai ni nai awareness programme foi nei e talatalanoa ai i le atunuu ma tapenapena mamao mo lenei fonotaga.

Ona oo mai ai lea o lau faamatalaga lau Afioga i tupe ia na aumai mo le afa. O lea ua atoa le tausaga ae na afea foi i lauga a nisi o sui usufono ona e lei tufaina le tele o tupe ma faafetai i le Atua e lei toe afatia pe pagatia tatou i lenei tausaga a o lea lava e totoe masina. O le tali a le Matagaluega, se ua matou fiu i conditions ia e aumai e le World Bank, ou te talitonu e i ai foi emergencies i auala faavavevave e faatino ai le Faletupe o le Lalolagi ina ia vave ona tufa le tupe i tua ma faaoga. O le a nei se tatou tala pe ana faapea e toe oo mai foi se isi matagi ma se isi afa e lei faaogaina lava nei tupe? E fautuaina le Matagaluega o Tupe ma nisi o Matagaluega o lo o aumai ai nei tupe, faamolemole sei tagai ane i ai ina ia vave faaoga aemaise lava o lea ua lauga agai i le vai o Vaisigano. Ae manatua foi ina ua fai le auala i Tiavi sa i ai foi nisi sa lagalaga finagalo e oo lava i lenei itu i le faiga na fai ai e le tusa ai ma faiga faavae ae na faatino lava....

**FOFOGA FETALAI:** Malie le sui usufono, sei tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, ua faigata tele foi Fonotaga e fai i le aoauli ua tele ina momoe tagata i le monotones tele o le leo ae le faapea ina ne i te i ua taitaiseseina ai, e tele lava tatou polokalame ua uma ona faatino i vaegatupe lea sa aumai i le afa, e tele lava a tatou polokalame ua uma ona faatino aemaise lava o seleni ia e aumai e fesoasoani ai ia i latou i o latou fale lea sa faaauuala atu i le tatou Housing Corporation faapea foi ma nisi aemaise o faletalimalo, ua uma ona faatino le tele o lenei fesoasoani. E le gata i lea o tatou auala, eletise manatua foi na pepe faasolo atoa le eletise. Ua ou taua ia mea ona e laititi lava se vaega lea e aafia ai ona e i ai mafuaaga, o mafuaaga o i latou e tatau ona aumai a latou talosaga o le vaega lea o le aufaifaatoaga. E le mafai ona avatua ni mea seiloga e omai ni tagata e talosaga, lea ua uma ona saunoa atu ai le Minisita o lo o faafeagai ma ia foi fesoasoani. Ua ou taua le mea lea ona e foliga mai e tele le mea e aumai ae le o mafai ona faaalu atu i tua, o le tele o vaega o le fesoasoani lea ua uma ona faatino.

Ua outou silafia le afa tele lea na tupu i Amerika o le Katrina? O lea ua ou tau to manatu nei po o ua atoa ea le sefulu tausaga talu ona agi e oo mai nei lava o le tele o vaega o le atunuu e le i oo i ai le fesoasoani a Amerika a o la e tupu i totonu o le atunuu ua foi mai i le masina, o lo o umia meataupito sili ona matautia, e tutupu mai loa ni faalavelave e muamua lava i ai Amerika, a o lea ua tupu mea si tuafale ae oo mai nei e le o mafai ona latou faatinoa uma polokalame.

E oo foi i Kalaiasetete e oo mai nei o le tele o fale na faaleagaina e lei taitai ona faaleleia. A o tatou i i le vaega lea na faaleagaina e le Tsunami o la ua

uma fale ma faaleleia le tele o nuu e pei o Saleapaga, o la ua nonofo lelei i uta i mea sa lei nonofo muamua ai.

Lau Afioga i le Fofoga Fetalai, ua ou tulai atu ona e taua le vaega lea e taua e le sui usufono e i ai nai vaega ia pei ua fai foi sina mamafa tele. E ala ona faataatia e le Faletupe o le Lalolagi nei ona ua tele atunuu o le lalolagi ua fai i ai fesoasoani e avatu lava ae leiloa poo fea le mea na oo i ai na tupe, e avatu faaoga sese. O le ala lena e ala ai ona faataatia e Faalapotopotoga nei aiaiga ina ia iloa tonu ai o lea e faaoga tatau seleni. O le ala foi lena e mataitu ai e Matagaluega aiaiga uma ia sei faamalieina ona faatoa mafai loa lea ona faatino. O lea foi ua saunoa atu le Minisita ua le o toe mamao nei ona amata faasolo loa lea o le latou polokalame. O le mea la lea ua ou tulai atu ai sei tau talitali atu le maemaea o le saunoaga a le sui usufono leaga e laitiiti lava sina tamai mea ae pei o le a faaleaogaina uma ai le galuega tele ua uma ona fai.

**FOFOGA FETALAI:** Malo faafetai faamalamalama i lau Afioga i le Palemia.

Tulai mai le sui usufono e faaauau le saunoaga.

**Tofa LEALAILEPULE RIMONI AIAFI:** Faafetai, leai e tele lava galuega ua uma ona faatino, faafetai o lea ua saunoa le Minisita o le a faatinoina nei galuega, o le a ou see ese i le isi itu. Ona pau lava lea lau Afioga i le Fofoga Fetalai, o le vai i Fugalei ma Taufusi ua i ai ma le mea fou lea i Pesega i le vaega o lo o i ai moli, sa le masani e moni lava sa i ai muamua ae pei ua ese le tulaga ua i ai ae faamolemole sei toe tagai ane i ai i lena vaega. O le vai lea i Fugalei ma Taufusi ae alu ai nei o le mea ua tupu ua sefe fale fou ia e lei leva ona fausia ua ou vaai atu ua tanu i luga....

**FOFOGA FETALAI:** Malie le sui usufono, sei tuu atu le avanoa i le Minisita e ana le Matagaluega.

**Afioga Hon Manualesagalala Enokati Posala:** Ua ou tulai atu ona o le mataupu e pei ona laga e le sui usufono, o le tulaga lea e faaauau i ai sailiiliga. O luma o le SMI o lea ua alu le faataufofo i se konekarate e mafai ona latou faaaluina le vai lena e toa i ina, o lona uiga o lea ua amata faatino le galuega a le Matagaluega o le Pulega o Felauaiga i luga o auala tetele. E pei ona tau maua atu i le tulaga o le faatinoina o le galuega i Tiavi, leai sa agai lava i le tulaga o mea masani ma faiga faavae a oo loa ua declare o emergency ona fai lea ua taatia faiga faavae ae sa faatino lava e le Matagaluega i le tulaga o le aumai o tauofoga, ona filifili mai ai lea. E ave ifo le faavasegaina o konekarate Category A ma faasolosolo ai faapena e fua ia latou performance ma le tulaga malosi e mafai ona latou faatinoina lea galuega. O lona uiga o le mea e ave ai le agaga faafetai i nei galuega e pei lava o le tala a le Tusi, a fai atu e savali i le maila e tasi ae alu i maila e lua, a manaomia se ofutino ae ave i ai ma le mitiafu, na maoae le faatinoga i se tulaga lelei e pei ona molimauina nei auala. O le agaga fiafia ma o le lagona foi lea i konekarate o lo o faatinoina galuega a le Malo o le fai o tulaga lelei ma faatino galuega aua le manuia o le atunuu.

Ma le agaga faaaloalo lava.

**Tofa LEALAILEPULE RIMONI AIAFI:** Faafetai i lau Afioga i le Minisita, se mea ina a lelei o le Minisita e galue a fai atu le tuualalo ae fai mai o la ua ahead, malo. O le auala i Tiavi lau Afioga, o le mea e fai atu ai lau tala, ou te le o popole po o le a le ituaiga faiga na fai ai, pau lava le mea ua i ai nei le atunuu o le faafetai i le matagofie. Afai la na fai i se tulaga faa-emergency sa tatau foi la ona mafai ona fai i nai isi auala ia ae le o se tulituliloa o ia mea a o le matagofie o lea auala i Tiavi malo lava faafetai.

O le a ou see mai loa i le Matagaluega mo Faatoaga ma le Faleoloa o Faatoaga. E le mafai ona ou misia le tulaga o i ai, a ou vaavaai atu the new look, o foliga o le toaina ua sui, o lana soesa ua le gata ua pei o se Minisita ae ua pei o se Saienitisi.

Lau Afioga i le Minisita ua faamalo faafetai, ua tele galuega lelei ua tulai mai, ua fiu Samoa e tausami i mea eseese. O lou manatu i ai maimau pe ana i ai se tulafono foi lea e tau ina taofi ai le aumai o meaai tuu aisa e pei o moa, mamoe mo sina ono masina ae sei tatou aai lava i mea ia e maua i inei, ai lava se manaia, manatua foi na leai se lega ua toetiiti luasefulu tausaga o leaga le talo ae na tatou soifua lelei lava ma maloloina. Ae sei i ai la sina taimi foi lea e i ai sina mea faapena, ai se manaia.

O lau polokalame lea o le niu, ua matua lelei lava, o le challenge lea ua i ai nei o le niu ma le copra, le koko, aua o mea nei e lua o la e lelei le maketi i fafo. Na pau lava lau fesili i le niu lau Afioga, poo i ai se togafiti ua fai i le mea o le manu ainiu, leaga e i ai nai tagata ia na lipoti mai i latou toganiu fou ua tele ina satia e manu. Poo i ai sau fuafuaga tuutumamao i te i ua toe faaletonu i le tele o le galuega e fai ae toe afaina ai mo le agai i luma. Aua i lou lava talitonuga, tatou te o lava i i ma i, se o le tali lava lea o tatou, pe a tatou mananao e faatupulaia oloa i fafo, faatupulaia galuega ma tuu i lalo mea mai fafo, se toe aputiputi nai mea ia.

O lea ua e saunoa i le taro chips, ia, sa ta i ai anapo i mea a le Matagaluega o Aoga lea sa fai i Matagofie na ta evaeva ai, ae aumai chips o mea o potato chips. O le mea la lea e fai atu ai, o le mea lava lea e tupu ia tatou, e tiga lava ona faulalai tatou taro chips ma banana chips, ae o lava Matagaluega faatau mea nei mai fafo. A avatu foi la le Tulafono e faasa ai, ona faapea foi lea ua a, ae ua tatau ona promote tatou mea nei, aua a le o lena, toe foi i le mea na i ai i le model lea na fai nei e lei leva atu o le private sector partnership foi lea, toe o le Malo e toe fau ma faalelei ae tuu loa i tua i le private sector e omai e run. O lele ua faasalalau mai i le Vailima i le vaiaso nei, o lea o le a faaoga le ulu e fai ai le pia. Ia, talosia ina ia tupu lea mea e galulue ai ina ia tulai mai e faaoga i ai lenei mea, ma le SROS. Lau Afioga i le Minisita mo Punaoa Faanatura ma le Siosiomaga, talosia ia vave mai ona faatupulaia tatou oloa e faaoga i ai fua o faatoaga ma faaeleeleaga i lenei vaitaimi.

Lau Afioga ona oo mai lea i le isi vaega lea e ave i ai le tupe o le broadband, ou te talitonu e le o se taimi muamua lea ua ou lauga i le mea lenei lau Afioga i le Minisita i le tau o le internet. O le tali mai a lau Afioga, o lo o fai suesuega, atonu o le a vave mai se taimi, ae ou te talitonu e oo mai lava i le aso, e le o mafai lava ona i ai se fetuunaiga. O le tasi lenei tau faaopoopo maualuga i le tau o galuega a le Malo ma le tau a tagata taitoatasi. Sei e alofa ane i ai poo le a le tulaga o i ai. O le broadband, o lau fesili i lau Afioga, aua e \$40+miliona le tau, e lelei. O se mea lelei. Poo i ai se internet component o le mea lea, aua e tasi lea mea taua o se E-Government, aua o mea taua lava nei o le system lea e tatau ona i ai i totonu. Afai foi la e i ai se internet component i



le alu agai i luga pe a maea ona fau nei e le Vaega lea mea nei, o ai la o le a fuafua e manage ina, ae ua tapena lau Matagaluega e manage lelei le system lenei aua e le o se mea faigofie? Aua a tatou faia foi ae tuu i tua i le private sector, e ono faaopoopo foi ni tau maualuluga mo le Malo ma galuega ma toe defeat ai foi le mea na ala ai ona invest tatou e aumai lenei mea taugata. Ae lelei pe a tagai ifo i ai lau Afioga i nai mea ia. Afai o le solution lea ua taua mai e le Regulator ua mafua ai ona le aumaia i lalo le tau o mea ona o le gateway lea e control e le SamoaTel, ua tatau ona fai se fuafuaga a lau Afioga ma le Malo ae aumai se tatou gateway e faaoga ia tatou galuega ma mea e fai pe afai ua le mafai ona tuu mai i lalo le tau o nei mea.

**FOFOGA FETALAI:** Toe lima minute o le sui usufono.

**Tofa LEALAILEPULE RIMONI AIAFI:** Ia lau Afioga, ona ou oo mai lea i le Matagaluega o Leoleo. E le toe tele se tala o lea ua saunoa i ai le Minisita Lagolago, ae faafetai mo galuega lelei, o le mea taua o le faaauau ai pea, ua matagofie galuega faatino, a o le luitau lena, ia mafai ona faaauau pea galuega. Na pau lava le mea i o i Oloamanu, o le nofoaga taua le nofoaga lea leaga o tupulaga la e i ai, e tatau ona faataua i latou o loo vaaia. Matou te o atu i le aso lea, e leai se telefoni, leai se leitio ualesi e ualesi mai ai ma fesootai ma outou, o mea e nonofo ai nai leoleo, aemaise o si tama lea e taitaia. O mea taua mea ia lau Afioga, aua o le tulafono o le totogi, e fua lava le totogi i au galuega faatino. O lena ua faapena atu, ae o lo o i ai lau Minisita Lagolago e malamalama i nei mea, pe a lua fetuunai ai. E tasi le mea e tatau ona tagai i ai lau Afioga, ona e talafeagai lava le matou talanoaina o le mataupu lea i fanua ia o le Matagaluega o Faatoaga lea e feteenai ai nei ma le Matagaluega o Leoleo, e tatau ona vave fai i ai se fuafuaga, ona o le taimi lea na matou i ai ae alu ane le taavale i totonu o le pa o lo o i ai Oloamanu. O loo lipoti mai e le Matagaluega, e i ai taimi e ono oo ai i se faalavelave ae le o mafai ona soalaupule le tulaga lea ina ia tagai ifo i ai lau Afioga.

O le Soifua Maloloina lau Afioga, ua lava foi tala e fai i ai, faafetai i le Afioga i le Minisita. Na pau le mea lea e popole ai lou loto, o pili nei ua tasii i le tai \$30 i le aoina po ua i ai se fuafuaga i le taimi e ao ai, aua e faigofie lava, na ona uma lava o le vaiaso e alu atu toe tuu mai lau invoice foi lea e \$150 pe \$200 ae alu atu ma le faatoesega a le toeaia, 'se malie ua le lava lau tupe, e a pe a tusi ane i le Minisita sei e toe foi mai i se taimi totogi?' Aua o le mea lea e taugata lea e taua e le Minisita o le power, sa matou fesiligia le soifua maloloina ae faapea mai, o lo o feteenai ma le Malosiaga Tau Eletise i le rate lea e charge ai latou, o lea e charge latou i commercial rates, ae tatau ona charge atu latou aua e le o se pisinisi le mea. E tatau pea ona charge atu i le rate masani ina ia fetuunai ai le tau. Ia o mea na e i le va o Matagaluega, e tatau ona toe tagai i ai pe toe moomia lea mea.

O le mea lea sa ou taua pea lau Afioga i le Minisita e toe tilotilo pea i ai, o le model foi lea sa fai nei e le Public Works i aso ia na faataape ai i tua, tasi lea model o lea e lauvivilu nei le Pasefika i le matagofie ona faatino. Pe le mafai ona toe pursue pea le vaega lea aua o lea ua faipaaga outou ma le private sector i fomai nei e i tua ona totogi lea o le \$150 i le itula, ou te iloa pe a totogi lava i tua i latou clinic as a subsidy from Government ae o i ai tagata sao e vaai, e le iloa pe tuumamaina ai o i le Outpatient pe oo ai lava ina le toe i ai se Outpatient i le falemai, ae concentrate latou i mea foi nei o referrals ma

mea o le emergencies. A o mea na ou te talitonu, e tagai i ai lau Afioga mo le agai i luma.

O mea ia o vai tumaoti lau Afioga lea e tele foi se tupe e alu i ai, faafetai i le Afioga i le Minisita ma le Matagaluega. Sa matou asia isi vai ae ma te lei oo i tua i le mamao o le mea, ae le taugofie foi. Poo i ai se fesootaiga a Vaega nei ma le Water Authority aua sa ou faapea lava ua ia o le mea e tataua lava ona control uma e le Samoa Water Authority vai e feinu ai le atunuu, ia tasi lava le mea e monitor ina ma latou iloa le tele o le vai ma le aofai o le vai, ma le faasoaina o le vai ina ia tofi Samoa, a o lea e foliga mai e i ai vai tumaoti. Ia, o le tala mai a nisi nuu, se na matou o foi i le vai muamua e le lelei, o lea ua matou o i le vai tumaoti, ae o le mea e le taugofie. Pe faapefea se fetuunaiga, a fai fai nei la ae alu ua le mananao e faaoga le vai lea, o lona uiga o le a toe tagi mai foi i le Malo e toe o atu e toe fai se isi vai a le Malo, ae le taugofie le tupe lea ua ave e amata ai i le amataga.

Ia, ona ou oo mai lea lau Afioga i le vaegatupe lea e ave i le Matagaluega e Pulea Galuega a le Malo le PSC, i lou lava talitonuga lau Afioga, ou te le o tautala na o le PSC, ou te tautala i le tulaga o le public sector lea e i ai nei. Ma lau fautuaga i le Malo, toe tagai lelei i ai, ua fai si televave o le grow, o le tupu. E le o vave faapea le tupu a le private sector ae ua fai si televave o le tupu a le tatou private sector. Sei tagatagai lelei i ai, aua o le mea lea e tupu, a le o se Matagaluega fou i se isi tausaga, e oo ina Komisi fou ona atili ai lava lea ona tele. Aua a tilotilo i le Tala Faatatau Faaopoopo o le Tupe, pe a ma le 70% pe a e alu i le totogi o le aufaigaluega. O le mea lelei ae o le mea lea e tilotilo i ai, pe mafai e le Malo ona faaauau pea lea faiga i le agai i luma ona sustain le growth lea e i ai ma le cost i le Malo, aua e le taugofie, e le faigofie. Ae pe leai nisi auaunaga e mafai ona absorb, tuu i tua i le private sector e tilotilo i ai ina ia mafai foi ona galulue faapaaga ma le private sector....

**FOFOGA FETALAI:** Malie le sui usufono o lo o saunoa, sei tuu atu le avanoa i le faauilavea a le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaioi:** Lau Afioga i le Fofoga Fetalai, o le mataupu lea o lo o saunoa i ai le sui usufono, e leai se mea e ese ai ma le saunoaga a le isi foi sui usufono o le Vaega lava le la. O lea foi la ua toe faaleo mai i le tulaga lea o le talosaga mai sei tau taofiofi atinae a le Malo. E le mafai ona taofiofia atinae a le Malo i le tulaga o le tuu sei ogatasi ma le private sector. O lea lava o lo o i ai faiga faavae a le Malo e fai ma faamatuu atu ai i tua galuega. O lea lava e faagasolo e le o se mea fou nei o le mea ua leva. Ae le mafai ona limataitaiina le Malo i le private sector i le tulaga o le fua o le gaoioiga a le Malo i galuega a le private sector. O le tulaga sao foi ia, o lea e tele le fesoasoani a le Malo i le private sector, ma o le taimi lava e tupu ai le Malo, e tele foi ma le fesoasoani e faatelevave ai ona tuputupu ae foi le private sector latou, aemaise o galuega ia e fai nei, o lea e faalagolago i le private sector e supply mai ai le tele o materials. O lona uiga, o la e take e le Malo le lead i le tulaga o le uunaia o le tamaoiga, e le o faatalitali... Ana faatalitali le Malo i le private sector, e take e le private sector le leadership, semeamanu faapenei faatoa tatou oo mai i atinae ia sa fai i le tausaga e 1990.

O le tulaga sao lena lau Afioga i le Fofoga Fetalai, e le mafai ona taofia atinae a le Malo sei tau tuputupu ae le private sector.

**FOFOGA FETALAI:** Malo faafetai. Ia sei tulai mai le sui usufono e faaauau mai le saunoaga o lea ua uma lou taimi.

**Tofa LEALAILEPULE RIMONI AIAFI:** Ia o lea o le a see ese ma lea vaega. E toe tasi lava se mataupu lea lau Afioga ona ou see ese lea ma lea vaega.

**Tofa Levaopolo Talatonu:** Lau Afioga i le Fofoga Fetalai, ou te faatu atu le lafo, *Pe toe tasi ea le mataupu a si toaina lea pe a finagalo i ai le...*

**FOFOGA FETALAI:** Ia, e le tau faatuina se lafo o lea ua ou fuafua atua. Faafetai le faaaloalo Saleaula.

Tulai maia le sui usufono mo Faleata Sisifo e faaauau mai le saunoaga.

**Tofa LEALAILEPULE RIMONI AIAFI:** Faafetai o le a faauma atu. Talu ai ona o lea e taua i saunoaga le siitia pea o nisi o auaunaga a le Malo ona o le tau o le eletise, ia, e pei lava o le mea lea – na o se fautuaga e tuuina atu ona e faigofie lava le sii ma tuuai i le kiso, ae pe le tagai aua o se mea foi na tilotilo muamua i ai i le loss lea e maumau i le eletise foi lea e maumau. Aua na ou alu lava fai lau suesuega mai le Matagaluega, o le loss lea e i ai nei, e 18%, a o le loss e acceptable foi lele i le tele poo 8% i le 10%. O lona uiga, e maualuga tele lea vaega e maumau. Pe le mafai ona focus muamua e tilotilo i ai le vaega lea, aua afai e 8% pe 10% le loss lea e maumau, a faatupe, e \$10miliona i le tausaga. O le mea lea e tagai i ai le Matagaluega, aua e oo foi i le vai, o le tala foi lea o lea e fai mai ai le Pulega o le Suavai, e matua lava ma totoe le vai lea i Samoa pe a taumafai e o e sue le loss lea i le system. Pe le mafai ona ave i ai i ina le faamuamua, e le iloa poo le fofolena ma agai ai i isi mea, ae sei tau faatuatuai aua o lea e pei e uunai agai i le penisini....

**FOFOGA FETALAI:** Ia, o le a sei tulai mai le Afioga i le Minisita e tali atu lau mataupu faaiu lea le sui usufono mo Faleata Sisifo.

Tulai mai lau Afioga i le Minisita.

**Afioga Hon Manualesagalala Enokati Posala:** Lau Afioga i le Fofoga Fetalai, o le tulaga sa saunoa i ai le sui usufono i le tulaga o losses ia, ia, o galuega lava e faatino pea e le faapea o se mea a sue nei i le tausaga nei ona uma ai lea. A o le tele o le tulaga lea i le eletise, o lea sa i ai faafitauli sa i ai, e pei o isi nuu ma alaafaga sa i ai. O lea la ua amata ona tele le suiga pei ua amata ona maua vaega ia ma toe maua eletise ia sa alu i se auala faasolitulafono, e pei la o laasaga ia sa i ai. Ae tele lava le galuega e tatau ona faatino ma e faaauau pea. O isi mea o mita ia e aumai mai fafo, o le faafitauli e le mafai ona fausia a tatou mita ia ae aumai mai fafo. A vagana lava ua faaoga ona maua lea e i ai ni feteenaiga. E pei o galuega e faaauau pea le siakiina ina ia tuumama le pasene lea e aafia ai. E pei o le tulaga lea e pei ona saunoa i ai le sui usufono. Ma le faaaloalo tele.

**FOFOGA FETALAI:** Malo faafetai.

**Tofa LEALAILEPULE RIMONI AIAFI:** Faafetai. Atonu o le tulaga lea aua o lea ua faamaonia e le Afioga i le Minisita, o le isi lea vaega o le cashpower le isi mea e aupito sili ona lusi ai latou, ae faafetai o lea ua tagai i ai le Matagaluega. Afai e faaletonu, ia, sei toe tagai pe i ai se isi auala e sui ai pe toe faafoi i le mita i le mea na i ai, aua e le laititi le tupe o lo o gau ai. Ae faafetai. Lau Afioga, faafetai mo le avanoa. O le ola a le Samoa, e le ola na o ia, e le ola mo ia, e ola mo isi tagata, ola mo lona aiga, lona nuu, le Ekalesia ma le atunuu, leaga o le context faa-Samoa lena, is not who you are, who you represent. Ia, lau Afioga ma le Malo, faamalo le galulue. O le Vaega lena o le Opposition, na o le fautua, faafetai, faamalo, faamalosi, alu atu ai ma le faitio ma mea uma faapena. A o le Malo lava ia, e lauama tootoo ma faatino galuega, leaga o i ina e i ai le mamafa.

Ia alofagia e le Atua lou soifua lau Afioga i le Fofoga Fetalai. E te talavou, a o lau tofa e maualalo le lagi i le mea o lo o i ai. Lau Afioga i le Palemia ma lena itu ia alo ane i lena tausaga i galuega faatino ma galuega fai, lau Afioga i le Sui Palemia e sese le tala a le Taitai o le Itu Agai e step down a o le side step sa tatau ona fai atu ai, ma o le lakapi e te side step e toe sau foi toe faasao, ia ae aua tatou te avefaaletagata lea mea a ia malosi ai le loto.

Ia manuia lena itu, lau Afioga i le Taitai o le Itu Agai, e te moomia se faamalologa faale-Agaga, ua e tau mamao i le Alii. Manuia tele sui usufono o le Palemene o Samoa aemaise o le mamalu o le aofia, faafetai.

**FOFOGA FETALAI:** Faafetai saunoa i lau Afioga i le Fofoga o Alii o lea Itu o le Maota. O lea foi ua faafofoga le tatou Maota i au tuleiga ma au saunoaga ma au upu folafola aua la outou galuega fai. Ia fua le upu le sui usufono mo Faleata Sisifo i mea ia e fua mai i le Taitai o le Itu Agai, ae le o le tausolomua i le Taitai o le Itu Agai ona solifono i taimi uma e faatonutonu atu ai e le Fofoga Fetalai a tatou mataupu, ui i lea ia o suaga a le vaatele, aumai avatu ae faafetai le faamanatu, tatou te le feseluai pe toe taufaafuluina la outou tofa saili ma le tofa mau, tofa fetufaai ma le tofa fetala'i tatou te mau ai penina i mea loloto tatou te o i ai i taualumaga o talanoaga ma fetufaai. E ui i lea o lea ua tatou taunuu mai ua toe o le masaga. O upu a le atunuu i faagatama o le kirikiti, ia lau Afioga i le Sui Taitai o le Itu Agai, ia alo maia ia te oe le toe ulutaia o le tatou Maota, le mea o lo o gagaifo i ai le la o le taamilosaga o le pupula o galuega mamana a le Atua.

Lau Afioga i le Sui Taitai o le Itu Agai, ia tulai maia ua avanoa le Maota mo lau saunoaga.

**Afioga Hon AEAU PENIAMINA LEAVASEETA (Falealupo):** Faafetai mo le avanoa lau Afioga i le Fofoga Fetalai, ma ou te tulai ma le agaga faaalalo ma le agaga maualalo le pau o le Maotaga nei ona o le agaga faagaetia lau Afioga i le Fofoga Fetalai e mua ai se matou faamatalaga e faapea i le Nofoa, silasila foi lau Afioga i le maitau a lena usugafono, e toatasi lau Afioga ae 49 matou. O lo o maitauina pea faagasologa o a tatou fono, o nai saafi ua faamalo fai o le faiva, faamalo le faasoa, faamalo le faapalepale lau Afioga i le Fofoga Fetalai, e le faigofie le galuega. O moomooga ia tumu pea lau utu i le sosia ma le tamaoaiga faale-Atua e tapue ai le taua o le galuega o le faafoeina o Tualumaga o le Fono a le Palemene o Samoa.

Ona ou faatalofa atu ai lea i le mamalu o le Palemene o le Fonousu a Samoa. Le ee papaaa o lau Afioga i le Taitai o le Malo lau Afioga i le Palemia, le mamalu o lau Kapeneta i le Tamaitai ma Alii Minisita, Taitai o lenei Itu o le malu po o le vaega e agaia le Malo ma Afioga i sui usufono uma. O lo o tatou faatasi foi ma le mamalu i tamaitai ma alii o Faauluuluga o Matagaluega a le Malo i a tatou fonotaga. O outou lava o aao taumatau o le Malo e faatinoina galuega mo le manuia lautele o le atunuu, faamalo le tautua, o outou mama na.

E faatalofa atu i le tapuai faafofoga i Lana Afioga Mamalu O Le Ao o le Malo ma lana Masiofo, faapea foi Sui o le Fono a Sui Tofia ma lana Masiofo le faafofoga tapuai a Samoa. O ou Sa ma ou Paia e le avea, pei lava o le alofa silisiliese o le tatou Tama oi le lagi e tumau pea e oo lava i le faavavau.

Ona ou oo mai lea i le tapuaiga a si ou itumalo pele o Falealupo, i le afio o le Tupu na Faanofonofa ia Auvaa, afio Aiga ma le tapuaiga ma Siliialaei tainane le mamalu o le nofo a Faafeagaiga i totonu o le itumalo, fatafaitaulaga e fia. Falealupo, faamalo i lau tapuaiga ma au tatalo, ia manuia le tausaga fou. E le faagaloina foi le tapuaiga a le Faafeagaiga a lenei Ekalesia i Vini Fou le tama faale-Agaga o lo o taputapu pea i faiva i totonu o le Maota Fono a le Palemene, Susuga i le Faafeagaiga ia Fuifui Teevale ma le faletua.

Lau Afioga i le Fofoga Fetalai, e manatu sei faai se matou faamatalaga i le Tala matagofie Faapoo o le Tala o le Tupe mo le 2013 i le 2014, ae o le a sei muamua se lagona i mataupu ma ni mea o lo o tutupu mai i le taimi lenei i Afioga i Minisita e fitoitonu i ai Matagaluega taitasi, ona fai ai lea o se matou faamatalaga mulimuli e tusa ma le Tala Faapoo o le Tupe a le Afioga i le Minisita o Tupe.

E amata se matou faamatalaga i le Afioga i le Minisita mo Aoga, Taaloga ma Aganuu ona o le taua tele ma o le agaga faafetai i le tofiaina o se tasi o toe ulutaia foi i le Matagaluega e avea ma Minisita. E faigofie lava ona malamalama i se lagona e avatu ma le feau e aumai. Lau Afioga i le Minisita o le mea muamua e lagolagoina e lenei usugafono le siitia o totogi o faiaoga, aisea?, leaga e fua mai i outou alo ma a tatou fanau, o le agaga ia matua lava tapue soo se faiaoga especially the science ina ia matua lava ta oso. Soo se isi lava e fiafia e galue pe a lelei foi ma le totogi. O le mea lea e matua lagolagoina ia lelei totogi o faiaoga ma maua avanoa e mafai ai ona toe nofo aoaoina i totonu ao la e fai a latou aoaoga i le tatou Iunivesite, e taua tele.

O lona lua, faamolemole lau Afioga i le Minisita pe amanaia nofoaga isolated lea e i ai matou i Savaii e mamao i faiaoga e afaina tele i femalagaaiga inconvenience. A le alu le pasi i le itumalo atoa, ua oti atoa le mea ua le sau le faiaoga, faamata e mafai ona maua ni latou alauni i le vaega lea? O le matua mafatia lava, ou te iloa lelei lava. Pe la o ai e tele ni tupe, e le o areas atoa e i ai isolated...e le faapea foi na o Falealupo talitonu o amanaia.

O lona tolu, o lo o fuafua mai nei e Amerika Samoa le avatu o a tatou faiaoga. O le a lafo atu ia outou lena mea ua uma ona outou silafia. Lau Afioga e leai lava se isi e le fia alu i se mea e maua ai se tupe lapoa, o tama la ei o e tetele tele tupe, tasi ia mafuaaga e fai ia lelei leaga o le training ina o le faiaoga e le i lalo o le sefulu tausaga, a o le a lafo atu le mataupu lena i lau Afioga.

O lona fa, o le aoga lea o le Kolisi maualuga lea e tau fai i si o matou pitonuu o le Alataua, lea na saunoa i ai le sui usufono o le Alataua. E sao,

vaai le igoa e aua le faia i o ia matou i laufanua e masani ona fealuai ai Nafanua ae faaigoa i i i le mea lea ei Vaisigano, Alataua ma Falealupo. O le igoa sao lena o le mea, ae le o le tu i o ae faaigoa atu i i.

O tulaga na lau Afioga i le Minisita mo Aoga, ou te popole lava i le mea lea e tau o mau ai o tatou uso, e faigata tele ona ou tautala i ai ae o le mea moni lava ou te popole, o le omai lea o Tutuila e mafai lava ona leiloa a tatou faiaoga faapitoa pe a lelei le tupe, ua ou faalogo o le package atoa la e omai e le ni half package.

Ona oo mai lea o se matou faamatalaga i le Minisita mo le Soifua Maloloina, ua uma ona faailoa ma ua taatia le tele o le gaogaosa, pau lava le mea e tasi lea ou te toe talosaga atu ai i lau Afioga i le Minisita, free consultation na o le vaaiga lava o fomai, ae mai tele ai le mai i le suega o le tupe ae e lei vaaia le fomai, ae sa i ai i lou manatu, afifi mea ia e lua o le aia tatau, rights of the people or a person ma le obligations of the comment tiute tauave lava ia soo se faigamalo maopopo lelei ma malosi atoatoa ona tagata, leaga e eseese. E ese mamao lava Niu Sila ese tatou le atunuu matitiva e tau atiae, aemaise lava le soifua maloloina. Pau lava lea o lau talosaga, a o isi treatments uma po o le a lava le tologiina o isi mea ua lelei ma tatau, ae na o le vaaiga lava o le fomai...

**Afioga Hon Tuitama Talalelei Tuitama (Minisita mo le Soifua Maloloina):** Lau Afioga i le Fofoga Fetalai.....

**FOFOGA FETALAI:** Malie le sui usufono o saunoa, sei tulai mai le Afioga i le Minisita mo le Soifua Maloloina.

**Afioga Hon Tuitama Talalelei Tuitama:** Lau Afioga ma le mamalu o le Maota, ua ou tulai atu ona o lea ua toe laga e le sui usufono nisi o vaega ua uma ona ou taua muamua i lau folasaga e tusa ai ma tulaga o i latou e vaai fua, pei lava ona faamalamalama atu i se ata lautele o le faatoa fanau mai e oo i le 15 tausaga lea e free consultation. O le 65 tausaga agai i le 100 e free consultation po o luga atu foi o le 100, vaega lea ei le ogatotonu 15 agai i le 64 tausaga o lo o i ai i totonu i i ma i latou ia e 42,000 o tina ua i le tausaga e ono aafia ai i maitaga o lea foi la e free consultation. A faapea o i latou uma ia e 42,000 o le 23% lena o le atunuu la foi e free, i totonu foi la o le 15 tausaga e tau i le 64 tausaga o lea e i ai i totonu ii ma faamai ia NCDs. O NCDs e aofia ai ia le suka, o le suka e tusa ma le 23% tagata Samoa e mai suka. O lona uiga e tusa ma le 40,000 tagata o lea e vaai fua, toto maualuga, mai o le fatu o faamai TB, lepela o le taifoi herbatitis ostomyilities cancer into-health mental illness o lea e i ai i totonu o le 15 lea i le 64, e vaai fua uma foi. O le vaaiga lautele la i le faafuainumeraina, lau Afioga o le tausaga lea na tea nei i le falemai lava ia i Motootua e 128,319 tagata na vaai ai o i latou i lalo ifo o le 15 tausaga, e 28,230. O i latou e i luga atu ma le 65 tausaga e 15,398. O le aofai o i latou e i totonu o le category lea e 43,628. O lona uiga o lea folasaga lau Afioga, ma i latou uma ia na vaai i totonu lava o le falemai i Motootua lava ia mai le 128,000....

**Afioga Hon AEAU PENIAMINA LEVAISEETA:** Lau Afioga o lea ua ou maua atu, po o le a sou finagalo a o lea ua ou maua atu malo faafetai lava?

**Afioga Hon Tuitama Talalelei Tuitama:** E tusa na o le – e le maua se 20% o i latou nei e totogi le consultation a o le lautele uma o lea e free, o lo o i ai uma faamaumauga a manao i vaega taitasi e mafai lava ona ou tolaulauina i se isi afa itula pe a finagalo i ai lau Afioga.

**Afioga Hon AEAU PENIAMINA LEAVAISEETA:** Faafetai o lea ua maua atu.

**FOFOGA FETALAI:** Faafetai, ou te talosaga atu e tuu maoti i le tali faaiu a lau Afioga i le Minisita ona manino lea ma malamalama, a o lea ua manino le mea sa atugalua ai le sui usufono mamalu. Tulai mai le sui usufono e faaauau mai le saunoaga.

**Afioga Hon AEAU PENIAMINA LEAVAISEETA:** Ua lelei faafetai, tusa po o le a le tele o figures e aumai pau lava le mea e fai atu ai le tamaloa Falealupo o le 5 minute, five minutes free aua e le o tagata uma ia e saunoa i ai e free e manaomia le treatment? O le mea lea o le tagata tonu lava o le a oti ae leai la se tupe, a o na figures uma manaia, a o le mea lea na o le avanoa na o lenei lava 5 minute e le mafai e le Malo ona totogia le Fomai, o treatments uma yes totogi, ae taua tele le 5 minute lea e talanoa ai o le a oti mai – ia lelei ua uma atu.

Lau Afioga i le Minisita mo Galuega, Felauaiga ma Atinae Eseeese, faafetai tele lava, ae silafia foi e lau Afioga faamolemole lava, ua ta faamolemole atu o auala foi o lenei Itumalo, lo matou auala foi lea e alu i tai i Falealupo i le valu maila le umi o le auala lea, e le se tau tuu i lalo le auaunaga taua a i latou o lo o faia ae masalo e manaia pe a e asiasi i ai ona iloa ai lea o le eseese pei a ua e alu moni i Savaii. Faamolemole o auala galue, masalo o lau Afioga i le Minisita, na ona logo atu pea faamolemole e tolu o matou auala galue, e lua uta e tau i le Tuasivi ma le tasi e sau mai tai i le aai e tau mai uta i le valu maila i uta, faamolemole e le i asia na o matou auala ia ai lava o pisi. O matou e masani lava i le mea lea o le tapuai, na o le tapuai lava, lea na ona logo atu, lau Afioga se i silasila ona pau lava lea o le mea matou te talosaga atu ai i lau Afioga o matou auala.

Lau Afioga i le Minisita mo Fesootaiga ma Faamatalaga Tekonolosi, faamolemole i le taimi lea ia Ianuari i le taimi na tetele ai timuga ua ta fiu le mea e tali telefoni, tulou lava le pau o le Maotaga nei, a o le mea moni le mea lea. E telefoni mai Savaii ma fai mai faamolemole ua matua galua lava i inei ae faamolemole o le a le tala o le tau? E sau se afa se i o matou.....? O le faapuupuuga e matua leai lava se communication a i inei ma le la itu o le motu o Savaii. E leai se leitio e maua i o, leai se televise, o le fesili, faamolemole lau Afioga i le Minisita atoa ma le Palemia, e alu ai faapea, faapea au o tatou e advance, e le mafai ona fesoasoani le Malo i Private companies ia i le air ma le.....reserve le see as old foi lea ...

**FOFOGA FETALAI:** Malie le sui usufono o lo o saunoa, sei tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le sui usufono nei foi e seasea lava alu i Savaii a o au nei e fai ma alu i Savaii ma ou tilotilo ai i TV ma ou

vaai ai i polokalame o le tau lea e alu atu pea, sole matua e pepelo tele lava. O au ou te alu soo i Savaii ma ou moe ai ma ou vaavaai ai i polokalame ia e o atu aua e le faapea o polokalame o le tau lea e gata ai i i, e alu atu foi i leitio, se tuu ia lea mea o lou talapelo. Ua ou talanoa soo lava i isi foi Aeau o lo outou Itumalo, “o fai a ma alu atu le tama lea?” Ou te lei vaai lava i ai. O le a faapefea nei la ona e sau lipoti mai lea ao lena e te le o alu i Savaii? Na o le pau lava lau fautuaga, sei fai ma e alu i Savaii ma soia e te pepelo soo i totonu o le Palemene.

**FOFOGA FETALAI:** Tulai mai le sui usufono e faaauau mai le saunoaga.

**Afioga Hon AEAU PENIAMINA LEAVAISEETA:** E leaga o lo o faafofoga mai le itumalo e le nofo au i o ae fai e oe le tala o lou itumalo, o le mea lena e tau o le pepelo le mafaufau.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** E i ai lona mafuaaga, manatua foi o le tele ia o Komiti, o le tasi lea o mea e ala ai ona iloa e au faamatalaga, o Komiti ia tou te fai mai ai e soia, soia, soia le filia Komiti, a o Komiti nei o le isi lea a latou galuega e fai, e feiloai ma o i tua, feiloai ma o i tua ma omai ma lipoti mai. O le mea lena ou te.....a ou le alu la i Savaii ae ou te tapa fautuaga a le Komiti lea sa ma i ai ma le Afioga i le Taitai o le Itu Agai i le isi foi faalauiloa, o lauulu sinasina uma o tina, tamaitai ma toeaia. O lea sa ou fautuaina ai le Afioga i le Taitai o le Itu Agai, soia tou te toe upuvale i toeaia o le atunuu o lea e i totonu o le Komiti o lo o fautuaina le Malo i mea ia o lo o tutupu i o tatou itumalo uma. E le o se upu la e ave ane ai le upu lea ou te talanoa atu ai le sui usufono mo Falealupo, e kava uma lava lou itumalo e le gata ina ou alamu atu i Savaii ma ou toe alamu mai, a o lea foi e maua e au lipoti mai Komiti uma lava.

**FOFOGA FETALAI:** Malo faafetai, tulai mai le sui usufono e faaauau le saunoaga.

**Afioga Hon AEAU PENIAMINA LEAVAISEETA:** Ua ou tapa fua i lou suafa se Tui, aua le faia ta mea faa St. Joseph i i pe a faapea, o le mea foi lea e tau fua atu pauga o pepelo po o ai... A silasila foi lau Afioga o la e faafofoga mai lou itumalo, e leai se televise o ola i o is a matter of practice all that area e oo mai lava i le matou area o le fesili la faamolemole, o le a le mea e le fesoasoani ai le Malo o transformer e le lava people cannot afford, a o le a la outou mea e fai? O la outou motto e faapea, “O mea e lelei ai i inei e lelei ai foi Savaii, and that’s very – this is BS, o le mea lea e tau o le BS a?”

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Ua ou talanoa soo lava i totonu o le Maota lena, o le tafao, tafao, tafao lava o le sui usufono lea, faatoa pau lava lea o le taimi e faatoa lagona ai le leo. E le o taofia oe, o lou tiute lea e te sau e te fealuai ma e alu atu ia te au. Ua faafia ona e folafola e te alu atu e avatu au mataupu ia te au? Na o le fai o lea suati, faatau panikeke ae e te le alu atu, fai le isi suati faatau panikeke, ae e le alu atu. O le a le mea e te oole soo ai au?



**FOFOGA FETALAI:** O le a faataatia ese Taulumaga a le Fono Aoa mo lana malologa masani o le afiafi.

*Na faataatia ese Taulumaga a le Fono Aoa mo lana malologa i le itula e 4:45 i le afiafi ma toe faaauau i le itula e 5:23 i le afiafi.*

**FOFOGA FETALAI:** Faamalo atu le onosai i leni vaega o le aso, ou te talitonu o lea ua tatou taunuu mai i le vaega mulimuli o le tatou galuega, e i ai foi le agaga maualuga ua maua lo outou malosi i le tino aua le faaauauina o a tatou galuega. Faamalo atu le onosai i le paia ma le mamalu maualuga o le tatou usugafono masalo e le o toe mamao ona tatou taunuu foi lea i le taimi malolo.

E faia le malologa o saunoa le sui usufono mo Falealupo po o le Afioga i le Sui Taitai o le Itu Agai, tulai mai e faaauau le saunoaga.

**Afioga Hon AEAU PENIAMINA LEVAISEETA:** Faafetai mo le avanoa i lau Afioga i le Fofoga Fetalai, ua maua foi se faasiliga malosi o le Maota nei.

E faia le tatou malologa lau Afioga, na o sina tamai vaega laitiiti lava lea, e leai e le mamafa tele ae taua, i le saunoaga a le Afioga i le Palemia e sese lau mau. E i ai molimau i le Maota leni o sui usufono i le matou Itu. A fesiligia la sui usufono ia mo Vaisigano Nu.2 ma le sui usufono mo Alataua Sisifo, ona molimau mai lea a o molimau le atunuu, pe moni lea mea e tupu i le tatou itumalo. E afaina tele. A o le mea ia o le lakapi, e matua... na o le Manu Samoa ma fia Manu Samoa, ae le oo atu le mea lea i o. O le mea la lea, o le mea moni lava, o le talosaga na tuuina atu, faamolemole le Malo, e le mafaia e kampani nei e tele le tau i sina fesoasoani aua e mafai, e leai ma se mea e le mafai. Lafo atu ia i lau Afioga i le Palemia i sa outou fesoasoani ia matou. O le tala a le Tusi Oti, e fia fai moa uma tama, matou te fia matamata uma foi matou i le lakapi, ae le iloa, aemaise lava le ea, le 2AP.

**FOFOGA FETALAI:** Ia, e manatu o lea ua tulai mai le Minisita ou te iloa o lea o le a tali manino le Afioga i le Minisita e tusa ai ma lou atugaluga.

**Afioga Hon Tuisugaletaua Sofara Aveau (Minisita mo Fesootaiga ma Faamatalaga Tekonolosi):** Lau Afioga i le Fofoga Fetalai, faafetai tele mo le avanoa. E faaloalo foi i le avanoa o le sui usufono mamalu. Ou te faaeteete lava i le ituaiga saunoaga lea e le mafai, e le mafai e le kamupani. Ou te faaeteete e amanaia tele le ituaiga saunoaga lea, ona o la e i ai le latou tiute i lalo o le latou laisene e faaatoa le cover o le atunuu. A sau la ma faamalosia e tatou le saunoaga lea faapea e le mafaia e le kamupani, ona o lea e i ai lo matou talitonuga, e mafai, ae i ai isi mafuaaga. O lea la e tau galulue atu matou i isi mafuaaga ia, ina ia faatino ai le tuutuuga ma le maliega sa ala ai ona to i ai le laisene, aua o le mea moni lava i le taimi leni pe afai e le o au, ma e faamaonia e le o au i isi afioaga, o la e la e soli e latou le latou laisene. O le faataunuuga la i le saunoaga lea, taatia ia mafuaaga ma le matou galuega e fai atu pe mafai pe le mafai, ae a aumai loa le saunoaga lea faapea, ona avea loa lea ma mea e fai ma taunuuga o le faamoemoe e lagolago ai mau ia a kamupani, lea na ala ona o i ai e mafai. Ou te le talitonu la e faatauaina tele le ituaiga saunoaga lea, ona e avea ma mea e sese ai ma faigata ai le

matou galuega lea e tau fuafua atu ma fofou atu agai i le faataunuuga o manaoga sa ave ai le laisene. Ma le faaaloalo.

**FOFOGA FETALAI:** Malo. Ia, sei tulai mai le sui usufono mo Alataua Sisifo.

**Afioga Lafaitale Patrick Leiataualesa (Alataua Sisifo):** Lau Afioga i le Fofoga Fetalai, e leai se agaga e faalavelave i le saunoaga a le sui usufono mamalu. Na pau lava la matou tala ona o lea ua saunoa le Minisita, o le itumalo lenei, e matua le ola lava se 2AP. O se upu foi i le Televise, o la e sao lelei lava le saunoaga a le sui usufono mo Falealupo.

**FOFOGA FETALAI:** Onosai mai lava le sui usufono sei tuu atu muamua lava le avanoa i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, na ona faafesili atu lava, o ola le FM?

**Afioga Lafaitale Patrick Leiataualesa:** O la e ola.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Ia ua uma. O le a la le mea e toe pisa ai? O le mea tonu lava lea sa ou fai atu ai, e le agai atu ia te oe ae agai i le sui usufono mo Falealupo. O le upu a le sui usufono mo Falealupo, e lei faalogo faatasi i se tala o le tau, e matua leiloa poo fea le mea o i ai le tulaga o le tau, a o lea na manino lelei i le saunoaga a le sui usufono mo Alataua Sisifo, na o le FM la e latou te mauaina. Ua uma. O le a la le mea e toe pisa ai? O le ala lena na ala ai ona faalautele a tatou laisene, sa na o le tasi lava le laisene na o le 2AP. O le ala lena na ala ai ona faalautele ia maua ma le FM. E le faapea la e ese le news o le tatou tala o le tau e alu atu i le FM ese le 2AP. O lea ou te agai tonu atu lava i le tala o le tau. Ou te le o agai atu lava i nisi mea, leaga o le tala o le tau lea na agai i ai le saunoaga a le sui usufono mo Falealupo i le luluti o le faaletonu o le tau, e leai ma se mea na matou faalogo i ai. O le ala lena o lea ou te faasao atu ai le mea lea, ou te le o agai atu lava i isi mea. Ae a e oo lava ia Lepa e le o matamata foi i ni lakapi ona o lea e i ai lava polokalame faagasolo. Afai ua faamatuu atu i tua e le Malo le Televise, faamatuu, e le toe aapa i ni Televise, ae tuu pea i le private sector. O lea foi ua faafogafoga mai o lea ua ou talanoa i le Minisita, e i ai Televise i fafo lea e manao e aumai, aumai. Aua le toe popole i ni Televise i totonu. Afai o le faiga lea le faiga, aumai loa Televise mai fafo, ua lava lea taimi na tuu atu ia latou, latou te le iloa fai ni Televise.

**FOFOGA FETALAI:** Ia, sei tulai mai le Afioga i le Minisita, mo le faasaoina o le taimi o le sui usufono mamalu, o lea ua malamalama. Tulai mai lau Afioga i le Minisita pe i ai se isi mea faaopopo.

**Afioga Hon Tuisugaletaua Sofara Aveau:** Lau Afioga i le Fofoga Fetalai, e leai o lena ua saunoa atu le Afioga i le Palemia i nisi vaega, ae o le isi vaega sa ou fia soso atu ai, i le tausaga atoa lea na tea nei, na tele lava le aafia o

tatou faasalalauga ona sa tau fai le maota o le 2AP. Ae i ai le taimi na matua ki ai lava i lalo le malosi o le power e fai ai faasalalauga. E le oo atu la le tele o faasalalauga i tua i le tele o isi nofoaga sa le oo i ai ona o lea sa tau fai le tatou fale. O lea la ua maea, o lea o le a toe amata lelei ma toe faasolosolo atu mea e tatau ona fai. Ae sao e i ai taimi sa... Sa ou alu ia Tesema i Savaii, sa ou taamilo, e ki i le isi vaega e manino, e ki i le isi vaega e pau e le manino se leo. O la e la ou te faamaonia le faamatalaga lena, ae maua lava le faasalalauga. Na pau le mea o lana saunoaga lea sa aumai muamua lava i le amataga, e leai ma se communication e maua, a o la e talanoa i le telefoni, thats communication. O le uiga la o le faamatalaga, afai e desperate lava o le mea lena, o la e maua lava, e i ai avanoa e maua ai. Faafetai.

**FOFOGA FETALAI:** Malo. Ia malie le sui usufono mamalu, sei tuu atu le avanoa i se tasi o sui usufono mo Vaisigano Nu.2.

**Tofa Motuopuaa Uifagasa Aisoli Vaai (Vaisigano Nu. 2):** Lau Afioga i le Fofoga Fetalai, o lenei mataupu e le o se mataupu fou, ua leva foi ona ou lagalaga i le isi foi Paeaiga talu ai. E pei e sao lava o le tala o le tau, ae pei o lea e fia faafofoga mai o matou itumalo i taimi faapenei, poo le a se manatu o le sui usufono o fai. O le mea lea e talosaga atu ai i le Malo, e le o maua le 2AP e si o matou itumalo mai Falealupo ma Vaisigano Nu.2, e faapea foi Neiafu ma le itu Asau. Ma le faaaloalo.

**FOFOGA FETALAI:** Malo. Ia e manatu o lea ua manino le faamalamalama a le Malo, o lea foi ua faafofoga mai. Ia malilie le faa-Vaisigano ma le Alataua, Palauli agai mai i le pito lea o tatou, o lea ua tali manino le Palemia. O lea foi ua saunoa manino le Minisita e a ia le Matagaluega, e tele feutanaiga lea e faagasolo. Afai foi o a ni faaletonu, o lea lava e agai ua maea ona momoli le tulaga tau Televisi i le private sector. E le faigofie foi le faiga o le galuega a le private sector, e tele tupe e manaomia ma tupe faaalu. O lea foi faatoa maea le fale fou o le tatou 2AP, ou te talitonu, ia lava pea le onosai. E manatu le faamoemoe o itumalo uma o lea tatou te maua e le o maua ni leitio ma ni Televisi, ia, o loo i ai auala. Ae lava le onosai, o lea ua agai atu le tatou Matagaluega e faaauu le galuega, o lea foi ua saunoa manino le Palemia, o lea ua laa le Malo i nisi o fale Televisi pe a faapea o i ai ni toatuga i nisi foi o fale Televisi i totonu o le atunuu. O le tali manino lena. Malie le sui usufono mo Falealupo, e manatu ua malamalama le mataupu ae see ese i se isi mataupu fou o le lauga aua le tatou Tala o le Tupe.

**Afioga Hon AEAU PENIAMINA LEA VAISEETA:** Faafetai lava i lau Afioga. E leai o matou e onosai, o le iva ai lenei o tausaga o matou onosai, o lea matou te onosai. Thats ok. Faafetai tele lava ua uma lea mataupu.

Ona oo mai lea i le faaiuga, ua iu foi le lauga lau Afioga i le Fofoga Fetalai, sa ou faapea atu sei faai i ai sau tala i le mataupu lenei. E muamua lava ona avatu le agaga faafetai i le Minisita o Tupe i le Tala Faatatau Faaopoopo (Nu.1) o le Tupe 2013/2014. Ma i lau uluai folasaga lau Afioga i le Minisita, sa atagia ai lou fiafia ina pau le Budget Deficit poo le faasiliga lea o tupe faaalu nai lo tupe maua i le 2013/2014 mai le 4.8% i le 4.5%. O le manaia ia, e latalata i le tapulaa lea o loo i ai o le 3.5%, a o lea ua pau. O se tulaga lelei,

ma a faapea e aliali mai se tulaga faapea, e tatau lava ma onomea le faafetai. Aisea? Aua foi e manaia, o lea e lelei. Faamalo i lau Afioga i le Minisita mo ia galuega lelei. Ma e talitonu foi la, ia taumafai e galue ina leua le 3.5% nei ia luni pe a fai le isi tatou Tala o le Tupe ona atoatoa ai lea ma fiafia ai. E le gata i lea, o loo atagia a i i le taua o i latou ia o lo o tofu sao i le aumaiga o tupe e faatino ai le tatou kitty e fai ai lau faasoaa, e pei o tatou paaga mai fafo poo tatou overseas donors, o saofaga, o lafoga, o tagata lautele, o tiute o oloa, o isi lava auala faapena, aemaise lava le sao o Faalapotopotoga Tumaoti. A o le fesili lava e tasi ou nofo ai i lalo lau Afioga i le Minisita o Tupe, poo usitaia ma amanaia ma faaaloologia e Faalapotopotoga Tumaoti a le Malo le vaega foi lea o le Tulafono 2001 i le Public Bodies Performance and Accountability Act? Foi lea e faapea; ina ia tuuina mai e Faalapotopotoga Tumaoti le 50 o latou tupe maua e tuu ma i i i lau kitty ona fai ai lea o lau faasoaa? Pe i ai ni Faalapotopotoga e le o faia lea mea? E i ai foi le Faalapotopotoga e pei o le agaga o le fesili, o le tele o a tatou Faalapotopotoga, ana tofu sao ma i i, ailoga tatou te siia le health ma nei mau mea ua fesiitai mai luga o tupe leiloa ia? O le fesili lea i lau Afioga, ma ua uma ai foi i ina ma se manatu o leni sui usufono leaga e taua. O le taua leaga o lea ta te iloa a i i, a i ai ni pefea i Faalapotopotoga nei, e le o le agaga ina ia suesue, o le agaga ina ia iloa ma faatulaga lelei aua ne i toe tupu ni mea faapea i ni Faalapotopotoga ae maua mai ai le seleni fesoasoani, ae aua ne i tatou toe utia pe pagatia i ni siitaga fou o tau pepe ai fatu i leni tausaga amata.

Ia, o le matou fesili lea. Faafetai i lau Afioga i le Fofoga Fetalai. Ua uma foi ma le matou tala pe a faapea e i ai se tali pe leai.

**FOFOGA FETALAI:** Ia, o le a tali atu le Afioga i le Minisita i lana tali faa-Minisita i le taimi pe a tali le tatou Kapeneta. E manatu e momoli atu le faafetai tele i lau Afioga i le Sui Taitai o le Itu Agai, faafetai le saunoa faa-toeaina. O a foi suaga o le vaatele ma fetuunaiga, e faapena lava le tatou galuega, ia toa le tai ma ia manino pea le mata o le vai. Ae faafetai atu i le sao taua o lea foi ua logona atugaluga i faafitauli o lena itu i le itu faa-Vaisigano ma le Alataua Sisifo ma lea itu o le tatou motu tele, faafetai o le ua amanaia ma ua faamauiina e le Kapeneta.

Ia, lau Afioga i le Taitai o le Itu Agai, o lea ua avanoa le Maota mo le saunoaga faaiu ona lafo atu loa lea i le Taitaifono o le Komiti o Tupe. Tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** Faafetai tele lava mo le avanoa. Ou te tulai ma le faaaloalo lau Afioga i le Fofoga Fetalai e fai foi sina sao puupuu i le Tala Faatatau Faaopoopo (Nu.1) o le Tupe 2013/2014.

E faatulou i le Maota i lau Afioga, faamalo le faatoatoa, faafetai le onosai ma le faapalepale. E le o ni upu avane ai i le galuega fita o lo o feagai ma lau Afioga. E i ai foi taimi e laavale ai ma sosopo le tatou va feagai ai, o le naunau lava ina ia faaoo atu se mau a se vaega toaitiiti, ae faafetai o lo o e lavapapale pea, ma le tatalo ia aua ne i e fausia fautuaga o lo o tuuina mai e tutuli nisi i fafo. O mea na i aso ua mavae. O lea ua tele a tatou semina e fai, ia amanaia le aiatatau a se vaega toaitiiti. O lea la e te savali ai i taiala ia.

Lau Afioga i le Fofoga Fetalai, e ao foi ona faapai atu i lea itu i lau Afioga i le Palemia ma le Sui Palemia, le mamalu foi o le tou saofaiga i Minisita o le

Kapeneta, a outou Afioga e lagolagosua i le tatou Malo i Minisita Lagolago faapea foi lenei itu i le Afioga i le Sui Taitai ma Minisita Agai o le Kapeneta Agai a le tatou Malo.

Ia, o le faafofogaaga a Samoa o le a ou le oo i ai aua e tumau lava paia ma sa e le avea mai mauga tetele seia paia maugaiti ou te faatulou ai. Ia lou itumalo pele o Safata, le paia i le Aiga Satunumafono o le Aiga Malosi mai Latatuli seia oo lava i le la itu. O Siulepa ma ona tua, Togamau ma ona tua ma le mamalu i le Alataua, ma le nofo a Tula. O faalupega na o le itumalo lenei, e leai lava se isi e mafai ona suia pe faataoto se alafua. I le tapuai mai a le Susuga i le Toeaina ma le Aufaigaluega Paia a le Atua i soo se fatafaitaulaga i le tatou itumalo mai Latatuli seia oo i Niualama, o tatou o le Aiga e tasi, o Satunumafono.

O lenei aso i lou tulai atu lau Afioga i le Fofoga Fetalai, o lea ua maea saunoaga a lenei Itu e Agaia le Faigamalo, e le toe tele foi i ai se faamatalaga, o fautuaga ma timaiga ae aua le faauiga sese o se tetee, leaga o le Itu lenei e le o se Itu Tetee. O le Itu e lagolago atu i la outou galuega fita ma le faigata.

Lau Afioga i le Fofoga Fetalai, sei muamua lava ona ou faafetai i galuega fai a le tatou Malo i auala galue, faleaoga, falemai, suavai, o mea uma i le la tausaga talu ai, sa ou taumafai lava ou te oo i ai, aisea? O le tiute lava lea o so o se Malo e tulai mai o le faaleleia o mea ia. Po o ai lava le Faigamalo e tulai mai po o lenei foi Itu, o le galuega lava lea e fai o le faaleleia o mea aua le soifuaga o le atunuu. Faamalo faafetai i galuega fai.

O le isi foi o matou tiute matou te tilotilo po o faaoga lelei tupe ia e fai ai galuega ia, faamalo lava. O la ua feinu nisi o le atunuu ae oo mai lava i le aso o la e fia feinu e na afaina i le Tsunami, ioe, sei silasila ane i ai.

O o tatou auala galue faafetai, ae ou te tautino atu o auala nei na fai i Paeaiga e lua ua tuana'i ua leai ma se aoga i le taimi lenei, a feoai ai taavale e tasi se pu ma se gaoa, ua malepe, pau lava lea o lau fautuaga ina ia toe silasila totoa le Malo i galuega o lo o faia i le taimi nei aua e oo atu foi i lea Paeaiga ma ona tua ua toe fai foi ma alu ai tupe a le atunuu, a o tupe ia o lo o ao i totonu o le atunuu e ala i lafoga ma le GST...

**FOFOGA FETALAI:** Malie le Taitai o le Itu Agai se i tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, e le mafai ona ou tuu loa se lauga e alu ae sese. Sa e saunoa mai nei o oe e te lagolago mai. E i ai nai auala o la e faaletonu a o le tele lava o auala o lo o lelei, la e i ai auala o la e faaletonu ma o la foi e iloa kamupani sa o latou faia ae sa lelei lava. O le mea lea e tupu i se atunuu aemaise o se atunuu e malosi tele le timu. A lea sa tatou maitauina i le tausaga talu ai o mea e masani ona i ai le timu o le 20-30 mililita ao le aso 12 na oso ai i luga o le 213 oso a i luga i le 600mililita. A lea na papa ai vaitafe? E lei tupu se mea faapea muamua, ae na matua pa ai le loto i Vailima. O le ala lea na matua malepe uma ai auala, o auala i Siumu na matua lelei lava le faiga ae ua malepe ma o lea faatoa fai nei. E tele lava auala sa lelei ona fai ae leai lava ma se auala e mafai ona tu i le malosi o le pau o le timu. E i ai le tausaga na oso ai le timu faapea i Ueligitone ae sau i le televise alu ane lava le isi tamaloa uu le oga ka, na ona susue lava i luga ma matala uma lava i luga a o mea ia e fai i fafo. E tataua ona ou tulai atu ona po o a lava

mea e fai e tagata, ae a sau loa le malosi o foafoaga a le Alii, e leai lava ma se mea e toe tuu, vaai i fale tetele ua solofa i lalo i le malosi?

Lau Afioga i le Fofoga Fetalai, o le a faapefea i nei auala ona tu i le malosi o le pau o le timu ma le malosi o le tafe, e tataua ona ou tautala i mea ia leaga a tuu loa e alu – o la e i ai auala o la e oo mai nei lava e le i toe faia ae sa fausia i le valu tausaga talu ai a o la e lelei le tele o vaega o le auala. O le mea lena ou te tulai atu ai lau Afioga leaga a le taua mea ia ona pei a lea e faasolo atoa le leaga o auala, ona galo ai lea o le 600mililita lea na pau na matua masofa ai dams ioe, malepe ai ma auala ma masofa ai ma fale.

Lau Afioga i le Fofoga Fetalai e tataua ona tatou mantunatu ai i mea na, aua le avea le naunau e faaleaga le Malo ona galo ai lea o mea ia.

**Afioga Hon PALUSALUE FAAPO II:** Lau Afioga o se mea e fia faasao. Ou te le o faaleagaina se Malo, silasila i le auala lea e sau mai Vailoa e tau i Malifa, ua fiu timu tai 600 mililita le mamafa o timuga, a o la e lelei lava, o le ala lena o lea ou te taumafai atu ai sei silasila totoa i le faiga o tatou auala.

**FOFOGA FETALAI:** Malie lau Afioga i le Taitai o le Itu Agai ,sei tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai o le mea e fia faasao, leaga e faitau miliona ma miliona auala na, o le vaegatupe na aumai i o i le Faletupe o le Lalolagi na fau ai. E matua maoae la le malosi ma mo lou silafia o le mea ua ala ai ona fau faapitoa ma faamalosi le auala lea, leaga o i tonu lea e sau ai loli mamafa. O e malamalama i le mea lena? O i lea e feoai solo ai loli mamafa e aumai loli sima tetele mai Vaitele ma felauai i totonu mo le fausia o fale. O loli mamafa uma lava a le aufaipisinisi lea e faaalu i le auala lea ona na fau faapitoa e feoai ai loli ma masini mamafa. O le uiga lena, e le faapena la, e eseese le malosi faainisinisa o lea e fau ai lea auala ma lea auala, ou te faafetai ua e laga.

O le mea ou te fiafia ai ua e laga ma e maua ai lo matou avanoa e faamatala atu ai i le atunuu le eseese o mea, leaga e uma nei foi e alu e tutu i luma o le TV, Palu, e le o se mea lelei le alu soo i luga o le TV, vaai oe i nei tamaiti e faia le TV nai tamai tamaiti lava, aua e te fiafia i ai. Ia o si au tala lea lau Afioga.

**FOFOGA FETALAI:** Tulai mai lau Afioga i le Taitai o le Itu Agai ou te manatu ua malamalama lea mataupu.

**Afioga Hon PALUSALUE FAAPO II:** Lau Afioga i le Fofoga Fetalai o le a ou le toe finauina ia mea, o fautuaga lava aua o le tele o tupe lea e alu i le tatou paketi o le toe fai ma fai ma fai pea o auala nei, a o lea ua saunao manino le Palemia ona e ese le standard lea e fai ai le auala lea. O lau tatalo aua le au foi i le tulaga lea e i ai le auala lea ina ia faaitiitia ai tupe....

**FOFOGA FETALAI:** Malie le Taitai o le Itu Agai se i tuu atu muamua le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o lea foi la ua i ai seleni e aumai i le tulaga faa-grant, foai mai le Faletupe o le Lalolagi. Ua mafua ona foai mai ona o le lelei o le faafoega e le Matagaluega o Galuega, Felauaiga ma Atinae Eseese o galuega, e faaauau atu ai le tatou auala lea e agai atu i Vailoa ma agai atu ai i Vaitele ma ona tala atu seia tau lava i o i le malae vaalele, a o seleni e aumai i le grant mai le Faletupe o le Lalolagi ona o le talitonuga o le tatou Malo e aofia ai ma outou, o lea matou te o lava ma tasiai atu ai lava ma outou.

**FOFOGA FETALAI:** Tulai mai le Minisita o Galuega, Felauaiga ma Atinae Eseese, malie sei tulai mai lou uso a sui usufono mo Safata.

**Afioga Hon Manualesagalala Enokati Posala:** Lau Afioga i le Fofoga Fetalai, o lo o manino lava i le saunoaga a le Taitai o le Itu Agai, ua tolu poo le lua Paeaiga talu ai auala nei ua faaletonu. O le tasi lea auala o lo o tatala ai o tatou auala, o le partnerships a le Malo, Private Sector ma matai i alii ma faipule. O vaega o lo o afaina o lo o toa ai le vai ona o le le faamamaina o autafa o auala ma tulaga faapena. Afai foi o i ai ni faaletonu o i ai e tatau ona fesootai mai i le Matagaluega, ae afai o mea e mafai ona faatino e alii ma faipule o mea na e tatau ona fai. Ou te manatua ae ou te lei avea ma sui usufono o le Maota i le matou nuu, o lau fautuaga sa fai i ai e faatau ni a matou taga sima ma ave e taumafai e faaleleia ai autafa o le auala e tele galuega o lo o feagai ma le Malo. O ituaiga tuualalo na i totonu o tatou nuu e mafai ona galulue faatasi e lagolagosua mai ai i le Malo ma lana pitolaau. O le mea lena e faamanino, afai ua tele Paeaiga a o le galuega e faifaipea mo le agai i luma.

Ma le faaaloalo lava.

**FOFOGA FETALAI:** Malo faafetai le fesoasoani mai, tulai mai le Taitai o le Itu Agai ou te manatu ua manino lea mataupu.

**Afioga Hon PALUSALUE FAAPO II:** Faafetai, o le uiga o lau tala e le o lou taimi ae ana faapea e te i ai i le taimi lena e le faletonu auala.

**FOFOGA FETALAI:** Tulai mai le Minisita o Tupe.

**Afioga Hon Faumuina Tiatia Faaolatane Tiatia Liuga:** Lau Afioga i le Fofoga Fetalai, o le taimi o le Taitai o le Itu Agai na matua tele mea e leaga, ou te iloa e tatau ona ou faamalamalamaina faapea. O le material lea e fai ai auala lea ua tele ai auala o le Malo i le taulaga o le as fault foi lea e fealofani ma le vai, water firmly, o le deep sealed lea e faaaoga i auala ia taugofie le faiga lea e fai ai auala galue lea tou te talosaga mai ai. Afai la e i ai se sui usufono e manao e as fault lona auala o lona uiga o le 2030 e fai ai. O lau talosaga mo nai sui usufono e faaaoga le deep sealed e faaaoga ai auala galue, o le faalavelave ua leaga ai ou auala leaga e feoai ai pasi. E le i faia ni auala galue e o ai ni pasi ma ni loli e lau ai ni mea mamafa, o le mea lena o lea e faamalamalama ai e eseese tau o materials ia e faaaoga, a faaaoga la le deep sealed e lua tolu tausaga ua toe manaomia leaga e goto i ai le vai ona tae lea.

**Afioga Hon PALUSALUE FAAPO II:** E leitioa la a taei ma leaga auala sa tatau ona faamanino i nuu e sa pasi, sa loli ona feoi ai i auala nei. O lea ou te manatua la outou Anavatau foi lea, o le mea e lelei mo Apia e lelei foi mo Savaii ma nuu i tua.

**Afioga Hon Faumuina Tiatia Faaolatane Liuga:** Lau Afioga o auala galue na o pikiapu e o ai ma tamai taavale. O lona uiga ua lau ai aulotu ma mea faapena ma uta maa e fai ai taligalu ma mea eseese uma faapena ua faaleaga ai o tatou auala.

Ma lou faaaloalo lava.

**Afioga Hon PALUSALUE FAAPO II:** O le a ou see ese a o la e faamasino mai le atunuu, o le tele o auala galue nei ua see i uta nuu, o lona uiga a alu atu le pasi e le savali le toeaina i uta po o le olomatua ae fai i le avepasi e alu le pasi i uta.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, e lelei ona fai atu sina au upu i le tala faasolopito o auala galue, e le o se mea masani a le Malo le faata o ni auala galue. O le taimi na tulai mai ai le HRPP sa alu lava le polokalame e le faataina ni auala, ona alu alu lea ua matou tilotilo atu o galuega faifai vavale le fai fai o auala ma toe alu atu le timu toe soloia, ona taumafai loa lea o le Malo e faata. O le faataina foi lea manatua o le taimi foi lena e le i malosi tele se manatu i le tulaga o le suiga o le tau, sa malosi lava i le tulaga foi lea na ona o lava i uta e galulue ma toe omai i tai, o i uta e galulue ma toe omai i tai. A ua sui atoa le filiosofia talu nei ona oso le Tsunami nei i le 2009, 2010, 2011, 2012, 2013, e lei leva. Ua sui atoa ai le filiosofia o le tulaga o le tatau loa ona toe tilotilo i le faamalosi. Manatua foi e lua lava mea tetele na tupu i le masina e tasi, o le oso o le Tsunami, ma le mea lea na tupu ai na e teva atu ai i ina, o le suiga o le auala tele e o i le itu tauagavale ona o lea o le a aumai taavale afi. O lea la ua tupu lua mea ia e lua lea na amata mai ai loa i le 2010 ua tele le suiga ua vaai i ai, ua amata ona o i uta tagata ma ua tele taavale, a o lea sa e valoia o le a oti tagata ae 700 tagata e oti i le aso talu ai lena mea valea ua faia e le Malo lea na mafua ai ona e alu atu i ina ma e toe faapea ane ai mulimuli ua e mao. Ia o le a e mao faapea o ai na fai atu a le ua e mao lava oe ma e alu atu i ina. O le tulaga la lena ua amata ai loa ona sui atoa uma ai le tulaga o le faiga o auala ma le malosi o auala talu mai le Tsunami ma le suiga o le olaga lea ua tele taavale ma ua faigofie i tagata ma o i uta ma nonofo ai toso atu ai ma le eletise, o le tulaga lena. E le mafai ona tatou toe agai i tua ma malamalama ai mea uma, ae na amata mai i le 2009 ina ua tuanai le Tsunami ma le tuanai o le suiga o taavale afi ina ua e teva atu i ina.

**FOFOGA FETALAI:** Tulai mai lau Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga, o le a ou see ese leaga ou te lei teva, sa ou alu i le musumusuga a le Alii. A lea ua ou Taitai? O lea ua ou Taitai? E le mafai ona ou nofo i se mea ua ou musu ai.

**FOFOGA FETALAI:** Ia malie le Taitai o le Itu Agai sei tuu atu le avanoa i le Afioga i le Palemia.



**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, toe aveese mai lau upu, e le o le teva, ae ua tuli, ona alu ese mai ai lava lea ma muga mai ai lava ma laulauvavale atu ia matou i le tuli fua o ia.

**Tofa Lealailepule Rimoni Aiafi:** Lau Afioga i le Fofoga Fetalai, e fia faasao le mea lea lau Afioga, e lei teva le Taitai o le Itu Agai pe na tuli, na step down.

**FOFOGA FETALAI:** Masalo ana faalogo le Taitai o le Itu Agai ia te au, e le oo i le tulaga lea e i ai nei. Sa ou maumau iumaea lava ae ua malosi lou fautua leaga le sui usufono mo Faleata Sisifo, lea na mafua ai loa ona fanau mai le Tautua Samoa.

Malie le Taitai o le Itu Agai, see ese o lea o le a alu le tatou taimi a o lea o le a taatia le tatou Tala o le Tupe.

**Afioga Hon PALUSALUE FAAPO II:** Ia, na ona ou faapea atu, ana ou faalogo ia oe semeamanu faapenei ua le mafai ona ou tautala o saisaitia lava au i tua i o.

Lau Afioga i le Fofoga Fetalai, ona ou oo mai lea i le Tala Faatatau Faaopoopo o le Tupe, ia, o le upu moni lava ia, e le mafai ona gafatia e Samoa i a tatou tupe maua mea ia e faaalu ai tupe, e le taitai ona gafatia ona e laititi a tatou tupe maua, a o le manao ma mea faatino, e le lava. O le mea lea e tatau ai ona ou faafetai i le faletupe o Atinae o Asia, ioe. Sei mulimuli ou faafetai i lau Afioga, ae tatau ona ou faafetai i le Peresetene ma le faletupe ma le Pulega o le Faletupe o le Atinae i le tupe lea ua aumai i le tatou Malo.

**FOFOGA FETALAI:** Malie lau Afioga i le Taitai o le Itu Agai sei avatu le avanoa i le Malo.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, se o le manatu lava lea e le faavaea, e matua le faavaea tele lea manatu. O le faapea mai o mea ia tatou te faia tatou te le gafatia. O silafia ea e le Taitai o le Itu Agai, o le ala lena e fai ai Budget, o le ala lena e fai ai Tala o Tupe? O Tala o Tupe e faatulaga mai tupe maua ona fuafua loa lea i ai o tatou mea e faatino ai.

O lenei tausaga, o mea uma lava ia ua tuu i lalo o le Budget, ona fua loa lea i ai o tatou mea e faatino ai. O lona uiga o lenei tausaga, o mea uma lava nei ua tuu i lalo o le Budget, o mea na ua gafatia. A o a nei ituaiga upu e faapea ua le gafatia? E mafua ona fai mea ia ona o lea tatou te gafatia, poo fea e sau ai tupe, o le malosi lava lena o le Malo. E leai lava se Malo i le lalolagi e faalagolago ia te ia lava. Vaai i ai e oo ia Amerika la le, o le mea lea na ala ai ona taofi le Budget e le isi maota, ona o polokalame ia e fai ae faalagolago le Malo i nonogatupe. E nono uma lava tupe a Malo alii, poo le Malo e vaivai poo le Malo e malosi, o le isi lea auala e faatino ai a latou mea, o le o e nono e pei foi o tatou, ae te tilotilo i lou capacity to pay, lou malosi e totogi ai. E leai la se Malo faavalevlea e faatulaga lana Budget o mea ia o le a faatino i le tausaga nei, ma o tupe ia e faatino mai ae faapea mai, o mea ia e fai e le gafatia. Oi a le gafatia o lea e i ai tupe e gafatia ai?

Lau Afioga i le Fofoga Fetalai, o le ala lena o lea ou te tulai atu ai, soloia ia upu ma a tatou faamaumauga, ua matua sese tele.

**FOFOGA FETALAI:** Tulai mai le sui usufono e saunoa.

**Afioga Hon PALUSALUE FAAPO II:** Lau Afioga i le Fofoga Fetalai, e le o ni upu a au, o lea lava e manino i le tatou Tala Autu o le Tupe. A silasila i tupe alu masani, o la e \$538miliona, a o tupe alu e \$651miliona. Ia faamasino ifo laia, e le lava tupe e fai ai mea e mananao ai ma tupe faaalu.

Lau Afioga i le Fofoga Fetalai, ana leai le tupe lea na aumai faameaalofa, e le lava....

**FOFOGA FETALAI:** Sei tulai mai le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, se e matua le malamalama lava le Taitai o le Itu Agai. E fau le Tala o le Tupe i tupe e te maua ma tupe foai mai fafo ma tupe e te nono. E faapena ona fai le mea. Soo se Malo lava, e leai se Malo i le lalolagi e faalagolago lava ia i ana seleni. O le mea lena e iloa ai le Malo e atamai, e le faalagolago i ana seleni ae alu e aumai tupe a isi e faaatoa ai ana fuafuaga. A vaai atu loa e le lava, a le lava, na o le tasi lava le auala e te faia, a e le alu loa i fafo, tipi loa i lalo lau Budget i le tulaga o tupe ia e te maua. O le a la le mea e tupu? O le atinae lea e fai nei a Samoa pe ana tatou o ai i le mea lena, o le atinae lea ua tatou i ai, masalo lea faatoa tatou taunuu mai i atinae na fai i le 1990. Vaai la i ai i le mataga, a o lea tatou te faaogaina o tatou mafaufau tatou te o ai e saili tupe i auala o lea e mafai ona tagofia e le Malo. A o a auala ia? O le auala o le faaoga o ana paaga, e leai lava se paaga na te fia aumaia se tupe ia Samoa pe ana faapea e sese ona faaoga.

Lau Afioga i le Fofoga Fetalai, ou te le iloa poo malamalama le Taitai o le Itu Agai. O le mea lea ou te fai atu ai ia te oe, aua e te tautala i tupe leaga e te le malamalama i mea tau tupe.

**FOFOGA FETALAI:** Tulai mai le sui usufono mamalu.

**Afioga Hon PALUSALUE FAAPO II:** A faapefea ona le malamalama o lea e malamalama lelei le sui usufono i le Tala o le Tupe? O lea ou te fai atu e le gafatia pe ana leai mea nei o aitalafu ma mea ia o meaalofa e aumai fafo. A o lea ou te fai atu, na pau lea o le tupe o lea e maua i a tatou lafoga ma....

**FOFOGA FETALAI:** Tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, o lea ou te tulai atu lava e teena ia ituaiga manatu faapea. Ana faapea e leai se tupe e maua mai fafo ona faatoa sao lea o upu na, faatoa sao lea o upu na. A o le faalavelave, mai lava i le tausaga e 1962, o mea lava ia o lea e alu ai tatou, e i ai tupe tatou te suea i totonu o le tatou malosia, e i ai tupe tatou te o e aumai i a tatou paaga. O le a le mea na ala ai ona saina le tatou feagaiga ma Niu Sila? O le a le mea na ala ai ona fia a tatou faiga paaga ma Europa? O le a le mea na ala ai ona fai a tatou

faiga paaga ma Saina, Ausetalia ma Iapani? E tatau ona tatou faafetai ia i latou na muamua atu na latou muai asaina le gasu o le taeao. O lea la ua tatou omai tatou o ai, taatia ituaiga mafaufauga na e le aoga.

**FOFOGA FETALAI:** Malo faafetai. Ia, le Taitai o le Itu Agai, faafofoga mai sei fai atu le upu lea a le Fofoga Fetalai. E manatu o lea ua manino le atugaluga lea e te atugalua ai. O lea ua faamalamalama uma mai e le Malo, e aofia uma lava mea e agai mai ma soo se tupe e fund ai le tatou Budget. Ia malie o lea ua lava le lua fetufaaiga e malamalama ai le mataupu, malamalama le Maota, malamalama mai le faafofoga a Samoa. O le tali a le Malo, ou te lagona o le tali faaiua lenei. Ae malie e le tau tulitulia ina ia malie lau finau, ae ia malie e see ese ma le mataupu lea ae agai mai o lea e faasolo lou taimi. A o lea ua manino i le tali a le Malo, o le tali tumau lenei.

**Afioga Hon PALUSALUE FAAPO II:** Ia, o le a ou see ese. Na pau lava le meal au Afioga i le Fofoga Fetalai, leai e malamalama lelei au, o lea foi ou te i totonu o le Komiti o Tupe Maua ma Tupe Totogi, e malamalama lelei i le Tala Faatatau Faaopoopo o le Tupe. Ae le o se mea e toatamai ai lau Afioga i le Palemia. E leai e aoga le mea lea e fai atu ai, aua e tatau ona avatu lau faamalo o lea ua tatou see atu i luga pei o le mea lea ua i ai nei i le tausaga nei, lea ua tatou i ai nei i Malo tauatia. E tatau ona avatu se faamalo, aua e lei mauagofie lea mea, e le mauagofie lea mea, e lagona ai le agaga faafetai. E le faapea o se taufaaleaga poo se isi tulaga, ae na pau lava lea o le mea, ia tatou mimita faatasi, e le na o i ina e mimita matou te mimita foi. Ia tatou femitai ona o lea ua tatou siitia i se tulaga lelei.

Lau Afioga i le Fofoga Fetalai....

**FOFOGA FETALAI:** Malie le sui usufono o loo saunoa sei tuu atu le avanoa i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, ou te tulai atu lava ma le agaga faaaloalo, aua a maitau mai, o lea sa ou talanoa atu i le faafetai e ave i o tatou taitai na mua i malae. O latou ia na faataoto maia taiala ia tatou te mulimuli ai e tau mai lava i le taimi lenei. Ma a tatou talanoa loa i le Tala o le Tupe, e ui lava ina faapea o lea e tapena atu nei, alii e o le tatou Tala o le Tupe. O atinae nei e fai o tatou atinae uma lava. E le faapea la o matou faapea atu o mea e tatau ona mitamita ai le HRPP na o le HRPP. O fuafuaga ma mea uma o loo tatou faia, o le tatou Paeaiga lenei e tau uma ai. O le ala foi la lenei na ala ai ona ta musu lava e ioe atu i le mea sese lenei na e nofo ma fai mai e toe fai le faiga palota faatopetope. O le agaga ia te au ma le matou Vaega, ia toe sao uma mai outou, toe sao uma mai matou. Ae a topelau loa le mea, talofa ia te outou. O le mea lenei o lea ou te popole ai. A o le agaga i le Vaega lenei, ia tatou toe sao uma mai i le isi faiga palota, tapena lelei a tatou mea, o mea uma lava nei tatou te faia, e tau uma ai lava tatou.

**FOFOGA FETALAI:** Ia, tulai maia lau Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fetalai, faafetai i le faauilavea a le Afioga i le Palemia aua o lea ua saunoa manino, ia

taumafai ia tatou sao uma mai. A o le nofo ma vaevae itumalo, ia ou te alofa atu o lena Itu, aua ua nofo lava ma faatauva outou. O le a la le uiga o le mea lea? O se naunau tatou te omai uma? E leai. O lena e i ai isi na e manao e nofo, o lena e i ai isi na e mananao ia aua ne i sao mai. O le a le mea e fai ai le mea o lea lava e lelei le mea?

**FOFOGA FETALAI:** O le a sei tali atu le faasaoga o le mataupu lea lau Afioga i le Taitai o le Itu Agai.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le agaga o le Vaega lenei, tatou te taufai omai uma. Vaai e oo mai lava nei o lea e tagiuu le Minisita mo Tupe Maua, o lea e tagiuu le Minisita mo Tupe Maua. E lua Paeaiga o taumafai le Minisita mo Tupe Maua e lua nofoa mo Safata. Na maua loa nofoa mo Safata, o la e te lua faauouo, e te lua omai faatasi, ma le te i o si toeaina nei ua tu ai lau pelu i le papatua. O lea la ua alu ai lava sau mai Falealili. O le mea la lena o lea matou te popole ai lava ia te oe, leaga e te fealuai ma lau pelu.

**FOFOGA FETALAI:** Malie ia le sui usufono mamalu o lea ua manino le mataupu lea a o lea e faasolo.

**Afioga Hon PALUSALUE FAAPO II:** Ioe, o lea ua manino, ae na pau le mea, ia e le aoga na ona faalele ae faatino le alofa. Ou te alofa atu i sui usufono o lena Itu, aua o lenei Itu e omai uma lava sui usufono o le Itu lenei. A o le Itu lena, e sau le isi ae nofo le isi, ioe.

**FOFOGA FETALAI:** Ia, sei toe tulai mai le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le ala foi la lea ua vaelua ai seats, ia nofoa, ia aua ne i toe tupu le mea lea na fai e le Taitai o le Itu Agai i le Minisita mo Tupe Maua, ae matua to lava lou pulou i le sui usufono mo Faleata Sisifo. Vaai o oe o le perofeta, e sao lelei le mea lea na e fautua ai, e moomia se fautua faaleagaga i le tou Taitai. Ae ou te fautuaina oe e te alu e sue se fautua faaleagaga, e matua moomia lava e le tou Taitai.

**FOFOGA FETALAI:** Tulai maia lau Afioga i le Taitai o le Itu Agai.

**Afioga Hon PALUSALUE FAAPO II:** Lau Afioga i le Fofoga Fetalai, o le a ou see ese, e faamasino lava o tatou itumalo ma Samoa poo ai lea e sao.

Lau Afioga i le Minisita o Tupe, talofa e, talofa i lau galuega o loo feagai ma oe, aemaise le pulea o tatou tupe, aua e le faigofie le tulaga lea ua tatou i ai nei. E oo lava i le Ofisa Sili o Pulega o le Matagaluega o Tupe avega ia o le a ave nei e le Malo, pili o tamaiti aoga, ua fai fai e Niu Sila ma Ausetalia lea o le a o ae o lea ua tuu mai nei i o tatou tauau. O le OUM, ua fai fai e le fafine papalagi la e ua alu ae amo foi e oe.

**FOFOGA FETALAI:** Ia, sei tulai mai lau Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, o au lea ua ou tau faaletonu. O lona uiga e te tetee i le ave o fesoasoani i fanau a Samoa? E te tetee o lea e fai le mea e fesoasoani ai mo le tologiina o pili o fanau a Samoa? Ia o lea ua e faaali nei ae ua tolu vaiaso o sau lava, o lea ua e alofa mai le Minisita o Tupe, ae ua tolu vaiaso e le misia le Observer, faamavae, faamavae, faamavae. A ia oe le alofa lea na e fai mai ai nei, e tatau lava ona e alu taeao e ave sau faatoesega e faasau aloaia i luga o le nusipepa, o upu le alofa lea na ou faia ia te oe, o se matua agasala, aemaise o oe o le Tiakono Toeaina ae e soona lafoina nei upu le alofa. Ua ou fiafia ona ua tomua au upu i le alofa, upu o le alofa, e tatau foi ona e ola ai.

**FOFOGA FETALAI:** Ia, sei tulai mai le Afioga i le Minisita o Tupe.

**Afioga Hon Faumuina Tiatia Faolatane Liuga:** Lau Afioga i le Fofoga Fetalai, ona o au ou te le faitauina nei mea o nusipepa pe ou te matamata i news a le Televisi, ou te le iloa poo le a le mea ua manao ai le Taitai o le Itu Agai ou te faamavae. Ai o galo i le Taitai o le Itu Agai, o au na ou suia ia i le taimi na alu ese ai ma le tofi Minisita. E leai se mea e mai le ulu e tau i vae ou te le iloa, ma o lea ou te puipui ia te ia. Faafetai.

**FOFOGA FETALAI:** Malo.

**Afioga Hon PALUSALUE FAAPO II:** Ou te le iloa poo le a le mea e saunoa ai lau Afioga i le Minisita o Tupe, ae ua uma ona susesue mea ia e te saunoa i ai. Lau Afioga i le Fofoga Fetalai, o le upu faamaoni lea ou te fai atu ai, o la e molimau le Matagaluega ina ua omai i le matou Komiti. E leaga a matou fononua o le Komiti, e le ese lenei Itu ese lenei Itu i le avega o le a faafeagai ma tatou, aemaise o le Tala Autu o le Tupe, lea ua taoto mai le siitaga o totogi ma tulaga faapena. O le mea la lea lau Afioga i le Palemia, e leai, o le upu moni lava lea ou te fai atu ai, leaga o lea na e saunoa, e le o se Tala o le Tupe na o outou, o le Tala o le Tupe a tatou faatasi. O la e molimau le Matagaluega i lau tala, ina ia silasila totoa i mea e faasaoina ai tupe.

**FOFOGA FETALAI:** Tulai mai le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** O le mea la lenei o lea ou te tulai atu ai, mai lava i le taimi na tofia ai au o le Minisita o Tupe mai le faaiuga o le 1982 seia taunuu mai i lou faamatuuina atu o le tofi i le 2001, o upu lava nei, talofa e i le avega o le a ave e le atunuu. Ia e leai lava ni na avega. O le tele ia o le mau savali tetee e amata mai lava i le 1997, savali tetee, savali tetee, 1994 na sau ai le isi savali tetee, talofa i le avega o le tauave e le atunuu. O le tootoo uamea. 1995, o lenei, 1996, 1997, 1998. Na faatoa uma lava i le 1998 ina ua malepe le Itu Agai ua lelava e isi le mataga ae fai pea. O ituaiga upu lava ia na e maua mai, talofa i le avega o le a tauave. Mai le 1982 i le 2001, o upu lava na, talofa i le avega. Ua ou faapea o le a leai se isi e sau e nofo mai i ina o le a toe pese mai ai foi i lenei pese, a o lenei foi o le a e pese mai ai ma oe.

Lau Afioga i le Fofoga Fetalai, o la e silafia e le Alii, e aumai lava e le Atua meaa e tatau ma le aso. O le tatalo lenei a le Alii.

**Afioga Hon PALUSALUE FAAPO II:** Ia, o le a ou see ese ia ma lea mea.

**FOFOGA FETALAI:** Ia, ua lelei lena le Taitai o le Itu Agai.

**Afioga Hon PALUSALUE FAAPO II:** E leaga o lea e le talitonu le Palemia ma le Minisita o lea ou te alofa moni lava.

**FOFOGA FETALAI:** O le agaga lea o le Malo e taumafai e faapupula atu, ae see ese toe lima ou minute.

**Afioga Hon PALUSALUE FAAPO II:** Ia o lea o le a ou see ese. O lea ua faafetai atu lenei Itu i le siitaga e 3%. Maumau e pe ana leai nisi mea ua lapelapea ai le siitaga. Le siitaga o penisini, le siitaga o tatou eletise ia e fofou mai, le siitaga o le falemai, ua pei e foliga ua aumai siitaga lapopoa ia ua paologia ai le siitaga lea e 3%. O le uiga o lau tala, e matua le gafatia siitaga ia e fai mai nei, a o lea e momoli atu lau faafetai i le tulaga lea. Aua e pei lava ona ou fai atu muamua, o lea ou te malamalama ona o le le atoatoa o le Lipoti a le Komiti o Tupe....

**FOFOGA FETALAI:** Malie lava le Taitai o le Itu Agai sei tuu atu le avanoa i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o faiga ia a Faigamalo, e silafia loa e le Malo le mea e tatau ona fai i lea taimi i lea taimi, fai loa, ma e leai lava se isi mea tatou te agai i ai. Talu lava ona tutoatasi le tatou Malo, o mea lava ia e fai, e sii loa tetee lea, e sii loa lea tautua i le tulaga o totogi, tetee. Ia, a sii foi tupe maua, totogi o tagata i a latou salaries, fai mai e le lava. O mea lava na ua faafagogo tagiao. I luga o le tulaga o le faagasologa o galuega, e faapena, e sii foi ma le tulaga o le soifua o tagata ma le faatinoga ma le lelei o le tautua. E le mafai ona tatou maua se falemai aupito sili ona lelei ae tatou o lava i le totogi tuai. E tatau foi ona toe vaai i le tulaga o le iloilo o totogi talafeagai mai lea taimi i lea taimi e teu ai ma maintain ai le falemai le la. Aua a le maintain ina foi, o outou lava e muamua outou tutu mai i ina, o le a le mea ua le maintain ina ai? O le taeao atoa lava lenei ma ananafi, na o le pau lava lea o le mea na ou faalogo atu ai ia te outou, na o le fai o lea mea, totogi lea mea, faalelei lea mea, ae leai lava ma se tou tala e lagolago ai tupe e faatino ai mea ia. E le faapena le olaga lenei. A e manao e faalelei se mea, e tatau ona i ai se seleni e faalelei ai, mai lava ia tatou ae le o le faalagolago pea i fafo. Ia lau Afioga i le Fofoga Fetalai, o le tali atu lena i le sui usufono.

**FOFOGA FETALAI:** Ia tali maia lau Afioga i le Taitai o le Itu Agai o lea ua faaiuu lou taimi.

**Afioga Hon PALUSALUE FAAPO II:** Lau Afioga, ua tele lava le fia lauga aua o lau Afioga i le Fofoga Fetalai ma le Palemia, e le tau fesiligia poo fea e maua mai ai tupe. A lea e taoto le Lipoti a le Komiti Faa-Palemene? A lea e taoto le Lipoti a le Komiti Faa-Palemene e uiga i le Lipoti a le Audit, lea e fau mai ai fautuaga i tupe e mafai ona faasaoina. O tupe la na o lea ou te fai

atu ai e aumai e fesoasoani i mea ia. E le gata i tupe pei o Faamasinoga lea e tele tupe e alu ai. O tulaga na o lea e fautua mai ai le Suetusi Sili, ae le gata i lea o lea ua faamaonia i le Lipoti, e aoao mai seleni nei e fesoasoani i la outou avega.

O le mea la lea lau Afioga i le Fofoga Fetalai, o le a uma ai foi i i lau lauga. Ae ona o lea ua laga mai e le Afioga i le Palemia poo fea e maua mai ai seleni. A tatou fuafua lelei ma faatatau lelei lau Afioga i le Minisita o Tupe, o i ina e maua ai le fesoasoani. O i ina e maua ai le fesoasoani mo oe aemaise le Matagaluega. E faitau fia miliona ma miliona e pei ona aumai, ia o mea na e faaopoopo i tupe maua a le tatou atunuu.

O le mea la lea lau Afioga i le Fofoga Fetalai, e le faapea o se matou tu ma tetee atu, e leai. O le tatou galuega e fai faatasi, o le tatou galuega e fau tele. O lea lava o loo manino i le saunoaga a le Afioga i le Palemia, o le Tala o le Tupe a tatou uma. Pe eseese o outou finagalo ma so matou taofi, e tasi lava le auga, ia oo le fesoasoani i o tatou tagata. Silasila i ai i le tau o le... O le maketi la e i ai nei, e sao. Faamalo i lau Afioga i le Minisita mo Faatoaga, tele le meamata. O le a le mea la e tupu? Fai mai le aufaifaatoaga, ua faatau i le \$10 i le tau talo, \$5 i le tau talo. A o le uiga o le tupe e totogi ai mea nei i le siitaga lea o le a i ai nei, o lena la lea e taumafai atu ai. Talosia ia manuia le faamoemoe o lau Afioga, ia aumai fale ia e fausia ai mea ia ina ia maua ai galuega a o tatou tagata, maua ai galuega. O le a foi se mea e fesoasoani atu ai lenei Itu, o le tatou avega e tauave faatasi. Ae talosia, o lea ua ou vaai i le mea lea e i ai le maketi, o ai a toe fia alu e fai se faatoaga pe afai e le maua lelei ai se tupe mo faamoemoe la ia i le totagiina o pili ia a? O le mea la lea, o le a lafo atu le faatuatuga. Silasila i le fuamoia lea... ua le iloa e le aufaifaatoaga fuamoia le mea lea e i ai ona o le taugofie o le fuamoia mai fafo. O lea lava ou te molimau atu leaga na ou vaai i ai. Sei fuafua ane poo le a se auala e fesoasoani ai i le aufai fuamoia. Pe le mafai ona tuu i ai se lafoga i luga o le fuamoia lea e aumai fafo, tainane lava e fai le WTO lea. Sei tau fesoasoani ai.

O le upu moni lava lea i fuamoia, toetiiti lava vaiaso uma o aumai fua au fuamoia. Aisea? Ua le iloa e le aufai fuamoia poo fea a ave i ai, ioe. Ave i le Mapuifagalele, o lea foi e i ai, e le iloa poo tufa foi i le Palemia ma Minisita. Ioe.

**FOFOGA FETALAI:** Malie le sui usufono o saunoa, sei tuu atu le avanoa i le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, e le fou nei mea. Na fai lelei lava le WTO sa logo mamao lava, tasi lea mea e manuia ai Samoa. A oo lava i le mea o le faatulagaga o le gaosiga o mea, tatou te o e gaosi mea e le mafai ona faatauva ma nisi o latou i fafo. Afai la e aumai mea mai fafo e taugofie, o mea la na e le tataua ona tatou o e fai. O lena la ua e lilifa i le aufai fuamoia, ae ou te le iloa poo ai lena fai fuamoia. A o le fai fuamoia lea ou te masani ona ou alu i ai, o le matua fiafia, o le matua tele lava o le fuamoia la e faatau i lona faleoloa. Ae ou te le iloa poo fea lea e te maua mai ai na faamatalaga. A faapea la o la e alu e foai a latou fuamoia, oi, e leaga lena mea? Aemaise o la e alu e foai i Mapuifagalele. Ae sa tataua ona e fesili i ai, o le a le mea ua e faia ai lea mea? Sa tataua lava ona e fesili i ai, e le iloa poo lana tali, 'o lau taulaga

lea i le Atua.' E te le mafai ona e nofo ma faamasino lava i le tulaga e sue ai ni au tupe mama. E tele lava o tatou tagata e faitaulaga. O nisi e faitaulaga i mea latou te faia, a o nisi e faitaulaga i seleni. O isi e oo i le \$30,000 a latou taulaga. O la e foi la e compare ma isi. A o lea la ou te faalogo atu ia te oe e pei e te toatamai i le ave fua o mea a isi tagata e ave e fai meaalofa ai.

Lau Afioga i le Fofoga Fetalai, se ua ou le iloa se le tulaga o oe. A fai se mea ua e faitio, a le faia ua e faitio. E te faitio lava i mea uma.

**FOFOGA FETALAI:** Malie le Taitai o le Itu Agai...

**Afioga Hon PALUSALUE FAAPO II:** Ua ou le iloa foi la le tulaga o lau Afioga. O le mataupu lea ou te avatua, o se puipuiga mo nai o tatou tagata faipisinisi. O le puipuiga a le Malo mo tagata faipisinisi o le tatou atunuu.

**FOFOGA FETALAI:** Lau Afioga i le Taitai o le Itu Agai, e lei faatagaina e te tulai mai, o lea se i maea atu le tali a le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, e le mafai ona ou talanoa atu i le mea lea, o le a ou agai sao lava i fuamoa. O le a e nofo la ma talau mai ae te le alu e talanoa i ai poo le a le mafuaaga? Afai o le mafuaaga o la e faimeaalofa ai, o le a la le mea e te faitio ai fua? E tilotilo ane loa ia oe pe afai o se vaega a le Itu Agai, ia ona pau lava lena o le mea, na mafua ona matou o e ave i o ona ua le taulia. O lona uiga, o la e anoanoa lau vaega. E le o se mea lena e igoa o se mea amiotonu? E le mafai la ona e sau aumai ni mau e le faavaea i totonu i i. Lau Afioga i le Fofoga Fetalai, afai ua uma au pulu, ua uma au pulu pe leai?

**Afioga Hon PALUSALUE FAAPO II:** O le mea e fia faasao lau Afioga.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** E le mafai ona ou talia se mea e te aumaia i totonu i i ae leai ni faamaoniga e aumai.

**Tofa Levaopolo Talatonu:** Lau Afioga i le Fofoga Fetalai o se mea e fia faamalamalama.

**FOFOGA FETALAI:** O le a le mea e fia faamalamalama le sui usufono mo Saleaula?

**Tofa Levaopolo Talatonu:** Ou te iloa lelei lava le loomatua lea e ona le fale fuamoa lea, o le tala a le loomatua, 'A e alu atu Levao ae tau atu i le Palemia ma le Taitai o le Itu Agai, ona e fai lea i ai ua matua fofoka a la aitalafu fuamoa ia te ia e lei totogia.' E pei o se mea lena e faamalamalama atu.

**FOFOGA FETALAI:** Tulai mai le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, tuu le tou amio lea o le o e



faatalanoa fafine e ona mea ma maua fua mai ai a outou fuamoa. Aua tou te faia, o le lē alofa moni lava le mea lena, o le tou o e faatalanoa ae maua mai ai a outou taseni fuamoa.

**FOFOGA FETALAI:** Le sui usufono mo Faleata Sisifo, e fai sou fale fuamoa?

**Tofa Lealailepule Rimoni Aiafi:** Lau Afioga i le Fofoga Fetalai, e lagona lou faanoanoa i le Taitai o le Itu Agai, e le lagolagoina e lou sui usufono lau mau. Ana faamaoni ua fiu e ai le fuamoa, na o le lua lava ana laa oo mai i lou fale, aumai sau taseni fuamoa. E leai se fuamoa e tasi o aumaia. O lea la, e ola oe le Palemia i le mea lenei.

**FOFOGA FETALAI:** Ia, tulai maia lau Afioga i le Taitai o le Itu Agai ua maea lou taimi ae faaiu maia le saunoaga.

**Afioga Hon PALUSALUE FAAPO II:** E tatou te talitalie, ae faapena atu sau faamatalaga. Atonu o la e silafia e le Minisita mo Faatoaga le tulaga lea mo fesoasoani i nai faifaatoaga ma le aufai atinae.

**FOFOGA FETALAI:** Malie sei tulai mai le Minisita mo Faatoaga.

**Afioga Hon Le Mamea Ropati (Minisita mo Faatoaga, Faleoloa o Faatoaga):** Lau Afioga, faafetai lava i le fuamoa. O le a tonu lava le mea e te manao e fai i le fuamoa? Sei tau mai le mea lea e te manao ai i le fuamoa?

**Afioga Hon PALUSALUE FAAPO II:** Atonu e te le o malamalama mai foi oe ia. O lea ou te fai atu o le maketi fuamoa mai fafo.

**FOFOGA FETALAI:** Ia, sei tali le Afioga i le Minisita mo Faatoaga, Faleoloa o Faatoaga, malie le Taitai o le Itu Agai.

**Afioga Hon Le Mamea Ropati:** O le aim lea e i ai a le tatou atunuu i le mea lea o le fuamoa, leaga e sao lava i le isi itu i le lau mai o fuamoa Amerika lea e lau mai ma faatau iinei ma faataugofie. Ia manatua la o fuamoa ia e aumai fafo poo le a lava le umi e sau ai, e oo mai iinei ua le atoatoa lona lelei foi lele mo le soifua maloloina. O le aim la lea e i ai, ia oo atu i le faaiuga o le 2015 ua fuamoa atoa lava na o Samoa lava latou aua ne i toe aumaia ni fuamoa mai fafo. O le aim la lena o lea ua ou tau atua ia oe. O le taimi nei, tusa o le 75% o fuamoa lea e faatau i totonu o le atunuu o fuamoa o lea ua gaosi iinei. E i ai nai faaletonu lea e i ai iinei ona e faigata ona fai le mea e tau o le feed mill, o nai kamupani tetele ia e faaola moa ma aumai i fafo tamai moa ma faatuputupu i luga moa ma oo ai i le taimi e fofoa mai ai fuamoa. E pei o lea e galulue ai le Matagaluega ina ia fesootai ma le vaega lea e maua ai se fesoasoani, aua a solve loa le problem lena o le feed mill o tamai moa, e le gata o moa a o meaituaolo po o puaa, ona solosolo lelei loa lea o tatou. Ae onosai mai pea i lenei taimi leaga e i ai le taimi e alu alu short le fuamoa, a o lo o lau mai pea le fuamoa e le vaega lea e aumaia oloa taugofie mai fafo, lea e i ai le fuafuaga a le Matagaluega e oo loa ina ua steady le tatou fuamoa ma ua lelei, kipi loa ma na fuamoa ma le mamai o o

tatou tagata. O le mea lena o lo o i ai o lea e talia pea i lenei taimi ina ne i te i ua tatou taofi atua ona outou toe complain mai foi lea ua le lava fuamoā.

**FOFOGA FETALAI:** Malo faafetai i le faamalamalama a le Minisita mo Faatoaga ma le Faleoloa o Faatoaga, sei tulai mai le Afioga i le Palemia mo se faaopoopoga.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, ou te faafetai i le polokalame lea e faataoto mai e le Minisita, o le mea taua lea na te tau maia, o le taimi lenei na o le 75% o le maketi lea e mafai ona supply e tatou o lona uiga o le isi 25% e le o mafai, o lona uiga o le mea lena o lo o faalagolago ai i fafo. O le aoga ia o mea faapea, o lea la ua manino ai e le o falaki le maketi, a o lea o lo o taumafai i latou e faatino le latou polokalame lea ina ia oo po o le lua po o le tolu tausaga o lumanai ua 100% loa ni fuamoā e mafai ona tatou gaosia lava i totonu. O le mea e tataua ona tatou faia o le uunai pea o atinae fuamoā.

**FOFOGA FETALAI:** Tulai mai lau Afioga i le Taitai o le Itu Agai ou te manatu ua malamalamalama le fautuaga.

**Afioga Hon PALUSALUE FAAPO II:** Faafetai o lea foi o le a faaiu atu le lauga, ua alofa atu foi i lau Afioga ae tele mea sa ou fia tautala ai, a o lea foi ou te le i tali i a tatou taligamalo, o se mea lelei. E tataua ona avatu lau faamalo i lena Itu mo la tatou taligamalo tele lea o le a fai iinei malo faafetai, e pei foi ona ou lagalaga ina ia silasila totoa le Malo ina ia uli ma sao le faamoemoe. E ui foi ina ou tilotilo i la matou asiasiga ua toe ato uma fale e le i leva ona fai. O tupe la ia o lea ou te taumafai atu ai e faasaosao aua le tatou Tala o le Tupe a o le agaga maualuga lava ia lelei le mea e fai ai le fonu, a o lea ou te fai atu mo le agai i luma ina ia faasaosao, aua o lau tala lava lea e fai i le Matagaluega o Tupe, vaai uma mea e taumafai ai, silasila o lea e ia te au le FK na avatu i le matou Tala o le Tupe lea o le a ou lauina atu.

I le tulaga o le tatou policy i taavale lea e manino lelei, na e tufa atu ia outou Lipoti e manino lelei ai le tatou taiala ma le faiga faavae i taavale a le Malo, ioe, aua ne i tint ina i faiga faavae a le tatou Malo, o le a le mea e fai ai lea mea, e fai ina ia faasaoina ai tupe a le SOE ina ia maua mai le dividend mo oe e le Matagaluega a o lea e i ai le tatou policy. E fautua atu ai ina ia faatino

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, faamolemole lava, o Au nei e faale malamalama i le gagana. O le a le upu lea o le tint?, se faamolemole sei faamalamalama mai leaga o la e faalogologo mai tua? O le a lena mea o le tint?

**Afioga Hon PALUSALUE FAAPO II:** Ia silasila i le faiga faavae lea na avatu ai, “E matua faasa lava ona faapipii i so o se taavale a le Malo e aofia uma ai Matagaluega ma Faalapotopotoga i lenei teuga taugata faapogisa, o le tint la lena, faapogisa o faamalama”.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, ua alu le isi tolu vaiaso o e

agiagi mai i le mea lea o le tint, ae faasino i le Minisita mo Tina ma Tamaitai, Atinae o Nuu, Afioga ma Agafesootai, ona ou talanoa lea sei sau sei fai se ta tala e pei foi ona ta talanoa ai i isi taimi pe a e faaletonu i aso foi a o ta mafuta ai. Ona ou fesili loa lea, o le a alii lea mea? Ae fai mai le tala a le Minisita, se o lou atalii foi lenei tautalaitiiti, na ou alu foi i fafo ae ou sau ua nofo ma tint lau taavale. Ona ou fai atu lea, o tupe la a ai na tint ai lena taavale? Se o tupe lava a lou atalii. Oi sole, tafefe alii o le mea la lena o lea ua e manuia ai. I le a? I le tuuaifua o oe a o lena o tupe lava a lou atalii. O le mea lena na ou alofa ai ia te oe e tolu vaiaso o e toto maualuga ai, a o le tint lea e te talanoa mai ai o le tint lava na fai e le atalii o le Minisita lava ia. Ia faamama ia lou loto i lena mea, vaai i le tele o lena mea e sau i totonu o le Lipoti a o le tint lava na totogi e le atalii o le Minisita.

Lau Afioga ou te le iloa po o ua faaii faafia le lauga a le Taitai o le Itu Agai.

**Afioga Hon PALUSALUE FAAPO II:** Ia o lea ua uma lau lauga, o le a faauma i le TV taeao le lauga a le Taitai o le Itu Agai ma faamanino ai mea ia. Ou te faafetai i lau Afioga i le Fofoga Fetalai, faafetai foi i lau Afioga i le Palemia ma le Kapeneta, e pei ona ou fai atu e le faigofie la outou galuega, o le agaga maualuga lena.

E faapea foi i Minisita Lagolago aemaise o lau Afioga i le Sui Taitai o le Sui Taitoatasi le sui usufono mo Alataua Sisifo, e le gata i lea o sui usufono uma o le Palemene.

**FOFOGA FETALAI:** Tulai mai le sui usufono mo Alataua Sisifo leaga o lea ua taua lou suafa.

**Afioga LAFATELE PATRICK LEIATAUALES:** Lau Afioga i le Fofoga Fetalai, faatoa uma lava ona ou faatoese ananafi vaeatu le maualuga o le Maota, i lou Itumalo ma tau faamalamalama mea ia. E sao ai le saunoaga a le Palemia, ou te faalogologo mai i Amerika ua agiagi le sui usufono, o lea ua ou tuualalo atu, agai mai pea i mataupu taua ae taoto pea la maua mataupu ma le toeaina e faapea lava aluga o le soifuaga. Ia o lea ua faalagi au o le Taitai o le Tutoatasi, aua le suea so outou lanu i lena vaega ae faapea lava aluga o le soifuaga e i ai foi se taimi e malie ai foi le toeaina leiloa pe ou te ae nei, a o upu ia e te fai maia e tuai ai ona ou ae.

**Afioga Hon PALUSALUE FAAPO II:** E leai faapea au ai e te fiafia pe a promote oe, ae ui o lea na ona faapena atu i le tatou Fonotaga i lenei aso. A i ai foi se upu ua laa vale ia tatou maua le loto fefaamagaloi, a o le agaga maualuga ia maua le toafilemu aemaise o le fesoasoani mo le tatou atunuu.

Ia manuia lau Afioga i le Fofoga Fetalai, lau Afioga i le Palemia ma le Kapeneta, le Sui Palemia o oe o lau uo, e le mafai ona aveesea le ta uo, lea na fai le ta tonu ou te sau i inei ae e nofo ai i ina a o lea ua ou popole nei i le mea lea ua tupu.

Ia manuia tele le Fono ma le tapuaiga a Samoa. Ia manuia le Maota.

**FOFOGA FETALAI:** Malo faafetai i suaga a le vaatele i le saunoaga matagofie a lau Afioga i le Taitai o le Itu Agai, o i foi e atagia ai le va fealoaloi ma le va nonofo i lou sao taua i lou momoliina mai o le feau ma le mau a lena itu o le Maota, tatou ave lea i uta ou te manatu ua tini tauao ai

lagona ma finagalo e ala i le soalaupuleina o le Tulafono Tau Faaofi o le Tala Faatatau Faaopoopo o Tupe (Nu. 1) 2013/2014.

Tulai mai lau Afioga i le Taitaifono o le Komiti o Tupe Maua ma Tupe Totogi, ae faamuli ma le ai le faamoemoe i le lauga a lau Afioga ma le mamalu o le Komiti o Tupe Maua ma Tupe Totogi, ona lafo atu loa lea i le Malo.

**Susuga PAPALIITELE NIKO LEE HANG (Taitaifono Komiti o Tupe Maua ma Tupe Totogi):** E momoli atu le faafetai i lau Afioga i le Fofoga Fetalai mo lou avanoa ae muamua lava ona ou faatalofa ma faatulou atu i le pau o le Maota o lo o sasao nei i ona tulaga faalupelupeina. Afio foi lau Afioga i le Fofoga Fetalai, afio lau Afioga i le Palemia ma le Kapeneta, afifio foi sui usufono mamalu o le Palemene.

Ou te faatalofa ma faatulou atu i le paia lasilasi i Ofisa Sili o Pulega ma Faalapotopotoga a le Malo ae tainane le mamalu o le Ofisa o le Palemene, faamalo le soifua maua ma le lagi e mama.

Lau Afioga i le Fofoga Fetalai, e puupuu lava se faamatalaga po o se lauga ona e maitau atu i taualumaga o le talanoaina o le Tulafono Tau Faaofi o le Tala Faatatau Faaopoopo o Tupe (Nu. 1) 2013/2014, e leai lava se sui usufono sa fesiligia le Lipoti a la matou Komiti o Tupe Maua ma Tupe Totogi, ona ou manatu lea na o nai mataupu lava nei e ui o lena ua i totonu o le matou Lipoti, ae i ai lou talitonuga o le toatele o sui usufono e le o faitauina a latou Lipoti. Ua na o nai mea taua nei e toe faamamafa atu ona o le taumafai lava i ni auala e faateleina ai ni a tatou tupe maua aemaise lava o le faasaoina mai o ni tupe faaalu ua le talafeagai ma faiga faavae o le Malo.

Lau Afioga i le Fofoga Fetalai, ua ou maitauina mai i saunoaga a nisi o sui usufono e mafuli lava i fautuaga e toe silasila i ai le Malo i ni auala e toe maua ai nisi tupe maua faaopoopo. Aemaise ai foi o le toe silasila i faiga faavae o le Malo i le faaaogaina o tupe faaalu po o mulimulitaia e Matagaluega ma Faalapotopotoga uma a le Malo aua lava le faasaoina mai o tupe e ono faaalu faasolitulafono. O le auga foi lea o se manatu e tuualalo atu ai i le Malo, i nisi o auala mo le faaleleia o tupe maua aemaise foi o le faasaoina mai o tupe faaalu a ua le talafeagai ma faiga faavae o le Malo. E pei ona taua i nisi o fautuaga a la matou Komiti, se i toe silasila ane le Malo i le faafoeina o la tatou Faalapotopotoga Tumaoti po o le SOES aemaise o le vaega lea ua faatulagaina mai e avea ma Public Training Bodies i lalo o le Tulafono o le Public Bodies Act.

Lau Afioga i le Fofoga Fetalai, ou te talitonu o le faamoemoe autu sa faavae e le Malo nei mo Faalapotopotoga a le Malo ina ia fai faapisinisi a latou meatotino aua na tupe mama po o ni polofiti e maua mai ai ma totogi atu i le Malo le 50% o ia polofiti e auala atu i ni dividends e fesoasoani a ii le Tala Faatatau o Tupe a le Malo. E fia faamauina ai le agaga faafetai ma le faamalo i nisi o Faalapotopotoga o lo o ausia lea faamoemoe, a o le tuualalo i le Malo ina ia silasila ane i le tele o Faalapotopotoga e le o ausia lea faamoemoe ina ia uunaia i latou mo sa latou sao e fesoasoani ai i le Tala Faatatau o Tupe a le Malo. Ou te talitonu a lelei ona faafoe e le Pulega ma le Komiti Faatonu le tatou Faalapotopotoga Tumaoti e mautinoa o le a maua mai ai nisi tupe faaopoopo se tele ma siitia ai a tatou tupe maua masani.

Lau Afioga i le Fofoga Fetalai, ua ou maitauina foi le tele o nisi o tupe maua e auala mai i nisi o lafoga e totogi e pei o lafoga mai recalling taxes, PAYE

taxes faapea foi ma ni vaega o le VAGST, sa tatau ona taofiina mai e nisi o Faalapotopotoga mai ni galuega faatino ae ua totogi uma atu i e sa faatinoina ia galuega. Ou te manatu ua faatamala Pulega i le faatinoina o a latou tiute, o le tuualalo sei toe silasila ane le Malo i ia faiga ua le mulimulitai ai tau lafoga a le Malo ina ia mautinoa le mauaina e le Malo o ia tupe mai lafoga e pei ona ou taua.

Lau Afioga i le Fofoga Fetalai, ona ou oo mai lea i tupe faaalu, sa tau afea i le saunoaga a se tasi o sui usufono o la matou Komiti le tulaga lea o faiga faavae a le Malo i le faaaogaina o taavale ae peitai ane e lei oo i ai lana saunoaga. O le mea e fia faailoa atu lau Afioga i le Fofoga Fetalai, ona ua maitauina e le Komiti le usitaia e nisi o Ofisa Sili o Pulega ma Faalapotopotoga a le Malo faiga faavae le tulaga o le toe faaopoopoina o ni teuteuga po o ni accessories e le moomia, o le talitonuga lea o le Malo na faia lea faiga faavae. Ae peitai lau Afioga o lou manatu ma lou talitonuga e pei o se tauvaga faiga taavale teuteu lea ta te vaai ai i Ofisa Sili o Pulega ma Faalapotopotoga a o lea e matua faasaina lava i lalo o faiga faavae a le Malo le toe faaopoopoina o ia accessories ona o le talitonuga a le Malo e toe alu ai isi tupe. O le tulaga lea e fesoasoani ai foi i le tau faasaosaina mai o a tatou tupe maua ona o ia tulaga, e le moomia. Ae o lo o i ai foi aulape i lalo o le Tulafono o le Public Monies Act, faapea foi le Public Commission Act e ono molia ai ituaiga faiga ia ona o lea e soli faiga faavae a le Malo, ae taatia atu pea i le Malo sei silasila ane i lea tulaga, aua lava le taumafai e faasaoina a tatou tupe, aemaise ai le mulimulitaia o faiga faavae.

Ua maitauina foi e le matou Komiti lau Afioga i le Fofoga Fetalai le faaaogaina pea e nisi o ACEOs po o Pule Lagolago o Matagaluega ma Faalapotopotoga o taavale a le Malo, ae o faatagaina i latou i lalo o faiga faavae a le Malo? O le mea lea, ona o le talitonuga o lo o totogi a latou alauni e agavaa i ai. Ae molimauina e le matou Komiti, e i ai lava isi Pule Lagolago i Matagaluega ma Faalapotopotoga o lo o faaaogaina pea taavale a le Malo ae le o usitaia ai faiga faavae ia. Ae tuualalo atu pea i le Malo e silasila ane i lea tulaga.

O le isi mataupu lau Afioga sa faaalua ai foi se finagalo o le Komiti, o le tulaga lea o le laiseneina o taavale a le Malo. Ua molimauina foi e le matou Komiti ni taavale o loo faaaogaina e nisi o Minisita ma Minisita Lagolago, aemaise foi o Faauluuluga o Matagaluega o taavale o loo faaaogaina e faameaalofa mai se poloketi o loo laiseneina i se laisene private. A o loo manino foi i lalo o faiga faavae, e tatau ona laiseneina uma lava taavale a le Malo i laisene a le Malo. O le agaga o le Malo ina ia puipuia meatotino a le Malo mai le soona faaaoga le tatau e faaalu ai foi le tele o tatou tupe.

Lau Afioga i le Fofoga Fetalai, o le naunautaiga lava ma le agaga maualuga o lou nei sui usufono, o le tuualalo atu aua se sao e fesoasoani atu ai i le Malo mo le faatupulaia o tatou tupe maua masani, aemaise ai o le fuafuaina o tupe faaalu i mea moomia aemaise ai ni polokalame e ave i ai le faamuamua ona o le le auau o a tatou tupe maua masani.

Lau Afioga i le Fofoga Fetalai, o nai vaivaiga ia e fai ma sao o lenei itumalo mo le Tala Faatatau Faaopopo (Nu.1) o le Tupe 2013/2014, ma ua maea ai foi ma lau lauga.

Tau ina ia agalelei mai pea le Atua ma ia faafualoaina lou soifua laulelei aemaise ia faatumu lau utu aua le feagai ai ma le faafoeina o a tatou Fonotaga. Ia alofagia foi e le Atua lau Afioga i le Palemia ma lau Kapeneta,

aua foi le feagai ai ma galuega fita o loo faafoeina ai le tatou Malo, tainane foi le paia o sui usufono mamalu uma o le Maota, faapea Ofisa Sili o Pulega o Matagaluega ma Faalapotopotoga faapea foi le Matagaluega o le Fono, ae ola lou nei tagata i le alofa tele o le Atua. Ma le agaga faafetai tele lava. Ia manuia le Fono.

**FOFOGA FETALAI:** Malo faafetai saunoa i lau Afioga i le Taitaifono o le Komiti o Tupe Maua ma Tupe Totogi.

Sei tulai mai le sui usufono mo Falealupo.

**Afioga Hon Aeau Peniamina Leavaiseeta:** Lau Afioga i le Fofoga Fetalai, faafetai atu i le faamalamalaga a le Taitaifono o le Komiti o Tupe Maua ma Tupe Totogi. Ou te fia fesili atu i le Afioga i le Palemia poo faalogo i ai poo le a sana tali i le Taitaifono?

**FOFOGA FETALAI:** Ia, e te manatu o lea ua tui meafaalogo a le Palemia o lea o le a amata ona tali. Ou te manatu o le atoaga lena o le faamoemoe o lea o le a sauni atu.

Ia, lafo atu ia i lau Afioga i le Palemia, o lea ua atoatagi tuleiga ma saunoaga i tali a le Malo.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, se ua leva lava ona matou sauni e tali ananafi. O lea foi la e ui lava ina toe o ni nai minute, e le mafai ona tuua le matou galuega. O le a tomua atu au upu i le faamalo i le Maota, faamalo atu i le Taitai o le Itu Agai ma le Sui Taitai ma outou uma i lena Itu o lo o agaia le Malo. Ou te faamalo foi i le Aiga Minisita ma sui usufono uma o lenei Vaega o e sa lafo sao uma i le tatou Fonotaga. O uiga ia e matagofie, o uiga taualoga e faatino ai le isi aganuu lea a Samoa. A oo ina faamaea mataupu o le fono a matai, ona see loa lea i le tulaga o le talanoa, e sua faatamalii, e tele lava le aoga e maua ai, e talie ma fai ai isi iuga taua.

O fonotaga sa ou i ai ina ua faatoa ou sau i le Palemene lenei, se o le tele ia o le toto maualuga e maua ai, ae lei faatinoina i le tulaga lea, e puupuu lava le taimi na maua ai le agaga lea e felafolafoai ai le Palemene o le talitalie ma momoli le feau. E ese lava foi le auala e faatino ai. Afai foi la e maitau mai pei ua mamafa nisi foi o lafoga ua le tusa ai, e faamalulu atu, o uiga lava ia o tatou. E i ai lava le muagagana e faapea; a tatou omai loa lote ma faasoa le manuia o Samoa, e le toe miliina faauu a tatou upu, e tuusao. Ma o mea foi na e fai i totonu o nuu, a oo ina faasoa se manifata, o le taimi aupito sili lena ona pisapisao ma faamanatu mai, e leai se tufaaga a matou. Ia, e lele atu lava i i le mea o loo i ai le na te faasoaina, e lele atu lava ona pue mai lea. E pue mai a misi, ua pau i le palapala. E faapena le tulaga lea e i ai le tatou felafolafoaiga, e talie ma avatu aumai. E tetele a pesega ae matua i le oo le tulaga o le feavatai. Afai foi ua i ai se upu ua sasi a matou, matou te faamalulu atu e le o le agaga lea. O le agaga lava ia ina ia palepalealuga a tatou upu e vave foi ona maua ai le tonu. O le uta a le poto e fetalai. O le a le uiga o ia mea? O fautuaga lelei uma lava tou te aumaia, o lea e faamaumau e le Kapeneta. Aua foi la ne i tou faapea e i ai se manatu lelei ma se tuualalo lelei o loo misi ia matou. O le ala lena o lea ou te lei tali atu ai i le sui usufono mo Falealupo poo malamalama i ia mea. E malamalama lelei. A le

malamalama faatoa e sau nei ananafi ae ua leva ona ou i totonu o le Palemene? Ma o mea ia tatou te talanoa ai nei, o mea lava nei na talanoa mai le taimi faatoa ou sau ai i totonu o le Maota lenei. E le fou.

O le tulaga lea e aumai i totonu o le Lipoti na saunoa foi i ai le Taitaifono, e sau mai totonu o faiga faavae a le Malo na faataoto mai, o lea ou te tau manatua ua fai si leva, ae faatino e le Minisita o Tupe, o ia o le Taitaifono. O la e la e malamalama lelei i ai le tou Taitaifono. O au ia sa ou faalagolago i ai na te faatinoina mea uma ia, lea ua toe saunoa i ai.

O le tau faaiiuga o le Palemene talu ai ma lau Kapeneta sa i ai, e i ai le mataupu taua lava sa ou manao e faatino. O le isi reform lena e matua faasao ai tupe a le Malo, o le matafaioi lea a lau Minisita o Tupe lea ua Taitaifono nei, ona ou avatua lea e au o le Palemia, Former Minister of Finance o le tulaga o se reform tele lava e i Komiti, o le aveese o Minisita mai le toe Taitaifono i Komiti. O au la e ana le fautuaga lea. Ia ona fautua mai foi lea o lau Kapeneta e aofia ai ma le Taitaifono, e a pe a toe tolo atu i tua? Ona tolo mai lea ia Iulai, tuu ia Tesema, oo ia Tesema, ua a? Ae toe talanoa mai foi lau Kapeneta, ae a pe a e malie, tuu ia i le Paeaiga fou. O au la, o le Taitai e fautuaina, ona ou tuua foi lea i le Paeaiga fou. O le Paeaiga fou la lea e faatino ai le faiga faavae tele lava lea e faasaoina ai tupe. Afai sa ou Minisita o Tupe mai le 1982 i le 2001, le sui usufono mo Falealupo, e leai lava se mea ou te le malamalama i ai. O lea la ou te fai atu ia te oe ma lau fesili lena poo ou malamalama i ai, e leai lava se mea o pogisa i lau vaai. Ae o lau Minisita o Tupe ou te faalogologo i ai. Afai la o faalogologo mai lau Minisita o Tupe sa i ai muamua lea na ou tuua i totonu e Taitaifono, ou te lei soona tuua i totonu e Taitaifono i le tou Komiti. Aisea le mea ua ou tuua ai i totonu e Taitaifono i le Komiti? Ou te manao na te toe aumaia mea ia lea sa na vaaia a o Minisita o Tupe.

Lau Afioga i le Fofoga Fetalai, o le faafetai lena ona o lea e toe faamanatu mai i le tou lipoti, ae leai lava se mea o aumai i le Lipoti lena e fou ia te au. O le a amata le matou galuega i le Minisita mo Leoleo ma Falepuipui ae faaiu mai ia te au. Ia soifua ma ia manuia le tatou Fono.

**FOFOGA FETALAI:** Malo faafetai saunoa i lau Afioga i le Palemia. E manatu foi ua sagatonu lau o le fo ma ua tali uta ua tonu tai. O le faamoemoega o lenei afiafi o le a amata ona tali le tatou Malo.

Tulai maia lau Afioga i le Minisita mo Leoleo, Falepuipui ma Auaunaga o Tinei Mu. E taua tele le faaogaina o le tatou avanoa ma le taimi. Tulai mai e tali mai le Matagaluega i tuleiga ma saunoaga a sui usufono mamalu na laga atu.

**Afioga Hon SALA FATA LISATI PINATI (Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei):** Faafetai i lau Afioga i le Fofoga Fetalai. Sa ou manatu lava ua fai ifo i lalo le fetu a le tamaloa, ae moni lava le Palemia, o taimi uma lava, e faataua taimi. O lea la o le a fai atu ai se sao o lenei foi Matagaluega e tusa ai foi ma ni mataupu sa laga i finagalo o sui usufono mamalu. E toafitu sui usufono sa laga mataupu e tusa ai foi ma le faaleleia poo se faufautuaga foi aua le nofoaga i Tafaigata atoa ai foi ma le auaunaga a alii ma tamaitai leoleo.

E muamua lava ona ou tali atu i le mataupu a se tasi o sui usufono mo le Au Palota Taitoatasi, Afioga Mauaiva Pat Ah Him e pei ona taua ai hydrants.

O hydrants o le matafaioi lea a le Matagaluega o vai. A o lo o i ai foi le galuega fai faatasi a le Fletcher ma le Pulega o le Suavai o lea e fautua ai pisinisi nei o lo o tele fogafale i le taulaga ina ia faapea ona faamalosi le i ai o tologa uma e tineia ai mu pe afai ae tulai mai se faalavelave tau mu. Ia, o le vaega lea o lo o faapena ona i lalo o le vaaiga a le Pulega o le Suavai.

O le mataupu e uiga i le \$120,000 le aofaiga o se vaegatupe o lea ua to mai aua la le faaleleia o Tafaigata. Mo le silafia e le mamalu o le Palemene, o lenei galuega o se galuega ua leva ona tatau ona faatino talu ai ona ua faatupulaia le fuainumera o e o lo o taofia i uta. O fale foi o le a fausia e fausia lava i le aganuu, o fale faataalaelae. Ma o se moomooga ma se naunautaiiga foi lea ina ia pulea lava i le aganuu. O le aganuu foi o le a taiala ma limataitaiina ai o tatou tagata ina ia maua le nofo lelei ma usitaia le Tulafono, ia faapena foi ona pulea i amioga atoa ai ma le aganuu o le a faapea ona fai ai le aganuu faa-Samoa. O le aganuu la lea e faia le osiganuu i totonu i nofoaga e fai ai nuu. A faapea lava e 20 ni fale o le a faapea ona faatino aua o le taimi lava ma maua mai le seleni o le a faapena ona faatino ai ia vaega uma, o i ina o le a fuafua ai, e tofu lava le fale ma le matai. O le matai lea, o ia e taitaia, e i ai foi e e faufautua. Ae ou te talitonu, o se galuega lelei tele, e alu atu le tagata ma lona faafitauli i uta ae ou te manatu e foi mai ua sui atoatoa. Aua foi e maualuga lava ia tatou le aganuu ma aga faa-Samoa ina ia limataitaiina ai alo ma fanau.

E le na ma le laina, o le tulaga o lo o i ai le nofoaga, o le tele lava o le tupulaga talavou. E pei foi ona aumai le molimau a le Komiti i le aso na alu atu ai le asiasiga, i le aso e tasi, ae 18 i latou na molia atu ma taofia ua molia i le solitulafono. Ia, o se vaaiga lena o lo o i ai le nofoaga toefuataiga, e maualuga lava le agaga ia galulue faatasi alii ma tamaitai faapea foi i latou ua taofia. O le agaga lava ia e le tuuaia foi i latou, ae pau lava lea, o le tofi lava o le tagata o le sese, a o i foi e ave i ai le tatou faamuamua ma ave le aganuu e faafailele mai ai tu ma aga ina ia maua ai le agaga e faamagalo ma ia toe fuatai ai le olaga o i latou ua soli le Tulafono.

**FOFOGA FETALAI:** Ou te vaelupeina le saunoaga a lau Afioga i le Minisita, ona e manatu o lea ua tatou taunuu tonu i le taimi malolo e pei ona faatulagaina i le tatou lafo faatu.

E momoli atu le agaga faafetai tele i lenei aso le paia e ma le mamalu o le tatou Maota, malo le usufono. Faafetai saunoa, faamalo fetalai, faafetai le timai. Ua manatu ua tele le tatou galuega ua tini tauao i ai tuleiga ma saunoaga a tou Afioga i sui usufono, a o lea foi ua amata ona talifuitau le tatou Malo. Ou te lagona, ia tatou sailiili malosi mo le aso a taeao, taeao aena ona faasolo lea o le tali a le tatou Malo seia oo mai lava i le Afioga i le Palemia, ia ma faaiu atu ai le tatou Tala Faatatau Faaopoopo o le Tupe. E i ai le lagona ona e fai lava si tele o le tatou galuega mo le vaiaso lenei, ona o le tulaga o le tele o tatou Tulafono ua tatau ona tuuina atu i aao o Matagaluega, ma nisi foi o Komiti ma Lipoti na tuuina mai, ua fai lava si tele o le lisi o loo faagasolo. E i ai lava le lagona ia aua ne i to i vasa le galuega, o loo taliga mai foi Matagaluega e ala i Tulafono aemaise o le tuuina mai o le galuega sa gapatia ai le Palemene. E tatau ona tatou mulimulitaia ma e le tatau ona tatou silia ma le Aso Faraile. Ae maitau atu o lea ua faaiuiu le saunoaga i le tali a le Malo, ia tatou tatalo ia taitai lo tatou soifua manuia i le aso a taeao.



E toe faamanatu atu, o lea ua ta tonu le itula e 7:00 i le afiafi, a avanoa, o le tatou Fono Tatalo o lo o taulamua ai le Minisita o Tupe ma nisi o le tatou Komiti ma sei outou faafogafoga i le mea lea na saunoa i ai le Fofoga o Alii o le Tautua, o i ina lea e maua ai le faauuga o upu faaleagaga e mafai ai ona tomatauinā, e le gata ina outou saunoa ae outou faatino. I lenei la afiafi, ia manuia faiga malologa ma le tatalo, ia tatou faatasi i le aso a taeao.

A o lei tolopoina le tatou Fono, ou te tatalo atu i le sui usufono mo le Aiga Sa Peseta i Samauga, aemaise Safune, le sui usufono mo Gagaifomauga Nu.2 e tulai mai e fai se tatalo faaiu.

**Tatalo.**

*Na motusia felafolafoaiga ina ua tolopo Taulumaga a le Fono Aoa o le itula e 7:00 i le afiafi seia aulia le itula e 9:00 i le taeao, Aso Tofi, 23 Ianuari 2014.*